

# Redzuun Rexpejn Dios

**Siäd Sprit D<sub>xan</sub> xten Dios  
te cuääzni nen lastootu**

**1** Xamigwä Teófilo, abacuaä lojlu xcuent guiraa recos nani bejn Jesucrist näjza nani baluui Jesucrist, che guslojlini, <sup>2</sup>hasta dxejli ni huäjsni xhaguibaa. Gunibexgaani xhini'c gun renani guleni gac xpejnpacni. Sprit D<sub>xan</sub> xten Dios baluui Jesucrist xhi guiniini lojreni. <sup>3</sup>Gudejd Jesucrist trabajwduxh, dxejcti gujtni. Dxejc gubansacni lo rebengut, baluiloj<sub>ni</sub> lo rexpejnpacni. Tiuu dxej baluiloj<sub>ni</sub> loj rexpejnpacni balti huält te gacbeereni agubansacni. Guniizani lojreni xcuent xcälrnibee Dios.

<sup>4</sup>Che gudejd tiuu dxejga, batoj<sub>p</sub> Jesucrist rexpejnpacni, gunibeeni na'c guiriireni guedx Jerusalén, cuääzreni jiaäd Sprit D<sub>xan</sub> xten Dios nani aguniipac Dios jiaäd. Räj<sub>p</sub>ni: —Dee abiejn diajgtu guniá lojtu.

<sup>5</sup>Juan batiobnis con nis, luxh naj guxii dxej cayäädx dxejcru siäd Sprit D<sub>xan</sub> xten Dios te cuääzni nen lastootu. Si'c guirobnistu —räj<sub>p</sub>ni.

**Huäjs Jesucrist siini xhaguibaa**

<sup>6</sup>Lagajc dxejc che abidoj<sub>p</sub>reni loj Jesucrist, gunabdiidxreni loj<sub>ni</sub>:

—¿La naj gudedsaclu yälrnibee lo rexpejn Israel, ä?

<sup>7</sup>Dxejcti räj<sub>p</sub> Jesucrist loj rexpejnpacni:

—Di riäj<sub>l</sub> gacbeetu xcuent redxej näjza retie<sub>m</sub>p nani abasobx<sub>gaa</sub> Dios con xcälrnibeeni. <sup>8</sup>La'tu sica'tu yälrnibee che abiääd Sprit D<sub>xan</sub> xten Dios nen lastootu. Dxejc chatie'chtu xtidxä näjza rextzunä nen guedx Jerusalén, nen guiraa reguedx Judea, nen guiraa reguedx Samaria, näjza nen guideb guedxliuj —räj<sub>p</sub>ni.

<sup>9</sup>Gulujxtis gunii Jesucrist rediidxga, luxh la<sub>l</sub>ni cahuii rebejn loj<sub>ni</sub> huäjsni xhaguibaa, sa'csi gurejdx Diosni. Dxejc biääd te za, biu'ni nen zaga. Ro'cti diru rebejn nuhiii loj<sub>ni</sub>. <sup>10</sup>La<sub>l</sub>ni cadxelodxi rebejn xhaguibaa cadre gunitloj Jesucrist, tiop angl xten Dios ni najcw ladnol suga' gajxh cadre suga'reni. <sup>11</sup>Dxejc räj<sub>p</sub> reangl loj rebejn:

—¿Xhi rajctu ben Galilee? ¿Xhicuent cadxelojtu xhaguibaa? Abahuiitu xho huäjs Jesucrist siini xhaguibaa. Lagajc si'c guibisacni —räj<sub>p</sub>reni.

**Gulereni Matías ni najc apostcoob**

<sup>12</sup>Dxejc birii rebejn yejc dajne' ni laa Dan Oliib, siireni

guedx Jerusalén. Dan Oliib suga' gajxh Jerusalén. Gusajrenini si'cni rnii leii sajc sareni dxej ni rusilajzreni. <sup>13</sup>Che biu'reni Jerusalén, bidzujñreni ro' yu' cadre rbázlaareni. Yu'ga najc jiaa yejc stee yu'. Ro'c rbázlaa Pedr nájza Jacob, Juan, Andrés, Felipe, Tomás, Bartolomé, Mateo, Jacoob xi'n Alfeo, Simón nani laaza Zelote, nájza Judas bejtz Jacob. <sup>14</sup>Ro'c yu' guiraareni nájza regunaa nájza Marii xnan Jesucrist nájza rebetzhuin Jesucrist. Cabejdx, canabreni loj Dios; tejsi najc xhigab xten guiraareni.

<sup>15</sup>Nadxagsa' te gayuu gajl bejn. Dxejcti huisulii Pedr galáiiireni, rájpnii loj rebejn:

<sup>16</sup>—Caniä lojtu, resa'ä, nanabpac soob xtidx Sprit Dxiän xten Dios ni bacuaa toDavid lo guijtz xcuent Judas, nani bato' Jesucrist loj renani gunaaazni. <sup>17</sup>Gujc Judas sa'nu, bejnzani lagajc dzuun ni biennu.

<sup>18</sup>Cua' Judas meel ni badeedreni lojni che bato'ni Jesucrist. Che gulujx bejnii dzunguijdx ni bejnii, badesacni meel lojreni. Gusiireni te la' yuj. Dxejcti lagajc Judas basäl duu guejnii, guzäbnajlñi lo bej, gujtni. Gusaguijni, dxejcti biräjs xque'ni birii guiraa reziini. <sup>19</sup>Che biejn diajg rebejn Jerusalén si'c, gulälajreni yujre Acéldama, ni säloj yurejn. <sup>20</sup>Neñ guijtz ni laa Salmos abacuaa toDavid rediidxre:

Sujianxteb rolizjni;

na'c cuääzru bejn rolizjni;

nájza:

Suxca'za ste'ca niguii xtzuumni.

<sup>21</sup>Naj nanab cuenu stee niguii — rájpnii Pedr—. Nanab gacni tej ni

gusanäj nuunu guideb redxej ni guyunäj Jesucrist nuunu, <sup>22</sup>dxejli ni gusloj batiobnis Juan hasta dxej ni huäjs Jesucrist xhaguibaa. Te gacnäy niguiire nuunu gusule'nu diidx gubansacpac Jesucrist lo rebengut.

<sup>23</sup>Dxejx gulääreni tiop niguii lojreni, tejni laa José Barsabás ni rbälajreni Justo, steeni laa Matías. <sup>24</sup>Gurejdx, gunabreni lo Dios, rájpnii:

—Dad, Dios, ni racbee lastoo guiraa rebejn, baluii loonu con ni najc niguii ni agulelu loj guiro'p niguiire, <sup>25</sup>te jiu'ni lo dzuun nájza lo yälapost ni basa'n Judas cheni sääni garenca nejz —rájpnii.

<sup>26</sup>Dxejcti gudzujtreni daad te gulereni lo guiro'preni. Che biajb daad, gulereni Matías. Dxejx bigabnäy Matías stzubiteeb reapost te gujcreni tzubitio'p apost.

### Biääd Sprit Dxiän xten Dios

**2** Che bidzujñ dxej ni rajc lanij xten Pentecostés, tre' guiraareni tejsi lajt neñ te yu', <sup>2</sup>chela gusloj cayubej xhaguibaa si'c te beroduxh, bachajni guideb neñ yu' cadre suga'reni. <sup>3</sup>Dxejx bahuiireni astoo carechxteb xhidajl bale' casanij rebajlga yejc tejga reni sojb ro'c. <sup>4</sup>Biu'ti Sprit Dxiän xten Dios neñ lastoo guiragajcreni. Dxejx gusloj caniireni garen-garen didxsaj si'ctisni badeed Sprit Dxiän xten Dios guiniireni.

<sup>5</sup>Neñ redxejga, xhidajl rexpejn Israel ni sasanäjpac xtidx Dios bidzujñ guedx Jerusalén. Xhidajl lajt biriireni siäädreni. <sup>6</sup>Che biejn diajgreni guyubej beduxhga,

bidojp reben̄ xhidaalga, bachaag sa'reni. Rdxeloduxh reben̄ xhidalga sa'csi cayejn̄ diajgreni canii reapost xtidxsajpac cade tejreni.

<sup>7</sup>Cadxelojreni räjpreni:

—iBahuilaaare! ¿La et ben̄

Galileedi renani canii, ä? <sup>8</sup>¿Xhoxh riejn̄ diajgnu caniiireni xtiidxpacnu si'ctis ni rniinu laadxnu, ä? <sup>9</sup>Najcnu ben̄ nación Partia, ben̄ nación Media, ben̄ región Elam, ben̄ Mesopotamia, ben̄ Judea, ben̄ estad Capadocia, ben̄ región Ponto, nájza ben̄ Asia. <sup>10</sup>Najczanu ben̄ distrit Frigia, ben̄ estad Panfilia, ben̄ nación Egipto, nájza bejn̄ ni siäd stelaad Cirene, te estad nen̄ Africa. Loj rebejn̄ ni siäd Roma yu' reni najc xpejn̄ Israel, yu'za reni bazuxhijb lo Dios sa'csi rililajzreni si'cni rililajz rexpejn̄ Israel. <sup>11</sup>Yu'za ben̄ Creta. Yu'za ben̄ nación Arabia. Guiragajcnu riejn̄ diajgnu caniiireni xtiidxpacnu si'ctis ni rniinu laadxnu. Caniiireni loonu xcuent recosroduxh ni cayujn̄ Dios.

<sup>12</sup>Bidxeloduxh reben̄ xhidaalga, dijiejn̄ xhi xhigab gunreni. Räjpreni lo sa'reni:

—¿Xhi säloj dee?

<sup>13</sup>Dxejcti guyu' rebejn̄ ni baxhiznäjreni, räjpreni:

—Agusojz redee.

### Gunii Pedr loj rebejn̄

<sup>14</sup>Dxejcti gusulii Pedr nájza tzubiteeb sa'ni, guredxa'ni guniini lo reben̄ xhidaalga:

—Guejbtu, rexpejn̄ Israel, nani rbäjz distrit Judea nájza guedx Jerusalén. Colcuadiajg diidx nani guiniä. <sup>15</sup>Xhet sojzdinu si'cni cayujntu xhigab. Rsilru naj, entis

gojl rcagaa. <sup>16</sup>Dxejc scree gunii Joel che guniini xtidx Dios agujc xchero.

<sup>17</sup>Räjpp Dios:

Sidzujn̄ dxej che guxhalä Xsprit Dxañä cuääzni nen̄ lastoo guiraa rebejn̄.

Rexingaantu nájza rexindxa'ptu sinii xtidxä xcuent recos ni gajd gac.

Rexi'ntu sinixcal, rextadgoldootu suluiloj bacal recos nani guluiä lojreni.

<sup>18</sup>Guxhalä Xsprit Dxañä loj guiraa reni siädnañl narä.

Siniireni rediidx ni gudedä lojreni xcuent recos nani gajd gac.

<sup>19</sup>Suluiä lojtu balti senro xhaguibaa nájza lo guedxliuj. Resenro ni gac najc rejn̄ con guiboo, luxh guxh sire' si'c te za.

<sup>20</sup>Sicäjy loj gubijdx, sajc bäii si'c rejn̄.

Sajc guiraa recosre, dxejcru sidzujn̄ dxeduxh che jiälsacä narä, Dios.

<sup>21</sup>Dxejc guiraa rebejn̄ nani cueedx guiniab gacñäj Diosreni, reni'c siliaa lo dojl.

<sup>22</sup>Räjpp Pedr lojreni:

—Rexpejn̄ Israel, colcuadiajg xtidxä. Dios baluii Jesucrist, ben̄ Nazare't, lojtu por recosro, remilagwr, reseñ nani bejn̄ni nez lojtu. Lagajc Dios badeed yälrnibee loj Jesucrist te bejn̄ni redzunroga. La'tu nancheetu dee. <sup>23</sup>Galooli ananchee Dios xhi guntu loj Jesucrist Xi'nni. Basaanza Dios bateedtu Jesucrist ladzñaa rebenguidx te bacuaareni Jesucrist lo cruujz te bagu'treni.

<sup>24</sup>Baspañsac Dios Jesucrist, baslaa Diosni ladznaa yälgujt, sa'csi di niajcdi nica' yälgujtni par tejpas, sa'csi laani rnibee lo yälgujt. <sup>25</sup>Che gubansac Jesucrist, guzojb diidx ni bacuaa David lo guijtz xcuent Jesucrist. Räj̄p David lo Dios:

Guira dxej ruhuiä lojlu, Dios.  
Suga'lu xladbeä cayacnäjl̄u narä te di guidxejb lastoä.

<sup>26</sup>Ni'cni bibalajz lastoä, guniäza lojlu lacti rbaa lazá.  
Rbalazä sa'csi suhuiilu narä che guetä.

<sup>27</sup>Dizalu gusaan jia'n xaimä nen̄ baa.  
Dizalu gusaan gudx tiejxh xi'nlu nani sanälajzlu.

<sup>28</sup>Abaluiilu loä xho guibanä par tejpas.  
Sibalazduxhä sa'csi guibannä́ä luj,

si'c räj̄p David xcuent Jesucrist.

<sup>29</sup>Räj̄p Pedr:

—Guyasi guiniä lojtu agujc xchero gujt David. Aguyutzu'tzni nen̄ baa. Sajc guihuiinu baa cadro biga'tz David. <sup>30</sup>Gunii David xtidx Dios. Che nabaj̄nli David bia'n diidx gudeed Dios te xajgni ni guirilaj Crist, luxh laani gacni reii si'cni gujc David. <sup>31</sup>Sa'csi baluixгаа Dios recosre lo David, ni'c räj̄p David sibansac Crist lo rebengut sa'csi di Dios gusaan jia'n xaimni nen̄ baa, dizani gusaan gudx tiejxhni.

<sup>32</sup>Guläs Dios Jesucrist lo rebengut. Nuure bahuiloonuni, najcnu testiigw gubansacni lo rebengut.

<sup>33</sup>Gurejdx Dios Jesucrist. Naj nabaj̄n Jesucrist xhaguibaa, nabejni xladbee Dios ro'c canibeeni. Badeed Dios Xsprit Dxanni loj Jesucrist

si'cni bia'n diidx. Naj abaxhal Jesucrist Sprit Dxan lo guedxliuj. Jesucrist cayujn guira'ti nani cahuiitu, nani cayejn diajgtu nadxej.

<sup>34</sup>Di David nij xhaguibaa, sa'csi lagajc David räj̄p:

Gunii Dios lo Dad nani rnibee loä: “Gurej xladbeä

<sup>35</sup>che guidzuj̄nli dxej gudzugä guiraa reni rdxe'ch lojlu te gacbeereni luj rnibeelu guira'ti.”

<sup>36</sup>Rniliäpac lojtu —räj̄p Pedr—. La'tu bacuaatu Jesús lo crujz. Ni'cni, colgacbee, guiraatu xpen̄ Israel, abejn Dios gac Jesúsre Dad nani rnibee loonu.

<sup>37</sup>Che biejn diajgreni laareni bacuaareni Jesús lo crujz, guchuinduxh lajzreni. Räj̄preni lo Pedr näjza lo reapost ni suga' ro'c: —Aiilu, resa'nu, ÷xhini'c jiennu naj?

<sup>38</sup>Dxejcti räj̄p Pedr lojreni:

—Colgusiech lajztu, colguibrobnisza, sa'csi ni'c najc te seen rlaiztu chanajltu Jesucrist, te si'c jia xtojltu. Dxejc suniidx Dios Sprit Dxan cuääz nen̄ lastootu.

<sup>39</sup>Si'c rlaiz Dios guniidx Xsprit Dxanni lojtu näjza loj rexi'ntu, näjza lo rebejn̄ ni rbäjz zijtru, näjza loj guiragajc rebejn̄ nani cueedxni —si'c gunii Pedr lo rexpejn̄ Israel.

<sup>40</sup>Dxejcru gunii Pedr xhidajlru diidx, balijdxni rebejn̄:

—Colguirii loj reben̄ latsiaj ni re' lo guedxliuj naj, te laatu lo dojl.

<sup>41</sup>Xhidajlreni huililajz rediidxga. Dxejcti gurobnisreni sa'csi huililajzreni xtidx Dios. Lagajc dxejga huililajz si'cti chon̄ mil̄ bejn̄. <sup>42</sup>Sanuutis rusoobreni diidx

ni baluui reapost, bibalazduxhreni sa'csi bidxaaag sa'reni con rexpejn Jesucrist, gudaunäj sa'reni si'c gudaunäj Jesucrist rexpejnpacni, bidojpreni tejsi lajt te guniireni lo Dios.

### Xho gubajñ rexpejn Jesucrist galoo

<sup>43</sup>Bidxeloduxh guiraa rebejn luxh bejn reapost redzunro, remilagwr. <sup>44</sup>Bichaag sa' renani huililajz xtidz Dios. Bachagsa'reni xhixtenreni te tejsi gojpreni guiraa xhixtenreni. <sup>45</sup>Bato'reni xhixtenreni, dxejcti badeedreni meel lo sa'reni si'ctis ni caquiin chutis tejreni. <sup>46</sup>Guixe-guixee bidojpreni nen guidoro xten Israel. Tejsi najc rexhigabreni. Gudaunäj sa'reni rolijz cadetejreni, guiraareni bibalaznäduxh sa'reni. <sup>47</sup>Gulä'preni xpala'n Dios. Guiraa rebejn gunii rexpejn Jesucrist najc beñsa'c. Guixe-guixee batie' Dios xhidajlru bejn nani rililajz xtiidxni, badzucajni rextojlreni, dxejc bachaagreni lo rexpejn Jesucrist.

### Biajc niguii nani racxhuu ni'ni

**3** Guyu' te dxej säa Pedr näjza Juan nez loj guidoro si'cti rcachon gudxej. <sup>2</sup>Guyu' te niguii nani racxhuu ni'ni, digacdi sani che gojllini. Guixe-guixee rile'c bejn niguiiga ro' puertroga xten guidoro. Puertroga laa Sacru'. Ro'c rbejni rniabni gojn lojreni riu' guidoo. <sup>3</sup>Che bahuiini agojl jiu' Pedr näjza Juan nen guidoroga, gunabni te gojn lojreni. <sup>4</sup>Dxejcti bahuii Pedr näjza Juan lojni. Räjpej Pedr lojni: —iBahuii loonu!  
<sup>5</sup>Che biejn diajg niguiiga xtidz Pedr, bahuiini lojreni sa'csi naani sudeedreni meel lojni.

### <sup>6</sup>Räjpej Pedr lojni:

—Xhetliidi meeldi rapä, nani rapätis sunidxä lojlu. Xcuent xcälrnibee Jesucrist, beñ Nazare't, rniä lojlu: iGusulii! iGusaj! —räjpnii.

<sup>7</sup>Dxejcti gunaaz Pedr naani, guläsnini. Biligajc ni'ni, gusutijp ni'ni. <sup>8</sup>Huisuyäl'ni, gusajni. Biunäjni Pedr näjza Juan nen guidoro. Rsiajni, rtiäsni, calä'pni xpala'n Dios. <sup>9</sup>Bahuii xhidajl bejn lojni nen guidoro, rsiajni, calä'pzani xpala'n Dios. <sup>10</sup>Biembeereni laa niguii ni rbej ro' puertro xten guidoro, rniabni gojn. Guiraareni bidxeloduxhreni bahuiireni xhi gusajc niguii ni gucxhuu ni'ni.

### Baluui Pedr xtidz Dios nen cordoor xten guidoro

<sup>11</sup>Ro' guidoroga yu' te cordoor ni laa Cordoor xten Salomón. Ro'c suga' Pedr näjza Juan, naztzu'tz niguiiga naareni. Ruxun guiraa rebejn bidzujñ nen cordooroga. Bidxelojreni sa'csi arsiyaj niguii ni gucxhuu ni'ni. <sup>12</sup>Che bahuii Pedr lo rebejn räjpni lojreni:

—¿Xhicuent rdxeloy guejbtu, rexpejn Israel? Pet naatu nuure basiajcnu ni' niguiire. Xhet nuudire basiajcnu ni'ni. Xcuent xcälrnibee Jesucrist biajc ni' niguiire. <sup>13</sup>Xtiooznu, ni najc Xtiooz toxtadgoldoonu Abram, toxtadgoldoonu Isaac, näjza toxtadgoldoonu Jacoob, lagajc Diosga abadeed yäl'rnibee loj Xi'nni Jesús. Niluxh la'tu bateedtuni ladznaa reguxhtis. Che rlanj Pila't ni rnibee nuslaa Jesucrist, ditu nicäjb niriini, alga guniyajtuni nez loj Pila't. <sup>14</sup>Niluxh la'tu baro'ntu

Xi'n Dxan xten Dios nani rujn ganax dzunsa'c. Alga gunabtu birii te niguii nani bagu't bejn. <sup>15</sup>Jesucrist rudeed yäl nabajñ, luxh la'tu gunabtu bacuaareni Jesucrist lo crujz. Gulässac Dios Jesucrist lo rebengut. Bahuiloonu nabajñ Jesucrist, najcnu testiigw gubansac Jesucrist lo rebengut. <sup>16</sup>Cahuiitu loj niguiire nani gucxhuu ni'ni, luxh rumbeetuni. Xcäl rñibee Jesucrist abasiajc niguiire, sa'csi huililajzni. Sa'csi huililajznu xtidx Jesucrist, ni'c biajenci te najcni si'cni rhuiituni ñaj.

<sup>17</sup>Rexpejn Israel, narä nanä di'tu niacbee, diza rexcuxhtistu niacbee laa Xindxan xten Dios ni bacuaatu lo crujz. <sup>18</sup>Scree gujc te guzojb xtidx Dios ni cuaj lo guijtz agujc xchero. Diidxre bacuaa reniguii ni gunii xtidx Dios, Crist xten Dios sidejd trabajwduxh. <sup>19</sup>Ni'cni colsiechljajztu, colguibi' loj Dios te guibicaj xtojltu. Dxejc susiäluyj Dios lastootu, sujnni gac nacoob guira'ti, si'cni bia'n diidx gacni. <sup>20</sup>Lojtu suxhalza Dios Jesucrist nani rnibee, nani aguleni galooli. <sup>21</sup>Ñaj nunğäjñ jia'n Jesucrist xhaguibaa dxejli guscoob Dios guiralii recos si'cni bia'n diidx gac, si'cni gunii Dios lo reniguii nani gunii xtiidxni lo retoxtadgoldootu agujc xchero. <sup>22</sup>Scree gunii to Moisés lo retoxtadgoldoonu, räjpni: "Xtadnu Dios suxhal te niguii sa' narä nani cueni lo resa'tu. Siniini xtidx Dios. Colgusobdiajg guiralii diidx nani guiniini lojtu. <sup>23</sup>Renani di gusoob rextiidxni, sinitlojreni, direni gac rexpejn Dios."

<sup>24</sup>Räjpza Pedr:

—Sigajcza agunii guiralii reniguii nani gunii xtidx Dios. Si'c agunixгаа to Samuel, näjza guiraa reniguii ni siädñajñi, xcuent recos ni cayajc neñ redxejre. <sup>25</sup>La'tu najc xajg reniguii ni gunii xtidx Dios. La'tu biannäjtu diidx nani gunii Dios loj retoxtadgoldoonu. Bia'n diidx, räjp Dios loj toxtadgoldoonu Abram: "Jiädñajñ te xajglu ni gupalazduxh reben guedxliuj, sa'csi suslaanireni lo dojl." <sup>26</sup>Dxejcti ganiddoo lojtu baxhañ Dios Jesucrist te guibaa lajztu che gusiejch lajztu, te na'cru guntu dojl —räjp Pedr.

#### Baluu Pedr näj Juan xtidx Dios loj reguxhtis

**4** Lañ ni caniiireni lo rebejn, ro'c bidzujñ rebixhojz xten Israel näjza nani rnibee lo resoldaad xten guidoro näjza resaduceos. <sup>2</sup>Bidxe'chduxhrene sa'csi cagulijdxrene rebejn, cayäjpreni: —Sibansac rebejn lo rebengut sa'csi gubansac Jesucrist lo rebengut.

<sup>3</sup>Gunaaz reguxhtisrene, biäureni sa'csi agudxej luxh abiäu jusgaad. Neñ latzgüiib barareni yäl.

<sup>4</sup>Xhidajñ reni biejn diajg xtiidxreni huililajz xtidx Dios. Si'cti gaii mil niguii huililajz xtidx Dios.

<sup>5</sup>Che bara yäl, bachaag sa' guiraa rebengool, renani rnibee guedx Jerusalén, näjza rebejn ni ruluii leii, <sup>6</sup>näjza Anás ni rnibee guiraa rebixhojz, näjza xpagojzni ni laa Caifás, näjza Juan, näjza Alejandro, näjza guiraa reniguii ni najc sa' rebixhozro ni rnibee. <sup>7</sup>Gunibeereni biäd Pedr näjza Juan gusuj galäiireni te gunabdiidxreni lojreni:

—¿Chu xcálrnibee rajptu? ¿Chu laj basá'ttu te basiajctu niguiire?

<sup>8</sup>Dxejcti sa'csi cayu Pedr diidx ni canii Sprit Dxan xten Dios nen lastooni, rájpní lojreni:

—Caniä lo guejbtu, reguxhtis nájza rebengool xten rexpejn Israel, <sup>9</sup>palga canabdiidxtu xhicuent gucnájnu niguii nani gucxhuu ni'ni, palga canabdiidxtu xho basiajcti niguiiga, <sup>10</sup>gusule'nu xcuent dee te gacbeetu te gacbeza guiraa rexpejn Israel. Xtidx Jesucrist najc yálrnibeduxh. Diidxga abasiajc ni' niguiire, xhet rajcdini suga'ni nez lojtu. La'tu abacuaatu Jesucrist lo cruzj, niluxh Dios guläsni lo rebengut. <sup>11</sup>Di'tu ninälajz xtidx Jesucrist. Laani najc si'c te guij nani rbäcajtu che runcheetu te yu'. Per Dios abejn najc Jesucrist si'c guij nani maazru nacs'a'c, nani guyu' squiin xte yu'. <sup>12</sup>Xtebtis Jesucrist ruslaa bejn lo dojl, ruti stee bejn lo guedxliuj nani baxhał Dios te guslaani bejn lo dojl —si'c rájp Pedr.

<sup>13</sup>Che biejn diajgreni xtidx Pedr, bidxelojreni sa'csi di Pedr nájza Juan guidxejb, dizareni guitujy. Dxejcti rájp rebixhojz ni sajcrú lo sa'reni:

—Direni ganduxh guijtjz, bejntisreni.

Dxejcti gucbeereni gusanäj redee Jesucrist, lojni bisieedreni. <sup>14</sup>Bahuiiza rebixhojz lo niguii ni abiajc ni'ni, suganäjni guiro'preni. Ro'cti xhetru gujcdi gunii rebixhojz sa'csi laaca bejnreni. <sup>15</sup>Dxejcti gunibee rebixhojz birii guidxojnreni telaad te bij rebixhojz diidx ensilaareni. <sup>16</sup>Rájpreni lo sa'reni:

—¿Xhi jiennäanu reniguiire? Guiraa reben Jerusalén anajn

xcuent dzunroduxhre ni cayujnreni. Digacdi gucuatzlaaznuni. <sup>17</sup>Per te di guire'ch xtidx Jesucrist ste'ca guejdx, do'o gulijdxnu guidxojnreni te na'c guiniirureni xtidx Jesucrist ste'ca guejdx.

<sup>18</sup>Huixisac rebixhojzreni. Dxejcti rájpreni lojreni:

—Na'c guluirutu xtidx Jesucrist, na'cru guiniitu xtiidxni.

<sup>19</sup>Dxejc gunii Pedr nájza Juan, rájpreni lojreni:

—¿Colguinii loonu chu xtiidx sajcrú guicuaadiaagnu? ¿Xtiidx la'tu, o xtiidx Dios? <sup>20</sup>Digacdi gusäunu ro'nu. Nanabpac gusule'nu diidx xcuent recos nani abahuiinu nájza rediidx ni abiejn diajgnu.

<sup>21</sup>Balidxsac rebixhojzreni te na'cru guiniireni xtidx Jesucrist. Dxejc baslaa rebixhojz guiro'preni, sa'csi xhetru niacijdi niujnreni lo Pedr nájza Juan, sa'csi canii rebejn bejnreni te dzunsa'c. Xhidajl rebejn gulä'pza xpala'n Dios sa'csi bahuiireni xhini'c gujc ro'c. <sup>22</sup>Sa'csi niguii ni basiajreni xcuent yálmilagwr agudejdni tiuu ijz.

### Guredx-gunab rexpejn Jesucrist lo Dios

<sup>23</sup>Che baslaa rebixhojz guiro'preni, gubi'reni lo sa'reni ni najc rexpejn Jesucrist. Bijreni diidx guiraa ni gunii reguxhtis xten rebixhojz nájza rebengool lojreni.

<sup>24</sup>Che biejn diajg rexpejn Jesucrist xtiidxreni, tejtis xhigab bejnreni guredx-gunabreni lo Dios, rájpreni:

—Xtadnu Dios, nani benchee xhaguibaa nájza guedxliuj nájza nisdoo nájza guira'ti ni yu' lojreni, nenreni, <sup>25</sup>nani bejn basoob



toDavid xtidx Sprit Dxan te bacuaani xtiidxlu, räjpnı:

¿Xhicuent guyuduxh reben guedxliuj yärsia'?

¿Xhicuent bejn rexpejn Israel xhigab ni xhet sajcdi?

<sup>26</sup> Bidxagsa' rereii lo guedxliuj näjza reguxhtis xten reguejdx te gudxojnreni xtzun Dios näjza xten Dad Crist nani baxhał Dios,

si'c gunii toDavid.

<sup>27</sup> 'Aguzojb diidxre, sa'csi lo guejdxre bidxagsa' Herodes näjza Poncio Pila't näjza rexpejn Israel näjza rebenzıjt nani di gac xpejn Israel. Bidxehnäjreni Xi'nlu nani najc Crist ni baxhällu. <sup>28</sup> Naj abejnreni dzunguijdx si'cni galooli guniilu gac. <sup>29</sup> Naj Guejblu Xtiosnu, bahuıi xho cagusacsıreni nuure, gucnäj nuure te gutiplaaznu, te na'c guidxeebnu guiniinu xtiidxlu, sa'csi najcnu rexpejnlu. <sup>30</sup> Baniidx xcälrnıbeelu loonu te guisıajcnu rebejn, te jienzanu redzunro, remilajgwr con xcälrnıbee Xi'ndxanlu Jesucrist.

<sup>31</sup> Che gulujx gurejdxreni lo Dios, gusloj canıbejz yu' cadro tre'reni, cayac si'c te xu. Dxejcti biääd Sprit Dxan xten Dios basutıjpruni lastooreni. Dxejc dirureni nidxıejb guniireni xtidx Dios.

#### Rudeedreni xhixtenreni lo sa'reni

<sup>32</sup> Guiraa renani huılılajz xtidx Dios, tejsi xhigab bejnreni. Rut chu tejdıreni bejn guıınıbexte xhixtenni: bachaagreni sa' rehxixtenreni te xca' guıraareni nani rquiınreni. <sup>33</sup> Gucnäj Dios reapost, gusutzu'tzreni bıjreni

diidx bahuılojreni loj Jesucrist che gubansacni lo rebengut. Gucnäj Dios guiraa rexpejn Jesucrist, luxh gopduxh reben guejdx respe'treni. <sup>34</sup> Ni'cla tejreni di niäädx xhixtenni sa'csi renani gojp xyujni, rolıjzıni, bato'renıni, dxejcti bıädınäreni xcuentni, <sup>35</sup> badeedreni meelga lo reapost. Dxejcti gudis reapost meelga lo guiraa renani rquiınni. <sup>36</sup> Guyu' te niguiı ni laa José. Lajdxni najc Chipre, ni re' lo nısdoo. Najcni sa' rexfamıl levıta. Reapost gulälajni Bernabé (ni säloj xtiidxreni bejn ni rbecdxı lajz sa'ni). <sup>37</sup> Scree gulälajrenıni sa'csi bato'ni te la' yuj xtenni, dxejcti badeedni meel ni cua'ni lo reapost.

#### Ananías näj chäälni rujn dojl

**5** Guyu' stee niguiı ni laa Ananías. Chäälni laa Safıra. Bato'reni te la' yuj. <sup>2</sup> Nıguiıre bıannäjni gala' meel, dxejc sgala' meelga badeedni lo reapost si'c guiraa xcuent yujga luxh chäälni nanchee xhi cayujnni. <sup>3</sup> Dxejcti räjıp Pedr lojni:

—Ananías, ¿xhicuent rısooblu xtidx Satanás ni rnıbee lo rebendxab, ä? ¿Xhicuent rlajzlu gısgueelu Sprit Dxan xten Dios? Bıannäjlu gaaı meel ni cua'lu che bato'lu te la' yuj. <sup>4</sup> Che gajdлу guto' yujga, xtenluni. Che bato'lu yujga, ¿la xhet xtendılu meel ni cua'lu? ¿Xhicuent bejnlu xhıgab nen lastoolu gunlu dee? Loj Dios guniilu didx-xhıı, xhet loodınu.

<sup>5</sup> Che bıejn diajg Ananías xtidx Pedr, bıajbni lo yuj, gujtnı. Bıdexbdıuxh rebejn che bıejn diajgreni xhi gııajcni. <sup>6</sup> Sas gubıg



gaii bi'n batejbreni Ananías  
neñ lajd. Dxejcti sanärenini  
huicua'tzrenini neñ baa.

<sup>7</sup>Pet agujc choñ or gujtni chela  
bidzujñ chääł Ananías. Dini gan  
agujt chääłni. <sup>8</sup>Räjp Pedr lojni:

—Gunii, ¿la bato'tu xyujtu si'cni  
naj chäällu huijni, ä?

Räjp Safira lojni:

—O'n, si'c huijni.

<sup>9</sup>Dxejcti räjp Pedr lojni:

—¿Xhicuent bejnlu tejsi  
xhigabguijdx con chäällu?  
¿Xhicuent rlanjtu gusguetu Sprit  
Dxan xten Dios? Ro lä' siääđ renani  
huicua'tz chäällu. Naj näjza luj  
chacua'tzreni neñ baa.

<sup>10</sup>Si'tcis biajb Safira, gutgajczani.  
Dxejcti bidzujñ rebi'n, bahuiireni  
agujtni. Dxejcti guläsreneni,  
biriireni huicuatgzajcneni  
cuä' baa cadro biga'tz chääłni.

<sup>11</sup>Bidxebduxh guiraa rexpejn  
Jesucrist, näjza guiraa rebejn nani  
biejn diajgni recosre.

### Bejn reapost xhidajł redzunro, remilagwr

<sup>12</sup>Xhidajł redzunro, remilagwr  
bejn reapost nez loj rebenguejdx.  
Nadxaag sa' rexpejn Jesucrist,  
caguchaagreni diidx neñ cordoor  
ni laa Salomón. <sup>13</sup>Guyu' xhidajł  
bejn ni di nuchaag lo rexpejn  
Jesucrist sa'csi bidxebreni  
guchaagreni lojreni. Rebenguejdxga  
guläpduxhreni xpala'n rexpejn  
Jesucrist. <sup>14</sup>Neñ redxejga  
xhidalduxh rebejn huililajz xtidx  
Jesucrist, niguii sigajc gunaa.

<sup>15</sup>Dxejcti gulääreni lo nezyuj rebejn  
nani cayacxhuu. Siädñä rebejn  
benracxhuu naga' lo da', te gaxäjsi

ted xpalaa Pedr yejcreni che ted  
Pedr ro'c, te si'c jiajcreni. <sup>16</sup>Guedx  
Jerusalén bidzujñ xhidajł rebejn  
ni siääđ ste'ca guejdx. Biädñäreni  
rebejn ni cayacxhuu näjza balti  
bejn ni yu' bendxab neñ lastooreni.  
Con xcälñibee Jesucrist basiajc  
reapost reben racxhuu, gulääzaren  
rebendxab neñ lastoo balti bejn.

### Gudejd reapost trabajw

<sup>17</sup>Dxejcti bidxechlajz bixhojz  
ni rnibee, näjza reniguii ni laa  
saducee, sa'csi calä'p rebenguejdx  
xpala'n reapost sa'csi basiajcreni  
reben racxhuu. <sup>18</sup>Gunaazreni  
reapost. Basäurenini neñ latzgüiib.  
<sup>19</sup>Niluxh yäälga, biääđ te angl  
xten Dios, baxhalni ro' latzgüiibga.  
Dxejcti gulääni reapost neñ  
latzgüiib. Räjpni lojreni:

<sup>20</sup>—Colchäj guidoro. Ro'c  
colguinii lo rebejn xho gac  
guibannäjreni Dios par tejpas.

<sup>21</sup>Che biejn diajgreni si'c,  
rsildooru biu'reni neñ guidoro, ro'c  
baluiireni xtidx Dios lo rebejn.

Dxejc bixhojz nani rnibee, näjza  
rebengool, bachagsa'reni gurejdxreni  
guiraa reguxhtis xten guidoo, näjza  
guiraa reguxhtis xten rexpejn  
Israel. Dxejcti gunibeereni jädnä  
reguixhajg reapost nani biäu neñ  
ladtgüiib. <sup>22</sup>Che bidzujñ reguixhajg  
latzgüiib, bahuii reguixhajg neñ  
latzgüiibga, niluxh rut yu'di neñ  
latzgüiib. Che gubi'reni biädñäreni  
diidx, räjpreni loj reguxhtis:

<sup>23</sup>—Che bidzunnu latzgüiib,  
niäudzu'tz ro' latzgüiib luxh  
resoldaad ni cayajp ro' latzgüiib  
suga' guiro'p laad. Che baxhalnu ro'  
latzgüiib, rut yu'di neñ latzgüiib.

<sup>24</sup>Che biejn diajg bixhojz ni rnibee, nájza capitán nani rnibee resoldaad xten guidoro, nájza rebixhojz, ben tio'p lajzreni, rájp lo sa'reni:

—¿Xhini'c gujc? ¿Xhoni gac naj? —rájpreni.

<sup>25</sup>Dxejcti bidzujñ te niguii, rájpreni lojreni:

—Reniguii ni basäutu neñ latzguuib, areni suga' neñ guidoro, luxh caguluiireni rebejn —rájpreni.

<sup>26</sup>Dxejcti sanä capitán xten resoldaad rexcuxhtis guidoro te biädnäreni reapost, luxh direni nusacsí reapost sa'csi rdxejbreni nucuaareni guij yejcreni. <sup>27</sup>Che bidzunnäjreni reapost, rájpreni suureni nez loj reguxhtis xten Israel, sas gunii bixhojz ni rnibee, <sup>28</sup>rájpreni loj reapost:

—¿Et agunibeenu lojtu na'cru guiniitu xtidx Jesucrist? Xhoxh naj cagutie'chtu rediidxga lo guiraa rebejn neñ guedx Jerusalén. La'tu rlajztu cuaquijtu nuure bagu'tnu Jesucrist.

<sup>29</sup>Dxejc rájp Pedr nájza reapost lojreni:

—Nanabpac gusoobnu xtidx Dios, lacuaa gusoobnu xtidx bejn.

<sup>30</sup>Bagu'ttu Jesucrist che bacuaatuni lo cruz. Niluxh Xtios xtdadgoldoonu guläsni lo rebengut. <sup>31</sup>Naj agule'c Diosni xladbeeni cadre rnibeeni, abadeedza Dios yälrnibee loj Jesucrist te guslaani nuure, te si'c rlajzni guibicaj xtojñ guiraa rexpejn Israel nani gusiechlajzreni.

<sup>32</sup>Bahuiloonu xhi bejn Dios. Ni'c cagusule'nu. Nadoncheenu Sprit Dxan xten Dios cayacnäj nuure te gusule'nu rediidxre. Badeed Dios

Sprit Dxan xtenni lo guiraa renani susoob xtiidxni.

<sup>33</sup>Che biejn diajg reguxhtis rediidxga, bidxechduxhrenei, rlajzreni nugu'treni reapost.

<sup>34</sup>Dxejcti huisulii te niguii ni laa Gamaliel, nani najc te farisee nani ruluii leii xten Israel, rebejn rapduxh respe't dade'ga. Gunibee Gamaliel guirii reapost neñ yu'ga.

<sup>35</sup>Dxejcti rájp Gamaliel lo rebixhojz:

—Guejbtu rexpejn Israel, colyensa'c xhigab xhini'c rlajztu gunnäjtu reniguiire. <sup>36</sup>Colzaa lajztu gajd gac xchej guyu' tej ni laa Teudas, rájpreni rnibeduxhni. Dxejc huinajñ tajp gayuu bejn. Che bagu'trenini, bire'ch guiraa rexpejn, xhetru bejndireni. <sup>37</sup>Neñ ijz ni guyu' cens, biriiza Judas ni siäd Galilee. Dxejc gurejdxni xhidajñ bejn ni huinajñ. Bagu'tza bejn, dxejcti bire'chza guiraa reni huinajñ. <sup>38</sup>Naj rniä, colguibicaj, colgusaan reniguiire, rexpejn Jesús. Palga guejbcareni cayujnreni dzuunre, xtebcani sinitlojni.

<sup>39</sup>Palga xtzuum Dios ni cayujnreni, digacdi guscuääznu dzuunga, sa'csi guidiñnu guidxe'ch Gueb Dios loonu.

<sup>40</sup>Bichagljaz rebixhojz xtiidx Gamaliel. Gurejdxreni reapost, dxejcti gudijnreni reapost, gunibeereni loj reapost na'cru guiniireni xtidx Jesús. Dxejc baslaarenini. <sup>41</sup>Biriitireni nez loj rebixhojz. Cabaduxh lajzreni sa'csi gujc gudejdreni trabajw xcuent Jesucrist. <sup>42</sup>Guixe-guixee lañtis baluiireni xtidx Jesucrist neñ guidoro nájza rolijz bejn. Cagusule'reni diidx lo rexpeñ Israel:

—Jesús najc Crist nani cabääztu jiaäd.

**Gulereni reniguii ni gudeed  
yätxtiil lo rexpejn Jesucrist**

**6** Nen redxejga, xhidalro gujc rexpejn Jesucrist. Niluxh gusloj camojm rexpejn Jesucrist nani rnii didx griegw. Räjpreni:

—Xhet laadi cayujn rebejn ni rnii didx hebreo. Rebiuud nani rnii didx hebreo rca'ru loj rexpuiudnu. Rebiuud ni rnii didx hebreo rca'ru xhi gaureni che rguisreni xhi gau rebiuud guixe-guixee.

<sup>2</sup>Dxejcti batie' guitzubitio'p reapost guiraa rexpejn Jesucrist, räjpreni lo guiraareni:

—Et laadi guisaannu guluiinu xtidx Dios te quisnu xhi gau rebiuud. <sup>3</sup>Ni'c nanab cuetu lo resa'tu gajtz niguii nani najntu najc beŋsa'c, nani rbäjz Sprit Dxan xten Dios nen lastooreni, nani yu' xcäriejnreni. Reniguiire quis xhi gaureni. <sup>4</sup>Te si'c sajč chanuutis guiniabnu lo Dios, guiluiizanu xtidx Dios lo rebejn.

<sup>5</sup>Guiralii rebejnga bidxagljazreni diidxga. Dxejcti gulereni Esteban, te niguii ni rilalajzpac xtidx Dios, rbäjzza Sprit Dxan xten Dios nen lastooni. Gulezareni Felipe, Prócoro, Nicanor, Timón, Parmenas; gulezareni Nicolás nani siääd guedx Antioquía. Nicolás najc te proselite, nalajznu, dini gac xpejn Israel, per basoobni xleii toMoisés che gajdni chalilajz xtidx Jesucrist. <sup>6</sup>Sas biädnä rexpejn Jesús guigajtz niguiiga lo reapost. Dxejcti guredx-gunab reapost lo Dios xcuent reniguiiga, batzuebreni ñaareni

yejc reniguiiga si'c te seen abiu'reni lo xtzuunreni.

<sup>7</sup>Birechduxh xtidx Dios. Xhidajl beñ Jerusalén huililajz xtidx Dios, nájza xhidajl bixhojz.

**Gunaazreni Esteban sanärenini  
lo rebixhojz nani rnibee**

<sup>8</sup>Gucnäduxh Dios Esteban, bejnini redzunro, remilagwr nez lo rebejn.

<sup>9</sup>Dxejc reben guidoo ni laa Libertadores gusloj cadilñaj Esteban. Lojreni nadxaag beñ Cirene, nájza beñ Alejandría, nájza gaii beñ Cilicia, nájza sgaii bejn ni siääd reguedx Asia.

<sup>10</sup>Reniguiire di niajcdi nuzejcreni diidx lo Esteban, sa'csi nasinduxhni, luxh cayacñaj Sprit Dxan xten Diosni.

<sup>11</sup>Dxejcti baquilreni sgaii niguii ni di gac xpejn Jesús, te räjpreni:

—Biejn diaagnu caniyaj Esteban toMoisés nájza Dios.

<sup>12</sup>Scree gujc bache'chreni rebejn nájza rebejn ni ruluu leii nájza rebengool. Dxejcti bachagsa'reni, gunaazreni Esteban. Huinärenini lo reguxhtis xten Israel. <sup>13</sup>Dxejcti biädnäreni reniguii nani baquilreni te guniireni didx-xhii. Räjpreni:

—Entis rniyaj Esteban leii xten toMoisés nájza guidodxanre.

<sup>14</sup>Abiejnza diaagnu gunii Esteban: “Jesús nazareno sutzujl guidoro, suchaazani leii nani baniidx toMoisés loonu.”

<sup>15</sup>Dxejcti guiraa rebejn ni sobga' ro'c bahuireni lo Esteban, bahuireni rujn lojni si'c rujn loj te angl xten Dios.

**Diidx ni basule' Esteban lo rebixhojz**

**7** Dxejcti räjpreni te bixhojz nani rnibee lo Esteban:

—¿La gulii si'c guniilu, ä?

<sup>2</sup>Räjp Esteban lojreni:

—Colgucua diajg rextidxä, guebttu dad, näjza resa'ä. Xtioznu ni sacduxh, ni rnibee, baluiloj lo toxtadgoldoonu Abram che guläjzni Mesopotamia, che gajdni chaläjz nen guedx Harán. <sup>3</sup>Räjp Dios loj toAbram: “Birii lajdxtu, basa'n guiraa resa'lu. Huij cadrotis guluiä lojlu” <sup>4</sup>—räjp Esteban—. Dxejcti birii toAbram lajdx reCaldeos. Huiläjzni guedx Harán. Che gujt xtadni, biädnä Dios toAbram nez ree, cadro rbääznu naj. <sup>5</sup>Di Dios nuzalajz nicla tla' yuj cadro suu te ni' toAbram. Niluxh räjp Dios sudeedni yujga lo rexajg toAbram, jiannäjreni yujga che guet toAbram. Niluxh nicla gajd xi'n toAbram chu dxejc. <sup>6</sup>Stee huält räjp Dios lo toAbram: “Rexi'nlu, rexagdoolu, siläjzreni si'c benzijt. Ladxbejn gacreni mos, ro'c susacsí bejnreni si'cti tajp gayuu ijz.” <sup>7</sup>Räjp Dios: “Narä sunä castiigw rebejn ni gusacsíreni che najczeni mos. Narä cuää rexagdoolu ro'c, te ree guzuxhijbreni loä nen guejdxre”, si'c räjp Dios <sup>8</sup>—räjpza Esteban—. Dxejcti si'c bia'n Dios diidx con toAbram, gunibee Dios gutiuug Abram lagajc laani, te chuni bee; ni'c najc te seen xten diidx ni bia'n Dios con Abram. Guyu' te xi'n toAbram, ni laa Isaac. Che guyu'ni xhujn dxej, basälza toAbram beegani si'c te seenza. Sigajcza bennäj Isaac xi'nni Jacob. Sigajcza bennäj Jacob guitzubitio'p rexi'nni nani najc rexpengoldoo xpen Israel.

<sup>9</sup>Räjp Esteban:

—Guitzubiteb rexi'n Jacob guyu' te yälrudxojn lo bejtzreni

José. Dxejc bato'reni José lo te beñ Egipto. Dxejc Dios goptzu'tz José.

<sup>10</sup>Che gudejd José trabajwduxh, gucnäj Diosni. Badeed Dios yälñasinduxh lojni. Bejn Dios bichagljaz reii Faraón José. Badeed reii Faraón gujcn gubernadoor xten Egipto. Gunibeeza José guira'ti xhixten reiiga.

<sup>11</sup>Räjpza Esteban:

—Che bidzujn dxej gujc te gubijn, guiraa nen reguedx Egipto näjza guiraa nen reguedx Canaán, trabajwduxh cadejd guiraa rebejn. Xhet guyu'di xhi niajw retoxtadgoldoonu. <sup>12</sup>Che biejn diajg xtadgoldoonu Jacob yu' xhi gaureni nen reguejdx xten Egipto, ro'c baxhalni rexi'nni, bica'reni xhi gaureni te huält. <sup>13</sup>Che huijreni stehuält, dxejc bazäbdiidx José lojreni laani najc bejtzreni. Biembeza Faraón resa' José.

<sup>14</sup>Dxejcti baxhal José diidx jiääd xtadni Jacob, näjza guiraa resa'ni, cuääzreni Egipto. Najc rebejnga si'cti gayonbitzubigaii bejn. <sup>15</sup>Si'c gujc te huij Jacob guedx Egipto. Ro'c guläjzni, ro'c gujtnei. Ro'c gujtza retoxtadgoldoonu. <sup>16</sup>Dxejcti huinäreni rextzujtreni loj Siquem te biga'tzsacreni nen baa nani gusii toxtadgolnu Abram lo rexi'n Hamor nen guedx Siquem.

<sup>17</sup>Räjp Esteban:

—Che bidzungajxh dxej, si'c diidx ni bia'n Dios con toxtadgoldoonu Abram, bidalduxh rexpengoldoonu nen guedx Egipto. <sup>18</sup>Dxejcti guyu' te xreii Egipto ni di gan guiraa redzunsac nani bejn toxtadgoldoonu José. <sup>19</sup>Reiiga basgueeni rexpengoldoonu,

basacsínireni, trabajwduxh bateedni rexpenggoldoonu. Gunibee reiiga basälreni guiraa rebáz niguii te di laareni, te guetreni. <sup>20</sup>Neñ redxejga, gojl Moisés. Che gujc Moisés báz, te báz daani, saru rujn lojni, huinälajz Diosni. Gułaani choñ bäi rolizjni. <sup>21</sup>Dxejc huisälrenini, te guzobj xtidx Faraón. Dxejc lagajc xindx'a'p Faraón bidxälni Moisés, cua'nini baslaanini si'c xi'nni. <sup>22</sup>Bisieed Moisés guiraa ni najn reben Egipto. Gunisa'cni diidx, bensa'cni dzuun.

<sup>23</sup>Räjp Esteban:

—Che guyu'ni tiuu ijz, banaj lajzni resa'ni ni najc xpejn Israel, huijni cadre rbäjzreni. <sup>24</sup>Dxejc bahuiini casacsí te ben Egipto te ben sa'ni. Sas bagu'tni ben Egipto. <sup>25</sup>Bejn Moisés xhigab pet sacbee resa'ni cayacnäj Diosni te guslaani rexpeljnni. Luxh di resa'ni niacbee si'c. <sup>26</sup>Che bara yäl, bahuii Moisés cadilnäj sa'reni tiop xpen Israel. Räjp Moisés lojreni: “Colcuedxi, Dad. Lagajc sa'tu cadilnäjtu. ¿Xhicuent rdijltu?” si'c gunii Moisés, te na'cru tilnäj sa'reni. <sup>27</sup>Dxejcti nani cayunniälajzga, balanaani Moisés, räjpni loj Moisés: “¿Chu baniidx yälrnibee lojlu te jädnibeelu nuure?” <sup>28</sup>¿La rlaizlu ju'tlu narä si'c bagu'tlu ben Egipto naii?” —räjpni—. <sup>29</sup>Che biejn diajg Moisés rediidxga, baxunni, huijni zijt. Huiläzsiycni guedx Madián. Ro'c bachnaani, guyu' tiop xingaanni.

<sup>30</sup>Räjpza Esteban:

—Che gudejd tiuu ijz, bidzujn te dxej cansajni nez lo reyubjdz ni naga' guideb gabi dajn ni laa

Sinaí. Ro'c bahuiini te bajl nen te yaguejch. Nen bajlga baluiloj angl xten Dios lo Moisés. <sup>31</sup>Bidxeloduxh Moisés che bahuiini si'c. Dxejcti gubigni te rlaizni nuhuisa'cni yajgga. Dxejc biejn diajgni gunii Dios, räjpni lo Moisés: <sup>32</sup>“Narä nacä Xtios rextadgoldoolu, narä nacä Dios xten Abram, näjza xten Isaac näjza xten Jacob.” Dxejcti guceez Moisés sa'csi bidxebduxhni, diruni nuhuisa'c yajgga. <sup>33</sup>Dxejcti räjp Dios lojni: “Gulää xcura'chlu. Yuj cadre suga'lu najc dxan, sa'csi narä yu'ä ree. <sup>34</sup>Abahuiä xho cagusacsí reben Egipto rexpensä. Abiejn diagä xho roonreni. Naj abiälä te guslää rexpensä. Gudaa naj, suxhalälu chäälü Egipto.”

<sup>35</sup>Räjp Esteban:

—Dios badeed yälrnibee lo Moisés nani baze' rextotadgoldoonu che räjpreni: “¿Chu baniidx yälrnibee lojlu te jädnibeelu nuure?” Baxhal Dios Moisés te guinibeeni xpejn Dios, gucnäjza Dios Moisés basläänni rexpeljnni nen nación Egipto si'c gunii angl xten Dios che baluilojni lo Moisés nen yaguejchga. <sup>36</sup>Gulää Moisés rebejnnga. Ganiddoo bejn Moisés redzunro, yälrdxeloj nen nación Egipto näjza ro' nisdoo ni laa niso xniaa. Tiuu ijz cuansaj rextotadgoldoonu nen yubjdzroga, ro'c bejnza Moisés redzunro, remilagwr. <sup>37</sup>Lagajc Moisésre gunii xtidx Dios che räjpni loj rexpelj Israel: “Sibe Dios lo rexajgtu te niguii ni najc sigac narä. Siniini xtidx Dios. Colgusoob xtiidxni.” <sup>38</sup>Lagajc Moisés guyunäj rebejn nen yubidzro. Xangl Dios guninäj Moisés nen dajn xten Sinaí. Dxejcti

badeed Moisés rediidx ni gunibee Dios lo retoxtadgoldoonu. Laareni basa'nreni diidxga loonu.

<sup>39</sup>Räjp Esteban:

—Niluxh di retoxtadgoldoonu nusoob rextidx Moisés. Di rlanjreni gunibee Moisésreni. Canaduxhlajzreni nación Egipto. <sup>40</sup>Che sää Moisés dajn Sinaí, räjpreni loj Aarón bejtz Moisés: “Benchee banäjb gac xtiooznu, te nidreni loonu, te chanajlnureni. Chu gan con Moisésre ni baluui nezyuj che gulääni nuure guejdx reEgipto.”

<sup>41</sup>Sas bencheereni te banäjb ni najc si'c te gonbáz. Dxejcti bagu'treni guidxaa te badeedreni rejnga lo banäjb te bazuxhijbreni lojni. Bibalazduxhreni sa'csi abencheereni banäjbga. <sup>42</sup>Dxejcti gubicaj Dios loj rexpejn Israel sa'csi bejnreni si'c. Basaan Dios gojnreni gubijdx, näjza bäii, näjza rebal xhaguibaa. Gujcti si'cni caj lo gujtz ni bejn reniguii nani bacuaa rextidx Dios. Räjp Dios:

La'tu beñ Israel, cheni cuansajtu tiuu ijz nez lo reyubijdz, ðla par narä bagu'ttu guidxaa, ä?

ðLa loä baniidxtu xtiejnreni, ä?

<sup>43</sup>Xho gacni si'c, räjp Dios.

Cuansanjtu te yu' najcw guijd cadro chu te banäjb.

Nenga guyu' banäjb ni laa Moloc, nani najtu najc xtioostu.

Gojn̄zatu balbäze' xten xtioostu ni laa Remfán.

Redios ni bencheetistu reni'c gojntu.

Ni'cni sibää la'tu ree guxhalä la'tu stelaad guedx Babilonia.

<sup>44</sup>Guniiru Esteban, räjpni lojreni:

—Neñ reyubijdz gojp retoxtadgoldoonu te yu' najcwni guijd. Gujcti xquidooreni. Ro'c guninäjreni Dios. Benchee retoxtadgoldoonu yu' najcw guijdga si'cni gunibee Dios che baluui lo Moisés xhoni gacni. <sup>45</sup>Che gujt Moisés, Josué gunibee lacuaa toMoisés, huinäni retoxtadgoldoonu nación Canaán. Batzujlreni yuro ni najcw guijd te näj ni'c huinäreni Canaán. Gulää Dios rebejn ni guläjz neñ reguedx Canaán. Dxejcti bia'n retoxtadgoldoonu neñ reguejdxga. Bazuxhijbreni lo Dios neñ yuguijd ni najc xquidooreni che gojlli xtiemp reii David. <sup>46</sup>Huinälajz Dios David. Räjp David lo Dios: “Rlazä gunä te guidoo par guejblu, Dios xten nuure, rexpejn Israel.” <sup>47</sup>Dxejcti di Dios nusoob xtidx David. Alga Salomón, xi'n David, ni'c benchee xquidoro Dios. <sup>48</sup>Naj di Dios guiquiin te yu' nani runchee bejn. Scree bacuaa te niguii nani gunii xtidx Dios. Räjp Dios:

<sup>49</sup>Si'c najc te yagxhilsa'c cadro rnibee reii, si'c najc xhaguibaa cadro rbeä. Si'c te bancw cadro rsiuj ni' reii, si'c najc guedxliuj nani bencheä.

Dina guiquinä guncheetu te xyu'ä.

Dina guiquinä te lajt cadro gusilazä, räjp Dios.

<sup>50</sup>ðLa et naädi benchee guiraa nani ruhuiitu?, räjp Dios.

<sup>51</sup>Räjp Esteban lojreni:

—Te beñ nadduxh najctu. Ditu jiu xtidx Dios. Niäu lastootu, niäuzä diajgtu. Di'tu chanälajz xtzuum Spirit



Dxan xten Dios, dizani cuääz neñ lastootu. Si'c bejn retoxtaggoldootu, si'cza rujntu. <sup>52</sup>Basacsí retoxtaggoldootu guiralii reniguii nani gunii xtidx Dios. Nicla tejni direni niu. Bagu't retoxtaggoldootu guiraa reniguii nani gunii siääd te niguidxan xten Dios. Naj abiääd niguidxanga, Jesucrist laani, luxh la'tu huinätuni lo guxhtis te gunibeetu gujtni. <sup>53</sup>La'tu biannäjtu leii nani gunii reangl xten Dios loj Moisés, luxh la'tu ditu nucuadiajg rediidxga.

#### Bagu'treni Esteban

<sup>54</sup>Che biejn diajgreni rextidx Esteban, bidxe'chduxhrenei, rauya' läijrenei sa'csi rdx'e'chrenei lo Esteban. <sup>55</sup>Rbäjz Sprit Dxan xten Dios neñ lastoo Esteban, ni'cni bahuiztu'tzni xhaguibaa, ro'c bahuini yälrdimbichasejz xten Dios. Bahuiizani suga' Jesucrist xladbee Dios. <sup>56</sup>Räjz Esteban lojrenei:

—Colhuilaa. Narä cahuiä xhaguibaa cadro yu' Dios, ruhuiäza loj Xi'n Dios nani gujc Niguii; ani suga' xladbee Dios.

<sup>57</sup>Guredxaduxhrenei basäuzareni diajgreni. Dxejcti baxunrenei bixa'treni yejc Esteban. <sup>58</sup>Dxejc gudobyujrenini, guläärenei Esteban neñ guejdxga. Ro'c bacuaareni guij yejc Esteban. Che cagucuaareni guij yejcti, guläyareni xhajbreni; te niguii ni laa Saulo biannäj xhajbreni. <sup>59</sup>La' ni cagucuaareni guij yejcti, gunii Esteban loj Jesucrist räjpni:

—Guejblu, Dad Jesucrist, cua' narä.

<sup>60</sup>Dxejcti białb Esteban, bazuxhijbni, guredxa'ni räjpni:

—Dad Jesucrist, na'c gudzuublu dojlre yejc rebejnre, na'c gucuaquijlureni.

Gulujxsi guniini si'c, gujtni.

#### Saulo basacsí rexpejn Jesucrist

**8** Rbaduxh lajz Saulo bagu'treni Esteban.

Lagajc dxejga gusloj gudejd rexpejn Jesucrist trabajwduxh neñ guedx Jerusalén. Dxejcti bire'ch rexpejn Jesucrist. Biunejzrenei ro'c sääreni nez guiraa reguedx Judea näjza nez guiraa reguedx Samaria. Xtebtis reapost bia'n Jerusalén, direni nire'ch.

<sup>2</sup>Reniguii nani sanälajz Dios huicua'tz Esteban. Cayonduxhrenei sa'csi riareni gujt Esteban. <sup>3</sup>Biäädza Saulo, guixe-guixee basacsíni rebejn nani huililajz xtidx Dios. Biu'ni rolizrenei, gunaazni reniguii näjza regunaa te basäunireni neñ latzguuib.

#### Basule' rexpejn Jesucrist xtidx Dios nez región Samaria

<sup>4</sup>Che bire'ch rebejn nani huililajz xtidx Dios, basule'reni xtidx Dios nez cadrotis sääreni. <sup>5</sup>Tej rebejnnga laa Felipe. Siini nez te guedx Samaria. Ro'c basule'ni xtidx Dios. Räjpni:

—Jesús najc Crist nani cabäjztu jiääd.

<sup>6</sup>Ro'c bachagsa' rebejn bacuadiajgreni rextidx Felipe, bahuizareni redzunro, remilagwr nani bejn Felipe. <sup>7</sup>Gaii bejn yu' bendxab neñ lastooreni. Che gunibee Felipe guirii rebendxab lastoo rebejnnga, guredxa' rebendxabga, dxejcti biriireni



neñ lastoo rebejn̄ga. Yu'za xhidajl bejn̄ nani digacdiru guiniib, yu'za reni rajc ni'reni, ñaareni. Con xcäl̄rnibee Jesucrist basiajc Felipe guiraa rebejn̄ga. <sup>8</sup>Sa'csi gujc si'c, bibalazduxh guiraa rebejn̄ neñ guejdxga.

<sup>9</sup>Guyu' te niguii ni laa Simón neñ guejdxga. Bisieedni bejn̄ni xhidajl redzuun yäl̄bidxaa, basgueeni rebenguejdxga. Bidxeloduxh rebenguejdx lojni. Räjpn̄i lo rebejn̄ rutru chu stee bejn̄ ni najc maazru beñro lojni. <sup>10</sup>Luxh guiraa rebejn̄, rebiuux, rebengool, rebenrajp, rebenproob bacuadiajgreni xtidx bidxaaga, räjpreni:

—Laani rajpn̄i yäl̄rnibee xten Dios.

<sup>11</sup>Xchero basgueeni rebejn̄, bidxelojreni rextzunyäl̄bidxaani. Guiraa rebejn̄ huililajz xtiidxni.

<sup>12</sup>Dxejcti baluii Felipe xcuent xcäl̄rnibee Dios, näjza xcuent Jesucrist. Xhidajl rebenguejdxga huililajz rediidx nani gunii Felipe. Dxejcti birobnisreni, niguii näjza gunaa. <sup>13</sup>Nägajcza Simón huililajz rediidxga dxejc gurobniszani. Dxejc guyunäj Simón Felipe. Che bahuii Simón lo redzunro, remilagwr nani cayujn Felipe, bidxeloduxh Simón.

<sup>14</sup>Che biejn̄ diajg reapost ni yu' guedx Jerusalén huililajz reben̄ Samaria xtidx Dios, baxhañreni Pedr näjza Juan ro'c. <sup>15</sup>Che bidzujn̄ guiro'preni guejdxga, gunabreni lo Dios xcuent rebejn̄ ni huililajzga te gudeed Dios Sprit Dxan xtenni lojreni, <sup>16</sup>sa'csi gajd Sprit Dxan xten Dios jädläjz neñ lastooreni. Che huililajzreni, gurobnistisreni te gucbee rebejn̄ chuni'c najc rexpejn̄ Jesucrist. <sup>17</sup>Dxejc batzuub Pedr

näjza Juan ñaareni yejc tejga renani ahuililajz xtidx Dios, dxejc badeed Dios Sprit Dxan xtenni biädläjzni neñ lastooreni.

<sup>18</sup>Che bahuii Simón biädläjz Sprit Dxan xten Dios lastoo rebejn̄ ni batzuub reapost ñaani yejcreni, rlanj Simón nudeedni meel loj reapost, <sup>19</sup>räjpn̄i lojreni:

—Colguniidx yäl̄rnibee loä te si'cza gudzubä ñaä yejc rebejn̄, te jiu' Sprit Dxan xten Dios neñ lastooreni.

<sup>20</sup>Dxejcti räjpn̄ Pedr lojni:

—iSunitloj xmeellu con luj! Xho gunlu xhigab siilu Sprit Dxan xten Dios nani rudedxlia' Dios. <sup>21</sup>Digacdi gunlu dzuun ni riennu, sa'csi xhet laadi najc lastoolu nez loj Dios; yu' dojl̄ neñ lastoolu. <sup>22</sup>Basie'ch lajzlu, badzucaj rexhigab guijdx xtenlu. Guredx-gunab lo Dios, top susiäj̄l̄ lajz Dios xtojll̄u ni bejn̄lu neñ lastoolu. <sup>23</sup>Naj narä nanä ruguilazduxhlu, luxh runduxhlu xhigabguijdx.

<sup>24</sup>Dxejcti räjpn̄ Simón lo guiro'preni:

—Colñab loj Dios xcuentä te na'c sacä si'cni caniitu.

<sup>25</sup>Che gulujxti bijreni diidx xcuent ni bahuiiojreni bejn̄ Jesucrist, che gulujx basule'reni xtidx Jesucrist loj reben̄ Samaria, gubisacreni Jerusalén.

### Felipe näjza te dade' ni siääd nación Etiopía

<sup>26</sup>Dxejcti biääd te xangl Dios, räjpn̄i lo Felipe:

—Huij lo nezuyj ni rii guedx Jerusalén, ni rij nez guedx Gaza. Nezyujga rdej̄d lo reyubijdz.

<sup>27</sup>Sä'ti Felipe. Che bidzujñni lo nezyujga, bidxaagni te dade' ni siääd naciön Etiopía. Najcni te eunuco, najczani xcuxhtis reina Candace. Laani rgucweeni guiraa xmeel reinaga. Biääd dade'ga guedx Jerusalén te sagajñni Dios. <sup>28</sup>Siädbisacni lajdxni. Sobga'ni nen te gare't saruduxh, cayolñi xtidx Isaías, nani bacuaa xtidx Dios agujc xchero. <sup>29</sup>Dxejcti räjp angl xten Dios lo Felipe:

—Gubig cuä' gare'tga, guninä j dade'ga.

<sup>30</sup>Che gubig Felipe cuä' gare'tga, biejn diajñi cayol dade'ga rextidx Isaías. Dxejcti räjp Felipe lojni:

—¿La racbeelu ni caj lo guijt z nani cayollu, ä?

<sup>31</sup>Dxejcti räjp dade'ga lojni:

—¿Xho gacbeäni palga rut gusule'dini loä?

Sas räjp dade'ga lo Felipe chä'pni nen gare'tga.

<sup>32</sup>Cadro cayol dade'ga nen guijt z ni caj xtidx Dios rñii scree:

Di xiil cuedxa' che rinä bejnñi cadro guetni;

dxitis raa xiil che ruhuajrenini.

Si'c te xiil najc niguiire,

xhet rñiidini mase

rusacsíduxhrenini.

<sup>33</sup>Basacsíduxhrenini.

Reguxhtis ni niujñ yälguxhtisni xhet laliidi bejnreni.

Xhet si'cti nunyäjñ gunreni.

¿Xho guiniinu yu' xpejnñi?

Ni abagu'trenini. Diruni guibajñ lo guedxliuj.

<sup>34</sup>Dxejcti gunabdiidx ben Etiopía, räjpni lo Felipe:

—Gunilaa loä, chuni'c ruzä't niguii nani bacuaa reguijtzre, ¿la

ruzä'tni lagajc laani o la ruzä'tni ste'ca bejn, ä?

<sup>35</sup>Gusloj basule' Felipe rediidx nani abil dade'ga. Dxejcti basule'ni rediidx xcuent Jesucrist. <sup>36</sup>Lañ ni sääreni lo nezyuj, bidzujñreni te lajt cadro yu' nis. Dxejc räjp dade'ga lo Felipe:

—iBahuii, ree yu' nis! ¿Xhi rudxojn tiobnisä?

<sup>37</sup>Dxejc räjp Felipe lojni:

—Palga rililajzlu xtidx Dios nen lastoolu, saj z tiobnislu.

Dxejc räjp dade'ga lo Felipe:

—Rililazä Jesús najc Crist Xi'n Dios.

<sup>38</sup>Dxejc gunibee dade'ga gusudxi gare't, sas biäjt guiro'preni, biu'reni nen nis, ro'c batiobnis Felipe dade'ga. <sup>39</sup>Che biriireni nen nis, huinä Sprit Dxan xten Dios Felipe ste'ca lajt. Dxejc diru dade'ga nuhii lo Felipe. Sä'ti dade'ga lajdxni, cabalazduxhni. <sup>40</sup>Dxejcti chela gucbee Felipe abidzujñni guedx Azoto. Baluiizani xtidx Dios nen guiraa reguejdx che bidzujñlini guedx Cesarea.

### Huililajz Saulo rextidx Jesucrist

(Hch. 22:6-16; 26:12-18)

**9** Lañtis cagusacsí Saulo rexpejn Jesucrist. Rlajzñi ju'tni guiraareni, ni'c huijñi lo bixhoj z nani rnibee, <sup>2</sup>gunabni gac te guijt z chanäni lo reguidoo nen guedx Damasco te palga guidxälñi reni najc xpejn Jesucrist nen reguidooga, niguii sigac gunaa, guliibnireni, jiädñanireni guedx Jerusalén te jiäuren. <sup>3</sup>Lañ sasajñi lo nezyuj, asiäddzujñgajxhni guedx Damasco, basaniya' te bal xhaguibaa,

basanijni guideb gabi cadro siädsaj Saulo. <sup>4</sup>Dxejc biajbni lo yuj, biejn diajgni te xse' bejn nani canii lojni: —Saulo, Saulo, ¿xhicuent rusacsílu narä, näjza rexpəna?

<sup>5</sup>Räjp Saulo lojni:

—¿Chuluj Dad?

Räjpni lo Saulo:

—Narä nacä Jesucrist, nani cagusacsíduxhlu. Niluxh lagajc luj cadejdlu trabajw si'c rajc te gon ni rucuaní' yejc caru'ch.

<sup>6</sup>Bidxebduxh Saulo, racejsni räjpni:

—Dad, ¿xhini'c rlanjlu gunä?

Dxejc räjp Jesús loj Saulo:

—Huistie, biu' guedx Damasco.

Ro'c suluii te niguii xhini'c gunlu.

<sup>7</sup>Rebejn ni siädna Saulo sugadxireni, bidxebbreni sa'csi biejn diajgreni te xse' bejn, luxh rut lojdi bahuiireni. <sup>8</sup>Che huistie Saulo lo yuj, baxhalni lojni, niluxh di lojni jien. Dxejc gunaazreni naani, sanärenini guedx Damasco. <sup>9</sup>Ro'c guyu'ni choñ dxej, natiä'p balojni, dini niä', dizani niajw.

<sup>10</sup>Guedx Damasco rbäjz te xpejn Jesucrist ni laa Ananías. Baluiloj Jesucrist loj Ananías lo te bacal, räjp Jesucrist lojni:

—Ananías.

Dxejc räjp Ananías lojni:

—Anaree Dad.

<sup>11</sup>Räjp Jesucrist lojni:

—Huistie te chäälü lo nezyuj ni laa Ladbee cad rbäjz Judas. Ro'c guiniabdiidxlu con te niguii ni laa Saulo, bejn Tarso. Cabejdx, canabni loä naj. <sup>12</sup>Lo bacal abahuini siäd te niguii ni laa Ananías te gutzuubni naani yejcní te fiini stehuält.

<sup>13</sup>Dxejcti räjp Ananías lojni:

—Dad, abiejn diagä xho basacsí niguiiga rexpejnlu neñ guedx Jerusalén. <sup>14</sup>Luxh rebixhojz ni rnibee abadeed guijtz lojni te guiniaazni ree guiraa rebejn nani rbedx-rniab lojlu, chanänireni jiäureni.

<sup>15</sup>Dxejcti räjp Jesucrist lojni:

—Huij, narä aguleäni te gunni xtzunä. Suluiini xtidxä loj rebenzijt nani digac xpen Israel, näjza loj reni rnibee renacion, näjza loj rexpejn Israel. <sup>16</sup>Narä suluiä lo Saulo trabajwduxh ni tedni te jiädnajlni narä.

<sup>17</sup>Dxejcti säa Ananías, bidzujnni ro yu' cadro rbäzlaa Saulo. Batzuubni naani yejc Saulo. Dxejcti räjp Ananías loj Saulo:

—Betzä Saulo, Jesucrist ni rnibee, nani baluiloj lojlu lo nezyuj cheni siädldu, lagajc laani baxhalni narä te fiilu stehuält, te jiädläjzta Sprit Dxan xten Dios neñ lastoolu.

<sup>18</sup>Lagajc dxejc bitejb si'c xmelbäjł yec baloj Saulo, biacgajc balojni, bahuisa'cni stehuält. Dxejc huistieni, gurobnisgajcni. <sup>19</sup>Dxejc gudajwni, guc nadaanni stehuält. Xchej guyunäj Saulo rexpejn Jesucrist neñ guedx Damasco.

#### Gusloj basule' Saulo xtidx Dios neñ guedx Damasco

<sup>20</sup>Dxejcti gusloj basule' Saulo xtidx Dios neñ reguidoo xten rexpejn Israel, räjpni:

—Jesucrist najc Xi'n Dios nani gujc Niguii.

<sup>21</sup>Che biejn diajgreni xtiidxní, bidxeloreni, räjp lo sa'reni:

—¿La xhet laadi niguiire ni rusäu rexpejn Jesucrist neñ latzguuii

guedx Jerusalén, ä? Lagajcza dee bidzujñ ree te guliibni rexpejn Jesucrist te chanänireni guedx Jerusalén lo rebixhojz.

<sup>22</sup>Dxejcti gusutz'u'tz Saulo guniini xtidx Dios. Basacajñni rexpejn Israel nani rbäjz Damasco sa'csi basule'pacni Jesús najc Crist nani rnibee.

#### **Baxuñ Saulo guedx Damasco**

<sup>23</sup>Che gudejd xhidajl dxej, bachagsa' rexpejn Israel te nugu'treni Saulo. <sup>24</sup>Dxejcti gucbee Saulo xhi xhigab bejnreni. Dxej, yääl cabäjzreni Saulo ro' guiraa renezyuj ni rdzujñ guejdxga te ju'trenini. <sup>25</sup>Dxejcti che gojl te yääl basäl rexpejn Jesucrist Saulo nen te dximro, basiäjtreni dxijmga nez ro' te padeer ni dejd gabi guejdxga. Basiäjtrenini nez dejtz padeerga, te si'c baxuñni guejdxga.

#### **Bidzujñ Saulo guedx Jerusalén**

<sup>26</sup>Che bidzujñ Saulo guedx Jerusalén, rlanjni nuchaagni loj reni rililajz xtidx Jesucrist, niluxh guiraareni bidxejbrenini sa'csi direni gan ahuililajzni xtidx Dios. <sup>27</sup>Dxejcti huinä Bernabéni lo reapost, bijni diidx xcuent Saulo. Räjñ Bernabé lojreni:  
—Baluiloj Jesucrist lo Saulo loj nezyuj. Guninä Xtioznu Saulo loj nezyuj, ni'cni gusutz'u'tz Saulo basule'ni xtidx Jesucrist guedx Damasco.

<sup>28</sup>Dxejc bia'n Saulo guedx Jerusalén, bidxaagni lo rexpejn Jesucrist. <sup>29</sup>Dxejcti gusutz'u'tz Saulo gusloj bijni xtidx Jesucrist lo rebejn. Dxejcti gudilñäj Saulo

rexpejn Israel nani rnii didx griegw. Laareni rdxechduxhrenei, rlanjreni nugu'treni Saulo sa'csi direni nichaglajz xtidx Jesucrist. <sup>30</sup>Che gucbee rexpejn Jesucrist si'c, huinäreni Saulo guedx Cesarea, ro'c gulääreni Saulo, baxhalrenini guedx Tarso.

<sup>31</sup>Dxejc guredxi lajz guiraa renani huililajz xtidx Dios nen reguedx Judea, nen reguedx Galilee, näjza nen reguedx Samaria, sa'csi diru Saulo nusacsí rexpejn Jesucrist, luxh guc xhidajlrureni. Basoobreni xtidx Jesucrist, bisieedrureni rextiidxni, gucnäjza Sprit Dxan xten Diosreni.

#### **Biajc Eneas**

<sup>32</sup>Che gusloj sahuui Pedr guiraa renani huililajz xtidx Dios, huihuiizani rexpejn Jesucrist nani yu' guedx Lida. <sup>33</sup>Ro'c bidxälñi te niguii ni laa Eneas. Agujc xhujñ ijz naga' niguiiga cayacxhuuni. Abixu'n tiejxhni, digacdiru guiliini.

<sup>34</sup>Dxejcti räjñ Pedr lo Eneas:  
—Eneas, cagusiajc Jesucrist guejblu. Huistie, guläs xta'lu.

Lagajc dxejc biajñni, huistietini.

<sup>35</sup>Guiraa rebejn ni rbäjz guedx Lida, näjza rebeni ni rbäjz guedx Sarón, bahuiireni abiajc niguii ni cayacxhuu. Dxejc xhidajlrureni nen reguejdxga huililajz xtidx Dios.

#### **Gubansac Dorcas**

<sup>36</sup>Nen guedx Jope yu' te gunaa ni laa Tabita; rniizarenini Dorcas con xtidx griegw. Gunaaga huililajz xtidx Dios, rudeedzani xhi rquiin rebenproob, najczani huenduxh loj chutis bejn. <sup>37</sup>Gucxhuu gunaaga,

dxejc gujt̄ni. Che gulujx bahuajz rebejn̄ togoolga, huitixhrenini nen̄ te yu' ni najc jiaa yejc sa'ni. <sup>38</sup>Sa'csi gajxh guedx Jope tre' guedx Lida, luxh biejn̄ diajg rexpejn̄ Jesucrist ro'c yu' Pedr, baxhal̄reni tiop dade' saxii Pedr. Räj̄p redade'ga loj Pedr: —Bejn̄ huen salu chonnu Jope nanajga.

<sup>39</sup>Dxejc sanägajc Pedr redade'ga. Che bidzuj̄nreni, huinäreni Pedr nen̄ yu' cadro naga' togunaaga. Ro'c cayonduxh guiraa regunabiuud, baluiireni lo Pedr guiraa rexhajn̄reni nani benchee Dorcas, ni badeed Dorcas lojreni che nabajn̄ni. <sup>40</sup>Dxejcti gunibee Pedr birii guiraren̄ni nen̄ yu'. Dxejc bazuxhij̄bni, guredx-gunabni loj Dios. Dxejc gubirēni bahuuini loj togoolga, räj̄pni: —Tabita, huistie.

Dxejcti baxhal̄ gunaaga balojni; che bahuuini loj Pedr, gurejni. <sup>41</sup>Dxejc gunaaz Pedr ñaani, basuliinini, dxejcti gurejdx Pedr regunabiuud nājza sgaii reni najc rexpejn̄ Jesucrist. Baluiini gunaaga lojreni te bahuilojreni agubansacni. <sup>42</sup>Gucbegajc reben̄ guedx Jope xhini'c gujc, dxejcti xhidajl̄ rebejn̄ga huililajz xtid̄x Jesucrist. <sup>43</sup>Xchejza guyu' Pedr ro'c, gulājz̄ni roliz̄ dade' ni laa Simón, nani ruscoodz guij̄d.

#### Pedr con Cornel

**10** Guedx Cesarea guyu' te niguii ni laa Cornel. Rnibeeni te gayuu resoldaad lo te cuaa ni laa Italiano. Cornel najc benzij̄t, dini gac ben̄ Israel. <sup>2</sup>Bensacduxh najc Cornel, nājza

guiraa resa'ni, sacruduxh rusoobreni xtid̄x Dios. Rudeedni gojn̄ lo reben̄ proob xten Israel. Guixe-guixee rbejdx, rniabni lo Dios. <sup>3</sup>Te dxej, si'cti rcachon̄ gudx̄ej, si'c lo bacal̄ bahuuini loj xangl Dios, räj̄pni loj Cornel:

—¿Conlu Cornel?

<sup>4</sup>Che bahuuini Cornel xangl Dios, bidx̄ejbni, bidx̄elojni, räj̄pni lojni: —¿Xhini'c, Dad?

Dxejcti räj̄p angl xten Dios lojni: —Che rniilu lo Dios, riejn̄ diajg Dios xtiid̄xlu, che rudeedlu meel lo reben̄ proob, ruhuii Dios ni ruj̄nlu, ni'cni rnalajz Dios luj. <sup>5</sup>Naj baxhal̄ tiop niguii chää guedx Jope te chaxiireni Simón Pedr. <sup>6</sup>Rbājz̄ni roliz̄ te dade' ni laa Simón nani ruscoodz guij̄d. Roliz̄ Simón sojb gajxh ro' nisdoo. Simón Pedr gusule' xhini'c nanab gunlu.

<sup>7</sup>Che sii angl xten Dios, gule Cornel tiop mos xtenni nājza te xsoldaadni nani sanälajz Dios.

<sup>8</sup>Dxejc bij Cornel diid̄x lojreni xcuent ni gusajcni, dxejc baxhal̄ni redade'ga guedx Jope.

<sup>9</sup>Che bara yääl, sääreni lo nezyuj. Asiäddzungajxh̄reni guedx Jope, pet si'cti läidx̄ejni. Lagajc orga huä'p Pedr yecyu' te guinināj̄ni Guejb Dios.

<sup>10</sup>Calanduxh Pedr, rlajz̄ni gauni. Laḹ ni cayuj̄nreni xhi gauxhuej̄ni, gusloj canixcaḹni. <sup>11</sup>Bahuuini bixal̄ xhaguibaa, bahuuizani biāj̄t te bariadro nani naliib guidap xi'ni. Siädjiätchäiini gajxh nez loj Pedr. <sup>12</sup>Nen̄ bariaadga yu' guiraa reman ni yu' lo guedxliuj̄ nani rsianāj̄ guidap ni'ni, nājza renani rxeeb si'c bäl̄, nājza renani rutaj̄t. <sup>13</sup>Gunii Dios lo Pedr, räj̄pni lojni:

—Pedr, huisu te ju'tlu man gaulu.

<sup>14</sup>Dxejc räjp Pedr lojni:

—Na'c Dad. Nunc gauä sa' remandxuudxga, abia'a dina gauä reman nani rni xleilu najc mandxuudx.

<sup>15</sup>Gunisac Dios loj Pedr, räjpni:

—Na'cru guiniilu nacdXuudx reman nani abasia.

<sup>16</sup>Che gujc chon huält gujc si'c, huä'psac bariaadga xhaguibaa.

<sup>17</sup>La<sub>l</sub> ni cayujn Pedr xhigab xhichani'c säloj nani bahuiini, bidzujn reniguii ni baxhal<sub>l</sub> Cornel ro' yu'ga, sa'csi agunabdiidxreni caro rbäjz Simón nani ruscoodz guijd.

<sup>18</sup>Che bidzujnreni rolä'ga canabdiidxreni la ro'c rbäjz te dade' ni laa Simón Pedr. <sup>19</sup>La<sub>l</sub> ni cayujn Pedr xhigab xcuent ni bahuiini, gunii Sprit Dxan xten Dios lojni, räjpni:

—Bahuii, chon dade' caguiillu.

<sup>20</sup>Biäjt yejc yu're te jinälureni. Na'c gunlu xhi stee xhigab, sa'csi lagajc narä baxhaläreni lojlu.

<sup>21</sup>Dxejcti biäjt Pedr jiaaga, bidzujn<sub>ni</sub> cadro suga' redade'ga, räjpni lojreni:

—Narä nacä ni caguiiltu. ¿Xhi siääd<sub>tu</sub>?

<sup>22</sup>Räjp reniguiiga lo Pedr:

—Cornel, nani rnibee te gayuu soldaad, te be<sub>nsa</sub>'c, te bejn<sub>ni</sub> ni rajn<sub>ni</sub> Dios, te bejn<sub>ni</sub> ni sanälajz rexepejn Israel, laani baxhal<sub>l</sub> nuure lojlu, sa'csi räjp angl xten Dios lojni, jiopxiinu luj te jiejn diajgnu xtiidxlu.

<sup>23</sup>Dxejcti gurejdx Pedr rebejn<sub>ga</sub>, biu'reni nen<sub>ni</sub> yu'. Ro'c bia'nreni te guxhijn. Che bara yääl, Pedr näjza sgaii ben<sub>ni</sub> Jope ni najc xpejn

Jesucrist, sanä redade' ni baxhal<sub>l</sub> Cornel.

<sup>24</sup>Che bara yääl, bidzujnreni guedx Cesarea. Abatojp Cornel resa'ni näjza reexamigwni rolizjni. Cabäjzreni guidzujn<sub>ni</sub> Pedr. <sup>25</sup>Che bidzujn<sub>ni</sub> Pedr ro yu', huichagloj Cornelni, bazuxhijbni lo Pedr.

<sup>26</sup>Dxejc gunaaz Pedr naani, guläsnini, räjpni lojni:

—Huisulii, sa'csi narä nacä te niguiitis sigajc najclu.

<sup>27</sup>Cayuiireni diidx, biu'reni nen<sub>ni</sub> yu'. Che biu'ni bahuii Pedr nadxagsa' rebejn<sub>ni</sub> nen<sub>ni</sub> yu'. <sup>28</sup>Räjp Pedr lojreni:

—Anajntu xhi caj lo leii xten rexpejn Israel: digacdi guchaag te xpejn Israel loj benzijt nani digac xpejn Israel, digacdiza jiu'ni rolizjreni. Niluxh agunii Dios loä lo te baca<sub>l</sub>, te gacbeä digacdiru jiuä releiire. Abaluu Dios narä sajc guchagsa'ä chutis bejn<sub>ni</sub>. <sup>29</sup>Ni'cni, che gurejdx<sub>tu</sub> narä biälga<sub>cä</sub>. Naj rniabdidxä, ¿xhicuent gurejdx<sub>tu</sub> narä?

<sup>30</sup>Dxejcti räjp Cornel loj Pedr:

—Gudajp dxej si'cti rcachon<sub>ni</sub> gudx<sub>ej</sub>, cabedx-canabä lo Dios rolizä chela baluiloj te niguii najc<sub>w</sub> te ladnol ni rdimbicha'. <sup>31</sup>Najni loä: “Cornel, che rbedx-rniablu lo Dios, riejn diajg Dios xtiidxlu, che rudeedlu meel lo reben<sub>ni</sub> probb, racbee Dios, di lajzni jääl<sub>ni</sub> luj.

<sup>32</sup>Ni'cni naj<sub>ni</sub> baxhal<sub>l</sub> tiop dade' chää guedx Jope te chaxiireni Simón Pedr nani rbäzlaa rolizj Simón ni ruscoodz guijd. Rolizjni sojb gajxh ro' nisdoo. Che guidzujn<sub>ni</sub>, laani gusule'ni xtidx Dios lojtu.” <sup>33</sup>Dxejc baxhalä chu biädxiiilu. Xquixtiostelu

biäädlu. Naj anadxagsa'nu ree nez loj Dios te jiejn diajgnu rextidx Dios ni baniidxni lojlu guiniilu loonu.

### Basule' Pedr xtidx Dios rolijz Cornel

<sup>34</sup>Dxejcti räjp Pedr lojreni:

—Naj gucbeliä tebloj rinälajz Dios guiraa bejn; rebenzijt sigajc rexepejn Israel. <sup>35</sup>Niluxh rinälajz Dios chutis beñ guedxliuj nani ruzuxhijb lojni, nani rusooob rextiidxni, nani laaca nabajn. <sup>36</sup>Badeed Dios xtiidxni loj rexepejn Israel, basule' Dios biääd Jesucrist te gac chanälaaznu Dios te cuedxilajznu, sa'csi Jesucrist rnibee guideb guedxliuj. <sup>37</sup>Che gulujx baluii Juan ni rutiobnis xcuent yälrobnis, dxejc gusloj basule' Jesucrist xtidx Dios nez reguedx Galilee. La'tu najntu xho bire'ch xtidx Jesucrist guideb nez neñ reguedx Judea. <sup>38</sup>Nancheetu xho badeed Dios yälrnibee loj Jesucrist, beñ Nazare't. Badeedza Dios Sprit Dhan xtenni te cuääzni neñ lastooni. Nancheetu xho bejnni redzunro, remilagwr, basiajnci rebejn nani caguteed beñdxab trabajwduxh. Redzunroga bejnni sa'csi bennäj Diosni dzuun.

<sup>39</sup>Bahuiloonu guiraa redzuun ni bejn Jesucrist neñ reguedx Israel näjza guedx Jerusalén. Bacuaa rexepejn Israel Jesucrist lo crujz, ro'c gujtni. <sup>40</sup>Dxejcti che biojn dxej, guläs Dios Jesucrist lo rebengut, gubansacni, badeed Dios yälrnibee lojni te gujc biädluiloj Jesucrist loonu. <sup>41</sup>Di Jesucrist nululoj loj chutis bejn. Lojtis renani agule Dios gutie'ch diidx gubansac Jesucrist lo rebengut, loj reni'c baluilojni. Nuure nadxagnu loj reni gule

Dios. Bidaunänuni, bidunnäänuni che gubansacni lo rebengut.

<sup>42</sup>Baxhañni nuure chatie'chnu diidx loj guiraa rebejn, chosule'pacnu Dios gule Jesucrist te gacni juejz xte rebenbajn näjza xte rebengut.

<sup>43</sup>Galooli bacuaa renani gunii xtidx Dios lo guijtz, räjpreni: “Guiraa rebejn ni chalilajz xtidx Jesucrist sudzucay Dios xtojlreni.”

### Biädlajz Sprit Dhan xten Dios neñ lastoo rebenzijt

<sup>44</sup>Lañ ni canii Pedr rediidxga, biädlajz Sprit Dhan xten Dios neñ lastoo renani huililajz xtiidxni.

<sup>45</sup>Bidxeloj guiraa rexepejn Israel nani huinä Pedr sa'csi biädlajz Sprit Dhan xten Dios neñ lastoo renani najc benzijt. <sup>46</sup>Gucbeereni biu' Sprit Dhan xten Dios lastoo rebenzijt sa'csi bejn Sprit Dhan guniireni stee didxsaj nani gajdreni guisieed, calä'pzareni xpala'n Dios. <sup>47</sup>Dxejcti räjp Pedr lo rexamiigwni:

—Chu laa ni gudxojn yälrobnis lo rebejnre, ni sigajc biädlajz Sprit Dhan xten Dios neñ lastoonu, abiädlajzni neñ lastoo rebejnre.

<sup>48</sup>Dxejcti gunibee Pedr gurobnisreni te gacbee bejn najcreni xpejn Jesucrist. Dxejcti gunabreni loj Pedr jia'nni ro'c tiopchon dxej.

### Basule' Pedr xho biädlajz Sprit Dhan xten Dios lastoo rebenzijt lo rexepejn Jesucrist neñ guedx Jerusalén

**11** Reapost, näjza renani huililajz xtidx Jesucrist neñ reguedx Judea, biejn diajgreni huililajz rebenzijt ni digac xpejn Israel xtidx Dios. <sup>2</sup>Che bidzujn



Pedr guedx Jerusalén, rexpejn Israel nani rlajz chu guiraa rexpejn Jesucrist bee si'cni bejn toAbram, gudilnäjreni Pedr. <sup>3</sup>Räjpreni lo Pedr:

—¿Xhicuent biu'lu rolizj benzijjt nani xhet yu'di bee si'c nuure? ¿Xhicuent gudaunäjlureni, ä?

<sup>4</sup>Dxejcti basule' Pedr diidx xho gujc huijni loj rebenzijjt:

<sup>5</sup>—Yu'ä guedx Jope. Cabedx-canabä lo Dios, dxejc si'c gunixcalä, bahuiä bixal xhaguibaa, siädjiäjt te bariadro, naliib guidap xi'ni. Siädjiätchäiini nez loä. <sup>6</sup>Che bahuisa'cä, nenga yu' guiraloj reman ni yu' lo guedxliuj nani rsianäj guidap ni'ni, renani rbäjz neñ dajn, renani rxeeb si'c bäl, näjza renani rutajt. <sup>7</sup>Dxejcti biejn diagä naj Dios loä: “Pedr, huisu. Bagu't man gaulu.” <sup>8</sup>Dxejcti räpä: “Digacdini Dad. Nicla tej gadna gauä te man nani rnii leii xtenlu najc mandxuudx.” <sup>9</sup>Dxejc gunisac Dios loä: “Na'cru guiniilu nacdxuudx recos nani abasia Dios.” <sup>10</sup>Che gujc choñ huält gunii Dios si'c, huä'psac bariaadga xhaguibaa. <sup>11</sup>Lagajc orga bidzujñ choñ dade' ro yu' cadre yu'ä. Guedx Cesarea biriireni, biädxiireni narä. <sup>12</sup>Dxejc gunii Sprit Dxan xten Dios loä: “Huinä reniguiire. Na'c gun tiop lajzlu.” Dxejcti huinääch xho'p beñ Jope, dade' nani rililajz xtidx Jesucrist. Che bidzujñ guedx Cesarea, biu'nu rolizj Cornel. <sup>13</sup>Basule' Cornel diidx loonu xho baluiloj te angl xten Dios lojni lagajc rolizjni. Räjpre angl xten Dios lojni: “Baxhal tiop dade' chää guedx Jope te chaxiireni Simón ni rniireni Pedr.

<sup>14</sup>Laani siniini xtidx Jesucrist te gacbeelu con resa'lu xhini'c nanab gunlu te guslaa Dios la'tu lo rextojltu.” <sup>15</sup>Che gusloj cagusule'ä xtidx Dios lojreni, biu' Sprit Dxan xten Dios neñ lastooreni si'c biu'ni lastoону galooli. <sup>16</sup>Dxejcti banaj lazä rextidx Dad Jesucrist che najni: “Juan abatiobnis con nistis, biädla narä suxhalä Sprit Dxan xten Dios te cuääzni neñ lastootu.”

<sup>17</sup>Dxejc räjpre Pedr:

—Palga badeed Dios Sprit Dxan xtenni lojreni si'c baniidxni Sprit Dxan xtenni loonu che huililajznu xtidx Jesucrist, ¿chu narä? te niäpä lo Dios: “Na'c gudeedlu Sprit Dxan xtenlu lojreni.”

<sup>18</sup>Che biejn diajg reben Jerusalén rediidxga, biäuu ro'reni, dirureni nidiñäj Pedr. Alga gulä'preni xpala'n Dios, räjpreni:

—Näjza rebenzijjt nani digac rexpejn Israel abasaan Dios gusiechlajzreni te guibanäjreni Dios par tejpas.

### Rexpejn Jesucrist ni yu' guedx Antioquía

<sup>19</sup>Che gujt Esteban bire'ch renani huililajz rextidx Jesucrist. Bire'chreni lo yuj Chipre ni re' lo nisdoo, lo reguedx Fenicia, näjza lo guedx Antioquía sa'csi cadejdreni trabajwduxh. Basule'reni rextidx Jesucrist lojtis rexpejn Israel. <sup>20</sup>Lojreni nadxaag gaii beñ Chipre, näjza gaii beñ Cirene. Redee bidzujñ guedx Antioquía. Ro'c gusloj caniireni lo benzijjt nani rnii didx griegw. Basule'reni lo rebenzijjtga guiraa xcuent Jesucrist. <sup>21</sup>Gucnäjä Diosreni caniireni

xtiidxni. Xhidajl rebejn̄ga huililajz xtidx Jesucrist, basoobreni xtiidxni.

<sup>22</sup>Che biejn diajg rexpejn̄ Jesucrist ni yu' guedx Jerusalén rililajzreni, baxhalreni Bernabé guedx Antioquía. <sup>23</sup>Che bidzujñ Bernabé guedx Antioquía, bibalazduxhni che bahuiini xho cayunnäj Dios rebejn̄ga. Dxejcti balijdx Bernabéreni: gutijp lajzreni gusoobreni xtiidxtis Jesucrist. <sup>24</sup>Beñsa'c najc Bernabé. Rililazduxhni xtidx Jesucrist. Racnäjduxh Sprit Dxan xten Diosni. Xhidajl rebejn̄ huililajz xtidx Jesucrist guejdxga.

<sup>25</sup>Che birii Bernabé guejdxga, huijni guedx Tarso satiilni Saulo. <sup>26</sup>Che bidxäl̄ni Saulo, huinänini guedx Antioquía. Ro'c bia'nreni tebijz, bachagsa'reni renani huililajz te baluiireni xtidx Jesucrist lo xhidalduxh bejn̄. Ganid benguejdxga gulälaj “Cristianos” renani rililajz xtidx Jesucrist.

<sup>27</sup>Neñ redxejga birii gaii dade' nani rnii xtidx Dios. Guedx Jerusalén biriireni, bidzujñreni guedx Antioquía. <sup>28</sup>Huisulii te dade'ga ni laa Agabo. Gucnäj Sprit Dxan xten Diosni te guniini siäd te gubijn guideb guedxliuj. Luxh gujc gubijn̄ga neñ reijz ni gunibee reii Claudio ni sajcru. <sup>29</sup>Dxejcti rexpejn̄ Jesucrist ni rbäjz guedx Antioquía bejn̄ xhigab cade tejreni gudeed meel chää lo rexpejn̄ Jesucrist ni rbäjz neñ reguedx Judea.

<sup>30</sup>Batojpreni meel, baxhalrenini lo rebengool ni rnibee rexpejn̄ Jesucrist ro'c. Saulo näjza Bernabé huinä meelga che huijreni Judea.

**Gujt Jacoob, biäu Pedr neñ latzguiib**

**12** Neñ redxejga, trabajwduxh bateed reii Herodes gaii rexpejn̄ Jesucrist. <sup>2</sup>Gunibeeni gujt Jacoob betz Juan, biru' guejni. <sup>3</sup>Che bahuii Herodes bibalazduxh rexpejn̄ Israel sa'csi bagu'tni Jacoob, gunibeeni gunazgajcreni Pedr. Dee gujc neñ redxe lanij che rajwreni yätxtiil ni di saguij. <sup>4</sup>Che gunaazreni Pedr, biäuni neñ latzguiib. Gunibee Herodes biäd tajp cuaa soldaad cuanäjreni ro' latzguiib. Tapgaj soldaad cuanäj ro' latzguiibga cade xho'p or. Bejn Herodes xhigab cuääni Pedr te guetni nez loj rexpejn̄ Israel che ted lanij. <sup>5</sup>Yu'ti Pedr neñ latzguiib, dxejcti durtis cabejdx, canab rexpejn̄ Jesucrist lo Dios xcuent Pedr.

**Gulää Dios Pedr neñ latzguiib**

<sup>6</sup>Bidzujñti dxe bispr dxej ni rlanj Herodes nibää Pedr nez loj rexpejn̄ Israel. Yäälga nagayejs Pedr galäii tiop soldaad. Caden̄ naliib guiro'p naa Pedr. Stiop soldaad canäj ro' latzguiib. <sup>7</sup>Chela baluiloj te angl xten Dios, bianij te bajl nani basanij neñ latzguiib. Dxejcti gunaazni xhajcw Pedr, basniibnini te gubajñni. Räjpn̄i lo Pedr:

—Basquejnga, huistie.

Dxejcti bixec recaden̄, bitejbreni naa Pedr. <sup>8</sup>Räjpn̄ xangl Dios lo Pedr:

—Gojt xhajblu, baläj xcura'chlu.

Si'c bejn̄ Pedr, dxejc räjpn̄ xangl Dios lo Pedr:

—Gojt xhablajzlu, gudanajl narä —räjpn̄i.

<sup>9</sup>Biriitini latzguiib sanajlni angl xten Dios. Niluxh dini gun xhigab guliipac nani bejn xangl Dios. Bejnini xhigab pet canixcalni.

<sup>10</sup>Gudejdreni nez loj te soldaad, gudedgajcreni nezloj steeni, dxejc bidzujñreni ro' puertguiib xten latzguiib nani caj lo nezyuj ni rdejd galäii guejdxga. Xtebca bixal puertroga, biriireni gusajreni tebzeyuj. Dxejcti te squiin gunitloj xangl Dios. Xtebtis Pedr sasaj lo nezyuj. <sup>11</sup>Dxejc si'cni gubajñ Pedr, bejnini xhigab:

—Naj sii nanä baxhal Dios te xanglni baslaa narä ladzñaa Herodes te digacdi gun rexpejn Israel nani rlanjreni gunñajreni narä.

<sup>12</sup>Che gucbee Pedr xhi gusajcni, huijni rolijz Marii, xnan Juan ni rniireni Marcw. Ro'c nadxagsa' xhidajl rexpejn Jesucrist, cabedx-canabreni lo Dios xcuent Pedr. <sup>13</sup>Cagusejz Pedr rolä', dxejc gubig te dxa'p ni laa Rode, bacuadiajgni ro lä'. <sup>14</sup>Che biembec Rode xse' Pedr, sa'csi bibalazduxhni, biallajzni nuxhalni ro lä'. Alga baxuñni biusacni nen yu', räjpni lojreni:

—Pedr suga' ro lä'.

<sup>15</sup>Dxejcti räjpreni lo Rode:

—Yeyclu cayajc.

Dxejcti duurtis gunii dxape'ga suga' Pedr ro lä'. Dxejcti räjpreni loj Rode:

—Xho gacni Pedr. Pet biejn diajglu gunii xangl Dios ni rcanäj Pedr.

<sup>16</sup>Dxejcti laltis cagusejz Pedr ro lä'. Che baxhalreni ro lä' bidxeloduxhreni bahuiireni lo Pedr.

<sup>17</sup>Dxejcti bazääb Pedr ñaani te na'cru jiejyreni. Dxejc bij Pedr diidx

xho baxhal Dios ro' latzguiib. Dxejc räjpni:

—Colchaye'tz lo Jacoob näjza lo rexpejn Jesucrist guiraa ni gusacä nayääl.

Dxejcti birii Pedr ro'c, huijni ste'ca lajt.

<sup>18</sup>Che bara yääl, rsildooru, bieiduxh resoldaad sa'csi direni gan xho gujc birii Pedr nen latzguiib.

<sup>19</sup>Gunibee Herodes huitiilreni Pedr, gunabdiidxzani lo resoldaad xho gujc birii Pedr, dxejc gunibeeni gujt resoldaad ni cuanäj latzguiib che birii Pedr. Dxejcti birii Herodes reguedx Judea, xchej huijia'nni guedx Cesarea.

### Gujt Herodes

<sup>20</sup>Bachechduxh reben Tiro näjza reben Sidón Herodes, ni'cni diruni gusaan guto' rebejn nez cadro rnibeeni xhi gau reben Tiro näjza reben Sidón. Ni'c biääd xhidajlreni te guiniabreni jäjñ lajzni, te na'cru guidxe'ch Herodes lojreni. Abenxgaareni xamiigwreni Blasto, mos ni yu' lo reii Herodes, mos ni sajru lo guiraa rexmos Herodes. Guninäj Blasto Herodes xcuentreni te na'cru guidxechnäj Herodes rebejnğa. <sup>21</sup>Basoobtini te dxej te guininäjniren. Dxejga gojt Herodes xhajn reini, gurejni lo xyacxhil reini. Dxejcti gusloj caniini didxa'sc loj rebejnğa. <sup>22</sup>Guredxa' rebejn räjpreni lojni:

—Huenduxh najc diidxre. Guejblu najc te dios, xhet xtiidxdi niguii najc diidxre.

<sup>23</sup>Lagajc dxejc biääd te angl xten Dios, bejnini gusloj cayacxhuu Herodes, gudajw rebisiujg Herodes,

gujtni sa'csi basaanni gunii rebejn najcni te dios, sa'csi dini niliäp xpala'n Dios.

<sup>24</sup>Xhidajl bejn biejn diajgni xtidx Dios, huililajzreni xtidx Dios.

<sup>25</sup>Che gulujx badeed Bernabé näjza Saulo meel ni batojp reben Antioquía lo rebengool, biriireni guedx Jerusalén. Sanäreni Juan ni rniireni Marcw lo guedx Antioquía.

### Gule Sprit Dxan xten Dios Bernabé näjza Saulo

**13** Lo rexpejn Jesucrist ni rdxaag sa' guedx Antioquía guyu' gaii niguii ni gunii xtidx Dios, näjza gaii niguii ni rusule' xtidx Dios loj guiraa rexpejn Jesucrist. Loj redee nadxaag Bernabé, näj Simón ni rniireni Negr; näj Lucio, beñ Cirene; näj Manaén ni gulanäj reii Herodes gujcní si'c bejtzni; näjza Saulo. <sup>2</sup>Bidzujñ te dxej cagucua'nreni lañ ni cabedx-canabreni lo Dios, dxejc räjp Sprit Dxan xten Dios lojreni:

— Colcúe Bernabé näjza Saulo te gunreni dzuun ni rlazä gunreni.

<sup>3</sup>Che gulujx bacua'nreni, che gulujxza guredx-gunabreni lo Dios, batzuubreni naarení yeje guiro'preni, te si'c baxhañreni Bernabé näjza Saulo te guluiireni xtidx Dios ste'ca lajt.

### Guiro'preni baluui xtidx Dios lo reben Chipre

<sup>4</sup>Baxhañ Sprit Dxan xten Dios Saulo näjza Bernabé guedx Seleucia. Ro'c biu'reni neñ barcw, sääreni nez yuj ni tre' galäií nisdoo, ni laa Chipre. <sup>5</sup>Che bidzujñreni Chipre, biu'reni guedx Salamina.

Ro'c basule'reni xtidx Dios neñ guiraa rexquidoo rexpejn Israel. Näj Marcw gucnäjreni. <sup>6</sup>Che cuansajreni guideb yuj Chipre, bidzujñreni guedx Pafos. Ro'c bidxaagreni te niguii ni laa Barjesús. Najcni te bidxaa, najczani te xpejn Israel. Cagusgueeni rebejn guejdxga, räjpni xtidx Dios caniini, niluxh dini gac xtidx Dios. <sup>7</sup>Bidxaare nu'ch lo rexpejn Sergio Paulo, nani najc gubernadoor xten Chipre. Nasinduxh Sergio Paulo. Gurejdxni Bernabé näjza Saulo, sa'csi rlazni jiejn diajgni xtidx Dios. <sup>8</sup>Dxejcti Barjesús, ni laaza Elimas, bidxagdijñni guiro'preni sa'csi di rlazni chalilajz Sergio Paulo xtidx Dios. <sup>9</sup>Saulo, nani laaza Pabl, bahuiztu'tz loj Barjesús. Batijp Sprit Dxan xten Dios lastoo Pabl, räjpni loj Barjesús:

<sup>10</sup>—Rusgueduxhlu rebejn, najclu beñlatsiaj, beñguidxduxhlu, najclu xi'n Satanás, beñdxab ni rnibee. Rdxechnäjzalu guiraa recossa'c xten Dios. ¿Guc cuääz guxhiidlu xtidxlii Jesucrist te di chalilajz bejn xtidx Jesucrist? <sup>11</sup>Naj siääd xcastiigw Dios yejclu. Xhidajl dxej sicäjy lojlu, xhetliidi fiilu —räjp Pabl.

Gujcsi räjpni si'c, bicägajc lojni. Dxejctiru cuansajni caguuiiñni chu guiniaaz naani guluiiñni canejz cháäni. <sup>12</sup>Che bahuii Sergio Paulo xhi gusajcni, huililajzni xtidx Dios, sa'csi bidxeloduxhni xcuent xcärluluii Dios.

### Bidzujñ Pabl näjza Bernabé guedx Antioquía xten distrit Pisidia

<sup>13</sup>Che baluux Pabl näjza resa'ni xtzuunreni guedx Pafos, biu'reni

neñ barcw, gudejdreni lo nisdoo, sääreni guedx Perge neñ estad Panfilia. Che bidzujñreni guejdxga, gubisac Juan, ni rniireni Marcw, Jerusalén. <sup>14</sup>Dxejcti birinäj Pabl resa'ni guedx Perge, sääreni guedx Antioquía neñ distrit Pisidia.

Dxejc te dxe sabd, dxej ni rusilajz rexepejn Israel, biu'reni neñ xquidoo rexepejn Israel, ro'c gurejreni. <sup>15</sup>Che gulujx bil te dade' reguijtz xten Dios ni laa leii nájza reprofe't, baxhał reguxhtis xten guidoo chu huigajñreni, räjpreni lo Pabl nájza Bernabé:

—La'tu sa'nu, palga rajptu te diidx ni gulijdx rebejnre, colguiniini.

<sup>16</sup>Dxejc huisulii Pabl, guläsní naani bejnni seen lo rebejn te cuadiajgreni xtiidxni. Räjppabl lojreni:

—Colcuadiajg, la'tu rexepejn Israel, guiraatu ni rajñ Dios.

<sup>17</sup>Galooli gule Xtios rexepejn Israel retoxtadgoldoonu. Luxh che guläjzreni naciön Egipto, bidalduxh retoxtadgoldoonu. Gucnäjdjuh Diosreni bejnni remilagwr, te guläänireni guedx Egipto. <sup>18</sup>Tiuu ijz guläjzreni lo reyubijdz. Xhidajł huält direni nusoob xtidx Dios, niluxh empac gucnäjza Diosreni.

<sup>19</sup>Guyu' gajtz naciön guläjz neñ reyuj ni laa Canaán. Dios bejn gunitloj reguejdxre, te gudisni reyujga loj retoxtadgoldoonu.

<sup>20</sup>Dxejcti badeed Dios reniguii ni gujc juejz, gunibeereni rebejn. Tajp gayugarol ijz gunibeereni rexepejn Israel. Samuel nani gunii xtidx Dios gujc lult juejz. <sup>21</sup>Dxejcti gunab rexepejn Israel te reii lo Dios te guinibee reiiga lojreni. Badeedti

Dios Saúl xi'n Cis, sa' toBenjamín. Gunibeeni tiuu ijz. <sup>22</sup>Che badzucaj Dios Saúl, badeedni gunibee torei David. Räjppabl Dios: “Agucbeä David xi'n Isaf rujñ tejsi xhigab con narä. Susoobni xtidxä sujñni guralii ni rlazä gac.”

<sup>23</sup>Räjppabl:

—Galooli bia'n diidx lo rexagdo David guxhał Dios te bejn ni gudzucaj xtojłnu, ni gusłaa nuure lo dojl. Naj aguzojb diidxga. Jesucrist najc bejnğa, rudzucajni xtojłnu, rusłaa ni nuure lo dojl. <sup>24</sup>Che gusloj cagulijdx Juan rebejn, baluini nanabpac gusiechlajz rexepejn Israel, tiobnisreni te jia xtojłreni. <sup>25</sup>Niluxh guxii riäädx guluux Juan dzuun ni badeed Dios gunni che räjpní lo rebejn: “¿Chu rujntu xhigab nacä narä? Dina gacä Crist nani bia'n diidx guxhał Dios. Colhui, detzä siääd tej ni sacduxhru loä; nicla gac surloä te cuää xcura'chni.”

<sup>26</sup>Räjppabl:

—Rniä lojtu sa'ä, rexagdo toAbram, nájza lo chutis ni rajñ Dios, loonu baxhał Dios xtiidxni ni rusule' xho rudzucaj Jesucrist xtojłnu, xho rusłaa ni nuunu lo dojl. <sup>27</sup>Rebejn Jerusalén, nájza renani rnibeereni, direni niembee Jesucrist nani rnibee, dizareni niacbee diidx xcuent Dios nani bacuaa reniguii ni gunii xtidx Dios agujc xchero, luxh rołreni xtidx Diosga gasob sabd. Niluxh che bagu'treni Jesucrist, guzojb xtidx Dios ni caj lo guijtzga. <sup>28</sup>Balijdxreni Pila't ju'tni Jesucrist, luxh xhet bejndini te guetni. <sup>29</sup>Che bagujc guiraa ni caj lo guijtz xcuent Jesucrist, gulätreni Jesucrist lo cruzj, bacua'tzrenini neñ baa cuä'

te guilaj. <sup>30</sup>Dxejcti guläs Dios Jesucrist lo rebengut. <sup>31</sup>Balti huält baluiloj Jesucrist lo rexamigwni nani biädnajlñi nez rexyuj Galilee, renani biädnajlzani nez guedx Jerusalén. Bahuilojreni gubansac Jesucrist lo rebengut, te naj rusule'reni diidx xcuent Jesucrist.

<sup>32</sup>Naj siopnänu xtidx Diosre lojtu te guibalajztu. Agujc xchero bia'n Dios diidxre con retoxtadgoldoonu.

<sup>33</sup>Guläs Dios Jesucrist te huile' diidxga par nuure, rexagdooreni. Agujc xchero gunii Dios te diidx ni caj nen Salmo ni bacuaa toDavid. Lo Salmo ni rojp räjp Dios: “Luj najclu xi'nä. Nadxey guleälu te guinibeelu.”

<sup>34</sup>Räjpza Pabl:

—Dxeycru stee lajt caj xcuent ni guläs Diosni lo rebengut te nuncru guetni. Scree bacuaa te niguii, räjp Dios: “Sunidxä recossa'c lojlu si'c ni bia'nä diidx con toDavid.” <sup>35</sup>Ni'cni bacuaaza toDavid nen stee Salmo ni gunii Dios, guniini: “Dipaclu gusaan gudx tiejxh Xi'nlu nani sanälajzlu.”

<sup>36</sup>Che gulujx gunibee toDavid lo retoxtadgoldoonu, si'cni badeed Dios gunni, dxeyc gujtñi. Biga'tznäjñi retoxtadgoldooni. Niluxh guyujdx tiejxh toDavid. <sup>37</sup>Niluxh guläs Dios Jesucrist lo rebengut, ni'c di tiejxhni niujdx. <sup>38</sup>Ni'cni colyabee, la'tu resa'ä, Jesucristre, bejn ni cania xcuentni, laani rudzucajni rextojlñu.

<sup>39</sup>Chutis ni rililajz xtidx Jesucrist ruslaa Jesucristni loj guiraa rextojlñi nani digacdi guibicaj mascä rusoobni guiralii ni caj lo leii xten toMoisés. <sup>40</sup>Colsusin te na'c sajctu recos ni caj lo guijtñi bacuaa te niguii nani bacuaa xtidx Dios:

<sup>41</sup>Colhuilaa, la'tu ni ruxhiznäj xtidxä colguidxeloj, colnitloj, sa'csi naj ni nabajntu sunä te dzunro, te milagwr nez lojtu, niluxh dipac lajztu chalii, mascä jiääd chu gusule'pacni lojtu.

<sup>42</sup>Gulujxti xtidx Pabl, biunejz rebejn. Che birinäj Pabl Bernabé biädñi rebejnre lojreni, räjpreni: —Jiädsactu ste xmaan te gusule'rutu rediidxre loonu.

<sup>43</sup>Che care'ch rebejnğa, xhidajl rexpejn Israel, näjza xhidajl rebenzijt nani rusoob xtidx Dios si'c rujñ rexpejn Israel, birinajlreni Pabl näjza Bernabé. Dxejc balijdxreni rebejn ni siädnajlreni, räjpreni lojreni chanuutis chalilajzreni didxlii xcuent Jesucrist.

<sup>44</sup>Che gojlti stee sabd, dxey ni rusilajz rexpejn Israel, xhidalduxh rebenguejdx bire' te gucuaadjgreni guinii Pabl xtidx Dios. <sup>45</sup>Che bahuii rexpejn Israel guiraa rebejn ni bire', bidxechlajzreni, gucnadareni. Dxejc gusloj cadxagdijl rexpejn Israel Pabl. Che rniini te diidx, laareni rniireni “didxxhiini”. Caniyajzareni Pabl näjza Bernabé, caguereni lojreni. <sup>46</sup>Luxh di Pabl niclaza Bernabé nidxejb. Gusutijptisreni, räjpreni lo rebejn:

—Nungäjñ ganid lojtu guiniinu xtidx Dios, sa'csi la'tu najctu rexpejn Israel. Niluxh ditu chalilajz xtidx Dios, lagajc la'tu caniitu digacdi guibannäjtu Dios par tejpas. Ni'c sibiré loonu, te guiniinu xtidx Dios lo rebenzijt ni digac xpejn Israel. <sup>47</sup>Sa'csi si'c agunibee Xtiosnu. Scree caj xtidx Dios lo guijtñi:

Suxhalātu te guluiilu rextidxä lo rebenzijt ni digac xpejn Israel, te chalilajz rebejnğa xtidxä, te laareni lo xtojłreni, cadrotis yu'reni lo guedxliuj, räjp Dios.

<sup>48</sup>Che biejn diajg rebenzijt rediidxre, bibalazduxhrene, gulä'preni xpala'n xtidx Dios. Renani gule Dios galooli huililajz xtidx Dios. Xhidajł najcreni. <sup>49</sup>Bire'ch xtidx Dios guideb nez reguejdxga. <sup>50</sup>Dxejc rexpejn Israel balijdx regunaa ni sajcro, nájza reniguii ni sajcro nen guedx Antioquía, te bidxechnäjreni Pabl nájza Bernabé, barilaagwreni Pabl nájza Bernabé te biunejzreni guedx Antioquía. <sup>51</sup>Dxejcti Pabl nájza Bernabé gubijb guxhuj ni'reni si'c te seen te gacbee rebejn xhet laadi bejnreni. Sät'tireni guedx Iconio. <sup>52</sup>Baspaa Dios lajz rexpejn Jesucrist guedx Antioquía xten Pisidia. Bazutijpza Sprit Dxan xten Dios lastooreni.

**Guyu' Pabl náj Bernabé guedx Iconio**

**14** Che bidzujł Pabl nájza Bernabé guedx Iconio, biu'reni xquidoo rexpejn Israel. Basule'reni xtidx Dios lo rexpejn Israel nájza lo rebenzijt. Xhidajł rebejnğa huililajz xtidx Dios. <sup>2</sup>Niluxh sgaii rexpejn Israel nani di chalilajz xtidx Jesucrist balijdx rebenzijt te bidxechnäjreni rebejn nani huililajz xtidx Jesucrist. <sup>3</sup>Ni'cni bia'n Pabl nájza Bernabé lo guejdxga balti dxej. Gusutzu'tz guiro'preni guniireni xtidx Jesucrist. Badeed Dios bejnreni redzunro, remilagwr xcuent

xcälrnibe Dios te bahuii bejn cayacnáj Diosreni. <sup>4</sup>Guyu' tiop cuaa bejn nen guejdxga. Gala' guejdxga huililajz xtidx Dios nani gunii Pabl nájza Bernabé, <sup>5</sup>dxejc sgala' guejdxga bacuadiajg xtidx rexpejn Israel. Dxejc bire' te cuaa rexpejn Israel, nájza benzijt, nájza reguxhtis, rłajzreni nidxagdijłreni reapost, rłajzareneni nucuaareni guij yejc Pabl nájza Bernabé. <sup>6</sup>Dxejc gucbeerene xhi rłajzreni gunrene, ni'c baxunreni ro'c huijreni nez reguedx Licaonia, ro'c bidzujłreni guedx Listra, guedx Derbe, nájza reguejdx ni re' nejzga. <sup>7</sup>Che bidzujłreni ro'c, cadrotis huijreni basule'reni xtidx Dios.

<sup>8</sup>Guedx Listra guyu' te niguii ni digacdi sa, che gojłlini racxhuu ni'ni. <sup>9</sup>Cagucuadiajg niguiiga xtidx Pabl. Che bahuii Pabl lojni, gucbee Pabl rililajz niguiiga xtidx Dios, rililajzzani sajc gusiajc Diosni. <sup>10</sup>Dxejcti dip gunii Pabl lojni, räjpni:

—iHuisulii!

Dxejcti huisuyäl'ni, gusajni. <sup>11</sup>Che bahuii rexpejn Licaonia xhi bejn Pabl, lagajc xtiidxreni guniireni, räjpreni lo sa'reni:

—iRedios abiädłuiloj loonu si'c niguii!

<sup>12</sup>Gulälajreni Bernabé Júpiter, si'c laa tej rextiosreni. Dxejcti Pabl gulälajreni Mercurio, si'c laa stee rextiosreni, sa'csi laani rniiruni lo guiro'preni. <sup>13</sup>Dxejcti te bixhojz xten xquidoo Júpiter cua' tiop gon najł guii guejnreni. Biäd'näni regonga ro' xquidoo Júpiter ni suga' ro' guejdxga. Rebejn nájza bixhojz rłajzreni nugut'reni regon



te ganreni Bernabé nájza Pabl si'c rajnreni rextiosreni. <sup>14</sup>Che biejn diajg reapost xhi cayajc, batiájsreni tla' xhajibreni si'c te seen direni guichaglajz xhi cayujn rebejnnga. Ruxunreni bidzujnreni lo rebejn, rájpreni lo rebejn:

<sup>15</sup>—Colcuadiajg xtiidxnu.

¿Xhicuent cayujn guejbtu recosre? Ni lagajc sabejntu najcnu, lagajc beñ guedxliuj najcnu. Rusule'nu xtidx Dios lojtu te lacuaa ruzuxhijbtu lo redios ni runchee bejn, guzuxhijbtu lo Gueb Dios ni nabajn par tejpas, ni benchee xhaguibaa nájza guedxliuj, nájza nisdoo, nájza guiralii ni yu' lojreni, nenreni, <sup>16</sup>Galoo basaan Diosga gun reben guedxliuj si'ctis ni rlajzreni. <sup>17</sup>Huen najc Dios, rudeedni nisguij, rudeedni rajc xhi rajw rebejn, rdxaj xque'reni, rbaa lajzreni. Ni'cni rriembepacnu yu' Dios.

<sup>18</sup>Xhidajl diidx guniireni te cháii bejnreni gaan guredxi rebejn, sa'csi rlajzpac rebejn nugu'treni regon.

<sup>19</sup>Dxejcti bidzujñ gaii xpejn Israel siädreni guedx Antioquía nájza guedx Iconio. Baquiilreni reben Lистра te gucuaareni guij yejc Pabl. Bacuaareni guij yejc Pabl, gudobxhaxhrenini guläärenini ro' guejdxga, sa'csi naareni agujtni.

<sup>20</sup>Dxejc lañ ni suga' rexpejn Jesucrist guideb gabi cadro naga' Pabl, huistieni, biusacni guejdxga. Che bara yääl, huinäni Bernabé sääreni guedx Derbe.

<sup>21</sup>Che bidzujnreni guejdxga, basule'reni rextidx Dios lo rebejnnga. Xhidajlreni huililajz xtidx Dios. Dxejc gubi'reni, biu'reni guedx Lистра, nájza guedx Iconio, nájza

guedx Antioquía. <sup>22</sup>Balijdxreni rebejn nani huililajz xtidx Dios, gucnäjreni rebejnnga te batiplajz rebejnnga, rájpreni lo rexpejn Jesucrist:

—Colsnaj lajztu xtidx Dios. Susacsí rebejn la'tu, sidejdtu trabajw te jiu'tu cadro rnibee Dios.

<sup>23</sup>Dxejcti gule reapost gaii dade' ni najc bengool te fiireni rexquidoo xpejn Jesucrist. Che gulujx bacua'nreni, lañ ni guredx-gunabreni lo Dios, basadiidxreni rebejn, rájpreni: “Gacnäj Jesucrist la'tu ni huililajz xtiidxni.”

#### Gubisac guiro'preni guedx Antioquía xten Siria

<sup>24</sup>Che gudejd Pabl nájza Bernabé distrit Pisidia, bidzujnreni estad Panfilia. <sup>25</sup>Basule'reni xtidx Dios lo reben Perge, dxejcti biriireni ro'c sääreni guedx Atalia. <sup>26</sup>Che bidzujnreni guejdxga, biu'reni nen barcw, gudejdreri lo nisdoo te bidzujnreni stee guejdx ni laaza Antioquía. Ni'c najc guejdx ni biriireni che sääreni. Lo guejdxre yu' rexpejn Jesucrist ni gunab lo Dios xcuentreni, gacnäj Diosreni, baxhañreni Pabl nájza Bernabé chasule'reni xtidx Dios nen guiraa reguejdx. Naj abaluux Pabl nájza Bernabé dzuunga. <sup>27</sup>Che bidzujnreni guejdxga, bachagsa' rexpejn Jesucrist. Dxejcti bijreni diidx lo rebejnnga guira'ti ni bennäj Dios laareni, nájza xho badeed Dios huililajz rebenzijt nani digac rexpen Israel. <sup>28</sup>Xchej biannäjreni rexpejn Jesucrist ro'c.

#### Bidxagsa'zareneni nen guedx Jerusalén

**15** Nen redxejga bidzujñ gaii dade' ni siäd nez Judea,

caguluiireni rexpejn Jesucrist, räjpreni lojreni:

—Palga ditu gusal̄ bee si'c gunibee toMoisés, di Dios guslaatu lo xtojltu.

<sup>2</sup>Che biejn diajg Pabl nājza Bernabé rediidxga, bidxagdijlreni redade'ga. Dxejc gule rexpejn Jesucrist Pabl nājza Bernabé nājza sgaii rexpejn Jesucrist chääreni guedx Jerusalén te guininäjreni reapost nājza rebengool te guidon xho gac xcuent beega.

<sup>3</sup>Huisunejz rexpejn Jesucrist ni najc bejn Antioquía Pabl nājza rebejn ni sanäjreni, sääreni guedx Jerusalén. Gudejdreni reguedx Fenicia, nājza reguedx Samaria. Cadrotis gudejdreni bijreni diidx lo rexpejn Jesucrist ahuililajz rebenzijz xtidx Dios. Bibalazduxh rexpejn Jesucrist che biejn diajgreni rediidxga.

<sup>4</sup>Che bidzujnreni guedx Jerusalén, huichagloj rexpejn Jesucristreni. Dxejcti bij Pabl nājza Bernabé diidx lo reapost, lo rebengool nani rnibee rexpejn Jesucrist, nājza lo rexpejn Jesucrist, guiraa redzunro nani cayunnäj Diosreni. <sup>5</sup>Dxejc huisulii gaii refarisee ni ahuililajz xtidx Dios, räjpreni lojreni:

—Che chalilajz rebenzijz xtidx Dios, nanab chureni bee, nanabza gusoobreni leii xten toMoisés.

<sup>6</sup>Dxejcti bachagsa' reapost nājza rebengool nani rnibee rexpejn Jesucrist, te don xho gunreni.

<sup>7</sup>Huisulii Pedr, räjpnii lojreni:

—Guejbtu, resa'ä, anajntu xho bejn Dios gubalti ijz. Gule Dios narä lo guiraanu te gusule'ä xtidx Dios loj rebenzijz, te chalilajzreni xtidx Dios. <sup>8</sup>Luxh Dios, nani numbechee

lastoo guiralii bejn, badeed seen huililajzpac rebenzijz xtiidxni.

Badeed Dios Sprit Dxi xtenni lojreni si'c te seen te gacbee bejn najcreni xpejnii. Sigac baniidxni Sprit Dxi xtenni loonu galoo, si'cza badeednini lo rebenzijz.

<sup>9</sup>Sigajc rinälajz Dios nuunu, sigajcza rinälajzni rebenzijz. Che huililajz rebenzijz xtiidxni, basia Dios lastooreni. <sup>10</sup>Naj çhxicuent rusieedu Dios, ä? Di niajcdi nisanäj retoxtadnu releiiga, digacdiza chosanäjnu releiiga naj. Çhxicuent rlanjtu chasanäj rebenzijz releiiga? <sup>11</sup>Xhet si'cti gacni sa'csi Dios ruslaa nuure lo xtojlnu che rililajznu xtidx Jesucrist, luxh si'cza ruslaani rebenzijz lo dojl che rililajzreni xtidx Jesucrist —räjpnii Pedr.

<sup>12</sup>Che gulujx gunii Pedr, dxitis gurej rebejn, bacuadijgreni xtidx Bernabé, xtidx Pabl. Guiro'preni bijreni diidx xho cayujn Dios redzunro, remilagwr nez lo rebenzijz.

<sup>13</sup>Che gulujx gunii guiro'preni, xhet guniidi rebejn. Jacoobtis räjpnii lojreni:

—Sa'ä, colcuadijg xtidxä.

<sup>14</sup>Agunii Simón ni rniireni Pedr lojtu xho ganiddoo baxhal̄ Dios laani lo rebenzijz te gurejdx Dios rexpejnii ni nadxaag lo rebenzijz.

<sup>15</sup>Luxh si'cza caj lo guijtz. Agujc xcheroduxh bacuaa reniguii nani gunii xtidx Dios, che räjpnii:

<sup>16</sup>Sidzujn dxej ni guibisacä.

Sunä guzuxhijb guiraa rebejn nez loä si'c bazuxhijb rexpejn Israel che gubajñ toDavid. Si'c gunä,

<sup>17</sup> te jiädgajñ rebejn narä te gacä Xtiosreni,

näjza guiraa rebenzijt nani najc rexpənä jiädgajñ narä,

<sup>18</sup> si'c räjp Dios nani galooli

baluiloj guiraa redzuunre.

<sup>19</sup> Dxejcti räjp Jacoob lojreni:

—Dee najc xhigab ni runä.

Na'cru gusieednu rebenzijt ni cagusiechlajzreni, renani salilajz xtidx Dios. <sup>20</sup> Gucuaanu te guijt, jie'tznu lo rebenzijt: Na'c gaureni xhi cos ni basuj bejn loj rebanäjb, sa'csi dinu chalilajz xcuent rebanäjb. Na'cza guesnäjreni bejn ni di gac chäälni, na'cza gaureni bääl nani gurerejn, na'cza gaureni rejn. <sup>21</sup> Dee gucuaanu te di guche'chreni xpejn Israel sa'csi neñ guiraa reguejdx galooli yu' rexpelj Israel nani rol leii xten toMoisés gasob sabd —räjp Jacoob.

<sup>22</sup> Che biejn diajg reapost näjza rebengool nani rnibee, näjza guiraa rexpelj Jesucrist xtidx Jacoob, bichagljazreni xtiidxni. Dxejcti gulereni tiop sa'reni chanä Pabl näjza Bernabé guedx Antioquía. Gulereni Judas ni rniireni Barsabás näjza Silas. Guiro'preni najc bejn ni sajru loj rexpelj Jesucrist.

<sup>23</sup> Dxejcti bejnreni guijt xhuinäreni. Bacuaareni rediidxre:

“Nuure reapost, näjza rebengool ni rnibee, näjza rexpelj xquidoo Jesucrist ruxhalñu xtixtios lojtu, resa'nu nani rbäjz guedx Antioquía näjza estad Siria näjza estad Cilicia. <sup>24</sup> Rucuaanu guijtze sa'csi biejn diaagnu birii gaii resa'nu ree biädsieedreni la'tu con xtiidxreni, cayu'tu yärsia' sa'csi najreni lojtu nanab chutu bee si'c gunibee

toMoisés, guibajñzatu si'c rniie leii xten toMoisés. Xhet nuudinu gunibeenu jiädniireni si'c. <sup>25</sup> Ni'cni bienu xhigab guxhalñu lojtu tiop dade' ni gulenu loj resa'nu te chanäreni Bernabé näjza Pabl, nani sanälaaznu. <sup>26</sup> Agajc balti huält rlazjreni nugu'treni Bernabé näjza Pabl, luxh direni guidxejb gusule'reni xtidx Jesucrist. <sup>27</sup> Naj ruxhalñu Judas näjza Silas lojtu. Laareni susule'za guiraa rediidxre lojtu. <sup>28</sup> Tejsi najc xhigabnu con Sprit Dxaan xten Dios. Di rlaaznu gutaalrunu leii ni chasanäjtu. Releitis nani nanab rusoobnu rucuaanu lojtu. <sup>29</sup> Na'c gautu xhicos ni basuj bejn lo rebanäjb, sa'csi dirunu chalilaaz xcuent rebanäjb. Na'cru gautu rejn, na'cza gautu bääl nani gurerejn, na'cza guesnäjt nani digac chäältu. Palga gusoobtu recosre, laaca cayujntu. Sacrü guibajntu. Sujiannäjtu Dios.”

<sup>30</sup> Dxejcti basadiidx rexpelj Jesucrist Judas näjza Silas huinäreni Pabl näjza Bernabé guedx Antioquía. Che bidzujñreni ro'c batojpreni guiraa rebejn nani huililajz xtidx Dios te bilñreni guijtza lojreni. <sup>31</sup> Che biejn diajg rexpenzit Jesucrist diidx ni caj lo guijtza, bibalazduxhreni sa'csi gulecdxi diidxga lastooreni. <sup>32</sup> Dxejcti basule' Judas näjza Silas xtidx Dios lojreni, sa'csi rudeed Dios xtiidxni loj guiro'preni. Xhidajl diidx guniireni te balijdxreni rexpelj Jesucrist. Lacti gulecdxi rediidx ni guniireni lastoo guiraa rexpelj Jesucrist. <sup>33</sup> Ro'c bia'nreni xchej, dxejcru cuäjb rexpelj Jesucrist gubi'reni te gudeedreni xtixtios lojreni baxhalñreni.

<sup>34</sup>Dxejc Silas bejn xhigab jia'n'ni ro'c. <sup>35</sup>Luxh Pabl nájza Bernabé bia'n guedx Antioquía. Guiro'preni baluui, basule'reni xtidx Dios loj rebejn. Guyu'za sgaii dade' ni gucnájreni.

**Huihuisac Pabl rexpejn Jesucrist  
neñ guiraa reguejdx**

<sup>36</sup>Che gudejd xhidajl dxej, rájp Pabl lo Bernabé:

—Do'o guibi' lo guiraa reguejdx cadro basule'nu rextidx Dios te chohuuiu don xho yu' rexpejn Jesucrist.

<sup>37</sup>Niluxh Bernabé rlanj chanäreni Juan ni laa Marcw. <sup>38</sup>Naaddi Pabl chááni, sa'csi birii Marcw lojreni che guyu'reni nez Panfilia, diruni nisianäj Pabl nájza Bernabé. <sup>39</sup>Dxejc gudildiidxreni. Gubicajtireni lo sa'reni. Ni'c saná Bernabé Marcw, biu'reni neñ barcw, sääreni Chipre ni re' galáii nisdoo. <sup>40</sup>Dxejcti Pabl gule Silas te sanänini. Badeed rexpejn Jesucrist xtixtios lojreni, rájpreni gacnäj Diosreni. <sup>41</sup>Lal ni sasajreni gudejdreni guiraa reguedx Siria nájza guiraa reguedx Cilicia, ro'c gucnájreni guiraa rexpejn Jesucrist, basule'rurenit xtidx Jesucrist lojreni.

**Huinä Timoteu Pabl náj Silas**

**16** Bidzunsac Pabl nájza Silas reguedx Derbe nájza Listra. Ro'c bidxaagreni te xpen Jesucrist ni laa Timoteu. Xnanni najc beñ Israel ni huililajx xtidx Jesucrist. Xtadni najc beñ griegw. <sup>2</sup>Didxsa'ctis rnii rexpejn Jesucrist ni yu' Listra nájza Iconio xcuent Timoteu. <sup>3</sup>Rlanj Pabl chanäni

Timoteu. Dxejcti basäl Pabl bee Timoteu te gujcnit si'c xpen Israel, te xhet naadi rexpejn Israel, sa'csi guiraareni nanchee xtad Timoteu najc beñ griegw. <sup>4</sup>Che bidzujnreni cade tej reguejdx, basule'reni xtidx reapost nájza rebengool nani rnibee xpen Jesucrist guedx Jeurusalén, te gusoob rexpejn Jesucrist diidx ni bacuaareni lo guijtz. <sup>5</sup>Bazutijp xtidx Dios lastoo renani huililajx xtidx Jesucrist. Guixe-guixee xhidajlru bejn huililajx xtidx Dios xcuent Jesucrist.

**Lo te bacal gunii te niguui lo Pabl**

<sup>6</sup>Che gudejdreni distrit Frigia, nájza estad Galacia, di Sprit Dxan xten Dios nusaan nusule'reni xtidx Jesucrist neñ reguedx Asia. <sup>7</sup>Bidzujntireni gajxh estad Misia. Dxejc rlanjreni nijreni estad Bitinia, niluxh di Sprit Dxan xten Dios nusaan nijreni ro'c. <sup>8</sup>Ni'c gudejdtireni stelaad estad Misia, bidzujnreni guedx Troas. <sup>9</sup>Te yääl si'c lo te bacal bahuui Pabl suga' te beñ Macedonia. Canabduxh niguiiga lo Pabl, rájpnit: —Gudaa ladxä, estad Macedonia, te gacnäjlru nuunu. <sup>10</sup>Che bara yääl ni gunixcal Pabl, gudilgajcnu te barcw te chonnu estad Macedonia, sa'csi gucbeenu Dios najc nani caguxhal nuure te guluuini xtiidxni lo reben Macedonia. Narä, Lucas, ni cagucuaä rediidxre, gusanää Pabl nájza Silas.

**Che guyu' Pabl con Silas  
guedx Filipos**

<sup>11</sup>Biu'tinu neñ barcw ro' guedx Troas. Bidzunnu Samotracia, te yuj

ni re' neñ nisdoo. Che bara yääl bidzunu guedx Neápolis. Ro'c biriinu neñ barcw, <sup>12</sup>bionnu guedx Filipos, guejdx nani sajcrn lo estad Macedonia. Guedx romanni. Ro'c bia'nnu tiop choñ dxej. <sup>13</sup>Che gojl sabd, dxej ni rusilajz rexpejn Israel, biriinu guejdxga bionnu ro' te gueuu, sa'csi biennu xhigab ro'c jiääd rexpejn Israel te guininäjreni Dios. Ro'c gurejnu, guniinu lo renane' nani bire' ro'c. <sup>14</sup>Lojreni nadxaag te nane' ni laa Lidia, te benzijt ni digac xpejn Israel. Guedx Tiatira siäädni. Ruto'ni ladmuraad ni sacduxh. Rajñ gunaaga Dios si'c rajñ rexpejn Israelni. Bacuadiajgni xtidx Jesucrist ni cagusule' Pabl. Gucnäj Dios nane'ga te huililajzni xtiidxni. <sup>15</sup>Birobnisni, näjza guiraa reni rbäjz rolizjni. Dxejc guniini loonu:

—Palga ruhuiitu guliä rililazä xtidx Dios, coltaa rolizä te ro'c cuäätzu.

Lacti gunab nane'ga nuunu, ni'c huijia'nnu rolizjni.

<sup>16</sup>Te dxej cheni sionnu cadre rinäj bejn Dios, bidxaagnu te dxa'p nani yu' te bendxab neñ lastooni. Rajp rexpaxhuaanni melduxh sa'csi rusule' dxa'pga recos ni gajd gac. <sup>17</sup>Birinajl dxa'pga Pabl näjza nuure. Rbedxa' dxape'ga, räjpni:

—Reniguiire najc xmos Dios nani rnibee guideb guedxliuj. Ruluiireni loonu xho laanu lo xtojlnu —räjp dxape're.

<sup>18</sup>Balti dxej birinajl dxape'ga nuure, entis caniini rediidxga lo rebejn. Lacti basieed dxape'ga Pabl, ni'c gubiréni, räjpni lo bendxab ni yu' neñ lastoo dxape'ga:

—Xcuent xcälrnibee Jesucrist rniä lojlu: “Birii neñ lastoo dxape'ga.”

Lagajc dxejc birii bendxab neñ lastoo dxape'ga.

<sup>19</sup>Che bahuii rexpaxhuaan dxape'ga diru dxape'ga gun gaan melro, gunaazreni Pabl näjza Silas. Dxejcti gudobxhajxhrene guiro'preni nez roguii cadre suga' reguxhtis. <sup>20</sup>Che bidzunnäjreni Pabl näjza Silas lo reguxhtis, räjp rexpaxhuaanni lo reguxhtis:

—Reniguiire najc xpejn Israel. Cayujreni biey lo guejdxre.

<sup>21</sup>Caguluiireni garenca leii nani digacdi gusoobnu sa'csi najcnu ben roman.

<sup>22</sup>Dxejcti bidxehnäj rebejn Pabl näjza Silas. Gunibee rejuejz gulääreni xhajn Pabl, näjza xhajn Silas, te batiäjreni baar guideb tiejxh guiro'preni. <sup>23</sup>Che gulujx gudinduxhrene Pabl näjza Silas, biäureni neñ latzguiib. Dxejcti räjp reguxhtis lo reguixhajc:

—Colgapdzu'tzreni, di gusaantu guiriireni.

<sup>24</sup>Basäl guixhajgreni neñ latzguiib. Guyu' ni'reni neñ te baräjd ni sojb gueed te di guxunreni.

<sup>25</sup>Garolyäl guninäj Pabl näjza Silas Dios, gusloj cayolreni dij ni rliä'p xpala'n Dios. Biejn diajg guiraa rebejn ni yu' neñ latzguiib cayolreni. <sup>26</sup>Chela gujc te xuduxh, basniib guideb latzguiibga. Bixal guiraa repuert, birucya' guiraa recaden, bixal ro' rebaräjd cadre naaz ni'reni. <sup>27</sup>Che gubajn guixhajc ni canäj latzguiib, bahuiini naxhal latzguiib, gulääni spaad xtenni, te rlajzni nugu'tni lagajc laani, sa'csi

naani abadxuñ reni niäu nen latzguiib. <sup>28</sup>Dxejc guredxa' Pabl, räjpni lo guixhajga:

—Na'c gunlu si'c. Bahuii, guiraliinu suga'nu ree.

<sup>29</sup>Dxejc gunibee guixhajg biääd te bajl te biu'ni nen latzguiib. Racsejsni biäädni bazuxhijbni nez loj Pabl näjza nez loj Silas. <sup>30</sup>Dxejcti gulää guixhajgreni nen latzguiib. Gunabdiidxni räjpni lojreni:

—iColguinii, dade! ¿Xhini'c nanab gunä te guslaa Dios narä lo dojl?

<sup>31</sup>Räjp Pabl näjza Silas lo guixhajg:

—Huililajztis xtidx Dios xcuent Jesucrist, luj näjza guiraa reni yu' rolijzlu, te guslaa Diostu lo dojl.

<sup>32</sup>Basule' Pabl näjza Silas rextidx Dios lojni näjza loj guiraa rebejn ni yu' rolijzni. <sup>33</sup>Lagajc dxejc, garol yääl, huinä guixhajgreni gudiibni dejtzeni cadro batiuug baarreni. Dxejcti batiobnisreni guixhajg näjza guiraa reni yu' rolijzni. <sup>34</sup>Dxejc huinä guixhajgreni rolijzni, ro'c badeedni xhi gudajwreni. Laani näjza guiraa reni yu' rolijzni bibalazduxhreni sa'csi huililajzreni xtidx Dios.

<sup>35</sup>Che bara yääl, baxhal reguxhtis stiop guixhajg räjpni lo guixhajg nani cuanäj latzguiib:

—Baslaa reniguiiga.

<sup>36</sup>Dxejcti huiye'tz guixhajga lo Pabl, räjpni:

—Anaj reguxhtis guslaätu. Naj colchäj, gacnäj Dios la'tu, saru chäätu.

<sup>37</sup>Niluxh räjp Pabl loj reguixhajg:

—Nuure najczanu beñ roman. Batiäjlni baar detznu nez loj

guiraa rebejn. Nicla niniabdiidxreni la yu' xhi dojl biennu. Basäureni nuure nen latzguiib. Leii xten roman di gusaan gac rebeñ roman si'c. Luxh naj rrajzreni guslaareni nuure xhiga'tz. iDinu guirii si'c! Lagajc laareni sujiädslääreni nuunu.

<sup>38</sup>Che huiye'tz reguixhajg diidxga lo reguxhtis, bidxebduxhreni che biejn diajgreni beñ roman najc Pabl näjza Silas. <sup>39</sup>Dxejcti biääd reguxhtis, gulääreni Pabl näjza Silas, gunabreni jiajllajzreni. Gunabduxhreni lo Pabl näjza Silas; räjpreni:

—Coljiunejz guejdxre.

<sup>40</sup>Che biriireni nen latzguiib, huijreni rolijz Lidia. Baliidxreni rexpejn Jesucrist, gulecdxireni lajz rexpejn Jesucrist. Dxejc biunejzreni guejdxga.

### Cadxechduxh guiraa rebeñ Tesalónica

**17** Che gudejdreni reguedx Anfípolis, näjza guedx Apolonia, bidzujnreni guedx Tesalónica cadro yu' te xquidoo rexpejn Israel. <sup>2</sup>Ro'c basule' Pabl xtidx Dios si'c ni rujnpacni. Chon sabd, dxej ni rusilajz rexpejn Israel, basule'ni xtidx Dios lojreni. <sup>3</sup>Basule' Pabl xtidx Dios ni caj lo guijtzi ni bacuaa reniguii ni gunii xtidx Dios galooli. Caj lo guijtza: “Nanab ted Crist trabajwduxh, guetni, niluxh sibansacni lo rebengut.”

Dxejc räjp Pabl lojreni:

—Ruiä lojtu diidx xcuent Jesús; lagajc Jesúsre najc Crist —räjpni.

<sup>4</sup>Yu' rexpejn Israel huililajz xtidx Dios, gusanäjreni Pabl näjza Silas. Näjza xhidalduxh beñ griegw nani

rajn̄ Dios nájza xhidajl reguna griegw ni sajcru huililajz xtiidxni. <sup>5</sup>Luxh yu' rexpejn̄ Israel ni di chalilajz, ni bidxechlajz. Batie'reni gaii benp̄loj, benlatsiaj, bejnreni bieje nez galáii. Biu'reni rolizj Jasón caguuilreni Pabl nájza Silas te cuäääreni guiro'preni nez lo rebejn̄. <sup>6</sup>Niluxh che direni nidxäl Pabl nájza Silas, alga Jasón guläääreni nájza gaii renani rililajz xtidx Dios, sanäääreni redee lo reguxhtis, cabedxa'reni:

—Reniguiire ni abejn bieiduxh guideb guedxliuj abidzujn̄reni laadxnu, <sup>7</sup>luxh badeed Jasón rolizjni jia'nreni. Direni gusoob leii xten César, najreni yu' stee reii ni laa Jesús.

<sup>8</sup>Che biejn diajg reguxhtis nájza rebejn̄ diidxre, guyu'reni yärsia'. <sup>9</sup>Cua' reguxhtis meel lo Jasón nájza lo reexamigwni. Räj̄p reguxhtis sudedsacreni meelga che jii Pabl nájza Silas, jiunejzreni lo guejdxga. Dxejcti baslaareni Jasón nájza reexamigwni.

#### **Che guyu' Pabl con Silas guedx Berea**

<sup>10</sup>Che biu' guxhijn̄, baxhalgajc rexpejn̄ Jesucrist Pabl nájza Silas ste guejdx ni laa Berea. Che bidzujn̄reni guejdxga, biugajczeni xquidoo rexpejn̄ Israel. <sup>11</sup>Hueenru najc reben̄ Berea loj reben̄ Tesalónica, sa'csi rbaali lajzreni bacuadijgzeni xtidx Pabl ni guniini xcuent Jesucrist. Guixe-guixee bilreni guijtz cadro caj xtidx Dios te gucbeereni la guli rextidx Pabl. <sup>12</sup>Xhidajl rexpejn̄ Israel nájza xhidajl ben̄ griegw ni sajcru, gunaa sigajc niguii, huililajz xtidx Dios.

<sup>13</sup>Che gucbee rexpejn̄ Israel ni rbäjz guedx Tesalónica caguluii Pabl xtidx Dios guedx Berea, biäääreni guedx Berea. Che bidzujn̄reni lo guejdxga bejnreni bieje ro'c.

<sup>14</sup>Dxejcti baxhal rexpejn̄ Jesucrist Pabl, huijni ro' nisdoo. Niluxh Silas nájza Timoteu bia'n guedx Berea. <sup>15</sup>Dxejcti rebejn̄ ni guzanäj Pabl huinänini guedx Atenas. Ro'c räj̄p Pabl lo rebejn̄ ni biädñani gudeedreni diidx lo Silas nájza Timoteu jiädgajczeni lojni. Dxejcti rebejn̄ ni sanä Pabl gubisac guedx Berea.

#### **Guyu' Pabl guedx Atenas**

<sup>16</sup>Lał ni guläjz Pabl guedx Atenas, guyuduxhni yärsia' sa'csi bahuiini rajn̄ guiraa rebejn̄ rebanäj̄b nani runchee lagajc bejn̄. <sup>17</sup>Ni'c nen̄ xquidooreni gudildiidx Pabl rexpejn̄ Israel nájza reben̄zijt ni rajn̄ Dios si'c rajn̄ rexpejn̄ Israelni. Guixe-guixee gudildiidxni chutis bejn̄ ni re' lo guii. <sup>18</sup>Dxejcti biääad gaii bejn̄ lojni. Yu' reni rołduxh guijtz ni bacuaa epicúreos, yu'za renani rołduxh guijtz ni bacuaa estoicos, gudildiidxreni Pabl. Yu' reni räj̄p lo sa'reni:

—¿Xhicha guinii bejn̄re loonu? Entis naxhal ro'ni.

Yu'zaren̄i räj̄p lo sa'reni:  
—Pet calä'pni xpala'n tiop dioscoob.

Si'c guniireni sa'csi biejn̄ diajgzeni bazä't Pabl “Jesús” nájza “Resurreccion”, ni säloj yäl̄gubansac lo rebengut. <sup>19</sup>Dxejcti gunaazreni Pabl sanärenini nez dajn̄ ni laa Areópago. Ro'c yu' si'c te jusgaad. Räj̄preni lo Pabl:



—Rlaaznu gacbeenu xhi diidx ruluiilu, <sup>20</sup>sa'csi rujylu diidx nani dinu jiacbee. Ni'cni bejn huen, basule' diidxre loonu te gacbeenu xhi sálojreni —räjpreni.

<sup>21</sup>Reben Atenas näjza rebenzijt ni yu' ro'c rutedreni redxej rniireni didxcoob lo sa'reni, o rucuadaiajgrendi didxcoob. Ni'cpac rchaglajzreni.

<sup>22</sup>Galäii Areópago huisulii Pabl, räjpni lojreni:

—Colcuadiajg guejbtu, ben Atenas. Abahuiä xho randuxhtu xhidajl banäjb. <sup>23</sup>Che siädsaa' lo guejdxre, bahuiä lo rexpanäjbtu. Bahuiäza loj te piään cadro caj rediidxre: “Dios ni dinu jiembee.” Narä ranä Diosga. Rumbeä Diosga nani rajntu mase ditu gumbeeni. Susule'ä xtiidxni lojtu.

<sup>24</sup>Räjp Pabl:

—Diosre benchee guedxliuj näjza guiralii ni yu' lo guedxliuj, sa'csi rnibeeni xhaguibaa näjza guedxliuj. Di Diosre cuääz lo piään niclaza nen reguidoo ni runchee bejn. <sup>25</sup>Diza Diosre guiquiin chu gacnäjni sa'csi lagajc Diosre rudeed yäl'nabajn, yäl'nadaan, näjza guiralii nani rquiin reben guedxliuj.

<sup>26</sup>Räjp Pabl:

—Guiralii reben guedxliuj najc rexagdo tejsi gunaa näjza tejsi niguii. Desde galooli gunibee Diosga bal ijz chu renacion, näjza cati gunibee renacionga. <sup>27</sup>Benchee Dios guiraa reben guedxliuj te quiiireni Dios te chalilajzreni xtiidxni. Luxh suga' Dios gajxh cadetejnu, <sup>28</sup>sa'csi Dios rujn nabajnnu lo guedxliuj, runiidxni rsiaan lo guedxliuj, runiidxzani

rdajlru xcäl'nabannu lo guedxliuj. Laaca bacuaa rexpennajntu: “Najcnu xi'n Dios, sa'csi benchee Diosnu.” <sup>29</sup>Ni'cni, sa'csi najcnu xi'n Dios, di nungäjl jiennu xhigab najc Dios si'c rebanäjb ni nac-chee pla't, o guij, o yajg si'ctis ni runchee bejn rexpanäjbtu. <sup>30</sup>Nen redxej ni di bejn niembee Dios, diza Dios niujn castiigwreni. Niluxh naj gunibee Dios gusiechlajz guiraa rebejn, <sup>31</sup>sa'csi abasoobni te dxej cheni gac Jesús juejz lo guiraa reben guedxliuj. Agule Diosni gacni juejz, sa'csi rumbechee Jesucrist chu najc benguijdx, chuza najc bensa'c. Rnili Jesucrist rediidx ni najc guliitis. Guläs Dios Jesucrist, baspansacnini lo rebengut, te gacbeenu rajp Jesucrist yäl'nibee lo guiraa recos.

<sup>32</sup>Che biejn diajg rebejnga gubansac Jesucrist lo rebengut yu' reni baxhiznäj xtiidxni. Yu'za reni räjp:

—Sucuadaiajgrunu xcuent ni rusule'lu.

<sup>33</sup>Dxejcti birii Pabl lojreni.

<sup>34</sup>Yu'za reni huinajlni, huililajzreni xtidx Dios. Lojreni nadxaag te dade' ni laa Dionisio ni najc te juejz lo Areópago; näjza te nane' ni laa Dámaris. Guyu'za sgaii bejn ni huililajz.

Guyu' Pabl guedx Corinto

**18** Biriiti Pabl guedx Atenas, huijni guedx Corinto. <sup>2</sup>Ro'c bidxaagni te dade' ni najc ben Israel, ni laani Aquila. Ponto najc lajdxni. Biädgajni ro'c, biriini Roma, sa'csi gunibee reii Claudio guirii guiraa rexpejn Israel guedx

Roma. Birinäj Aquila Priscila chäälni. Biriireni Italia, biäädreni guedx Corinto. Bihuii Pablreni, <sup>3</sup>sa'csi lagajc dzuun ni rujnreni rujnzani. Tejsi lajt guläjzreni te bejn jionreni tejsi dzuun. Runcheereni yuguijd. <sup>4</sup>Gasob sabd, dxej ni rusilajz rexpejn Israel, basule' Pabl xtidx Dios neñ xquidoo rexpejn Israel. Rlajzni chalilajz rexpejn Israel näjza beñ griegw ni digac xpejn Israel diidx ni rniini xcuent Jesucrist.

<sup>5</sup>Dxejcti birii Silas näjza Timoteu Macedonia. Che bidzujnreni guedx Corinto, gusloj rusule'tis Pabl xtidx Dios guixe-guixee, guniliini lo rexpejn Israel:

—Jesús najc Crist ni runloj rexpejntu guxhal Dios.

<sup>6</sup>Dxejc bidxehnäj rexpejn Israelni, guniyazareni xtiidxni. Dxejcti gubijb Pabl xhajbni si'c te seen diruni jiureni, caguro'nnireni. Räjzani lo rexpejn Israel:

—Lagajc la'tu rajptu dojl nittu lo Dios. Xhet dojldi rapä narä. Aguniä xtidx Jesucrist lojtu. Naj lo rebejn nani di gac beñ Israel gusule'ä xtidx Jesucrist —räjpn.

<sup>7</sup>Dxejcti biriini lojreni, huijni roliz Justo, te bejn ni rajn Dios si'c rajn rexpejn Israelni. Rolizni sojb cuä' xquidoo rexpejn Israel. <sup>8</sup>Crisp, ni rnibee xquidoo Israel, huililajz xtidx Jesucrist. Huililajzza guiraa reni rbäjz rolizni. Xhidajlza beñ Corinto huililajz xtidx Jesucrist, dxejcti birobnisreni. <sup>9</sup>Gojl te yääl gunii Dios lo te bacal, räjpni lo Pabl:

—Na'c guidxeyblu. Guniitis, na'c gusäulu ro'lu, <sup>10</sup>sa'csi narä suganää

luj. Rut gacdi gun latsiajlu. Aguleä xhidalduxh bejn lo guejdxre te gacreni xpenä —räjp Dios.

<sup>11</sup>Ni'c bia'n Pabl ro'c tebizgarol. Baluiini xtidx Dios lojreni.

<sup>12</sup>Che gujc Galíon gubernadoor xten Acaya, tejsi xhigab bejn rexpejn Israel bidojpreni te gunaazreni Pabl. Sanäreni Pabl jusgaad cadro yu' Galíon.

<sup>13</sup>Räjzreni lo Galíon:

—Niguiire cagulunii rebejn ganreni Dios garenca mood, xhet si'cti ni caj lo xleiinu —räjzreni.

<sup>14</sup>Agojl ninii Pabl, che räjp Galíon lo rexpejn Israel:

—Palga gulanni o bagu'tni te bejn, dxejc yu' xtojlni te gucuadiagä xtiidxtu. <sup>15</sup>Per la'tu cadxe'chtu xcuent diidx, xcuent laj bejn, xcuent ni caj lo leii xtentu. Gubernadoor narä, xho gucuadiagä diidxga. Lagajc la'tu colchahuii xho guntu yälguxhtis —räjp Galíon.

<sup>16</sup>Gunibee Galíon barilaagw resoladaad rexpejn Israel. <sup>17</sup>Dxejc gunaaz reGriegw Sóstenes nani rnibee xquidoo rexpejn Israel. Batiäjlni baar dejtz Sóstenes nez ro' jusgaad xten Galíon. Niluxh niela niu Galíonreni.

### Chon huält huihuii Pabl rexpejn Jesucrist

<sup>18</sup>Bia'nti Pabl Corinto xchej. Dxejc badeed Pabl xtixtios lo rebejn nani huililaz xtidx Jesucrist, biriini ro'c. Sanäni Priscila näjza Aquila, biu'reni neñ barcw te siireni nez estad Siria. Dxejc ganid gudejdreni guedx Cencrea, cadro bahuaj Pabl yejcni si'c te seen yu' xhi diidx bia'nni con Dios. <sup>19</sup>Che bidzujnreni

guedx Éfeso, basa'n Pabl Priscila nájza Aquila ro'c. Biu' Pabl xquidoo rexpejn̄ Israel, ro'c bachaagni diidx con rexpejn̄ Israel. <sup>20</sup>Dxejcti che gunabreni jia'n Pabl ro'c xchej, naaddini jia'n̄ni. <sup>21</sup>Badeedni xtixtios, rájpn̄i lojreni:

—Nungäjlpac chatedä laniro guedx Jerusalén. Siälsacä ree palga gusaan Dios jiälä.

Biusacni nen̄ barcw, biriini guedx Éfeso. <sup>22</sup>Che bidzuj̄nni guedx Cesarea, biriini nen̄ barcw, huijni guedx Jerusalén. Che bidzuj̄nni, guniini xchan lo reapost nájza lo rexpejn̄ Jesucrist. Dxejc huijni guedx Antioquía xten Siria. <sup>23</sup>Che gudejd balti dxej, biriini guejdxga, gudejdni guideb estad Galacia nájza guideb distrit Frigia. Nen̄ cade tej reguejdxga, balijdxni rexpejn̄ Jesucrist te gutijpru lajzreni.

#### Baluii Apolos xtidx Dios nen̄ guedx Éfeso

<sup>24</sup>Nen̄ redxejga, te dade' ni laa Apolos bidzuj̄n̄ guedx Éfeso. Najcni xpejn̄ Israel, gojlni guedx Alejandría xten Egipto. Lacti rajc rnisa'cni, nanduxhzani xtidx Dios. <sup>25</sup>Nanduxhni xtidx Dios xcuent Jesucrist. Laaca basule'ni xtidx Dios, guideb xcäl̄nabaj̄nni rinälajzni Dios. Niluxh xcuent Jesucrist najntisni yäl̄robnis xten Juan. <sup>26</sup>Nicla nidxejb Apolos gusloj caniini nen̄ guidoo xten rexpejn̄ Israel. Che biejn̄ diajg Priscila nájza Aquila xtixdxni, huinärenini rolizreni. Ro'c basule'rureni xtidx Dios nani gajdni gan. <sup>27</sup>Dxejc, sa'csi abejn̄ Apolos xhigab chääni reguejdx ni tre' nez Acaya, bacuaa rexpejn̄

Jesucrist guijtz lo rexpejn̄ Jesucrist ni yu' nen̄ reguejdxga te gacnäjreni Apolos. Gucnäduxh Apolos rebejn̄ nani badeed Dios huililajz xtidx Dios nen̄ reguejdxga, <sup>28</sup>sa'csi gunilii Apolos nez loj guiraa rebejn̄ xhet laadi rnii rexpejn̄ Israel. Di niajcdi nuzejc rexpejn̄ Israel diidx lo Apolos sa'csi ganax con xtidx Dios ni bacuaa reniguii ni gunii xtidx Dios galoo basule'ni: “Jesús najc Crist nani cayunlojtu guxhaḷ Dios.”

#### Guyu' Pabl guedx Éfeso

**19** Laḹ ni guyu' Apolos guedx Corinto, huij Pabl xhidajl reguejdx nen̄ región Asia, dxejcti bidzuj̄nni guedx Éfeso cadro bidxaagni gaii bejn̄ nani huililajz xtidx Dios. <sup>2</sup>Gunabdiidx Pabl lojreni:

—Che huililajztu xtidx Dios, ¿la biäd̄lajz Sprit Dxan xten Dios nen̄ lastootu, ä?

Räjpreni lojni:

—Nicla gajd diajgnu jiejn̄ la yu' te Sprit Dxan xten Dios.

<sup>3</sup>Räj̄p Pabl lojreni:

—¿Xho birobnistu, pues?

Räjpreni lojni:

—Birobnisnu si'cni baluii Juan tiobnis bejn̄.

<sup>4</sup>Dxejcti räj̄p Pabl lojreni:

—Guliiica bastiobnis Juan che basiejch lajz rebejn̄ xtoj̄lreni. Räj̄pza Juan lo rebejn̄: “Coḷchalilajz xtidx bejn̄ ni siäd̄ detzä.” Bejn̄ ni basä'tni najc Jesucrist —räj̄p Pabl.

<sup>5</sup>Che biejn̄ diajgreni rextidx Pabl birobnisreni te gacbee rebejn̄ najcreni xpejn̄ Jesucrist. <sup>6</sup>Che batzuub Pabl naani yejcreni, biu' Sprit Dxan xten Dios nen̄ lastooreni.

Dxejc gusloj caniireni garen-garen didxsaj. Guslojza caniireni diidx ni badee Dios lojreni. <sup>7</sup>Si'c tzubitio'p dade' gusajc si'c.

<sup>8</sup>Si'c choñ bäii, guixe-guixee gunii Pabl rextidx Dios, basule'ni xcuent xcälrnibee Dios loj rebejn neñ xquidoo rexpejn Israel. Dini nidxejb guniini loj rebejn.

<sup>9</sup>Dxejc guyu' reni gucnajd, dirureni nililajz xtidx Dios. Che gusloj caniyajreni xtidx Dios lo rebejn, biunejz Pabl ro'c sanäni rexpejn ni rililajz xtidx Jesucrist. Sanä Pablreni te bidxagsa'reni ro scueel xten mastr Tiranno. Ro'c bidxagsa'reni te guixe-guixee basule' Pabl xtidx Dios lojreni.

<sup>10</sup>Tiop ijz bejn Pabl si'c, ni'c guiraa rebejn ni rbäjz Asia biejn diajgreni xtidx Dios. Rexpejn Israel sigajc reben griegw biejn diajgreni xtidx Dios. <sup>11</sup>Gucnäy Dios Pabl bejn ni xhidajl dzunro, remilagwr. <sup>12</sup>Ni'cni biääd bejn ca'reni baii, ca'reni tla' lajd te guxheebreni relajdga lo Pabl. Dxejcti rinäreni relajdga lo rebejn ni racxhuu, luxh riacgajc rebejn ni racxhuuga, rigajcza rebendxab lastoo renani yu' bendxab.

<sup>13</sup>Dxejcti guyu' gaii ben Israel nani entis rcansaj, direni cuäüz tejsi guejdx. Najcreni bejn ni rbää bendxab lastoo rebejn. Bejn redee xhigabcoob, naareni cuääreni bendxab xcuent laj Jesucrist, ni'cni räjpreni lo renani yu' bendxab neñ lastooni:

—Xcuent xcälrnibee Jesucrist nani ruluii Pabl rnibeenu guiriilu neñ lastoo bejn ga —räjpreni.

<sup>14</sup>Guyu' gajdz xi'n Esceva, te ben Israel, nani sajcro lo rebixhojz. Rujn

redee dzuun rbääreni rebendxab neñ lastoo rebejn. <sup>15</sup>Che gunii rexi'n Esceva loj bendxabga si'c, räjp bendxab ni yu' neñ lastoo bejn ga lojreni:

—Rumbeä Jesucrist, rumbeäza Pabl. ¿La'tu, chu la'tu? Dina gumbeä la'tu.

<sup>16</sup>Dxejcti bixa't niguii nani yu' bendxab neñ lastooni yejc rexi'n Esceva, gudinduxhnireni, basälta'nireni, batiäjsni xhajbreni. Dxejcti baxunreni biriireni neñ yu'ga, bidxälguijdzaren biräsya' xhajbreni. <sup>17</sup>Dxejcti guiraa reben Éfeso, rexpejn Israel sigajc ben griegw, gucbee xho bennäj bendxab reniguiiga. Bidxebduxh rebejn ga, luxh huä'p xpala'n Jesucrist.

<sup>18</sup>Xhidalduxh reni huililajz xtidx Dios biääd lo rexpejn Jesucrist. Cacäjpreni guiraa recos xhet laadi nani rujnreni. <sup>19</sup>Xhidajl reni najc bidxaa biädna reguijtz cadre caj yäl najn xten rebidxaa. Dxejcti base'creni reguijtzga nez loj guiraa rebejn. Bejnreni cuent lacti meel saj reguijtzga. Sajcreni tiubitzuu mi melpla't. <sup>20</sup>Xhidalduxh rebejn huililajz xtidx Dios. Batijp Dios lastoo rexpejn ni. Gulä'p guiraareni xpala'n Dios.

<sup>21</sup>Che gulujx recosre, bejn Pabl xhigab chääni guedx Jerusalén, niluxh tedxgaani reguejdx ni re' nez Macedonia näjza Acaya, bejnzani xhigab, naani:

—Che ahua'a Jerusalén, nanabza cha'a guedx Roma.

<sup>22</sup>Ni'cni baxhal Pabl Timoteu näjza Erasto, tio'p renani racnäjni, huijreni Macedonia, luxh laani bia'nni Asia.

### Bidxechduxh reben Ēfeso

<sup>23</sup>Nen redxejga, guyuduxh rebejn yärsia' sa'csi baluii Pabl xtidx Dios. Direni nichaglazj care'ch xtidx Dios.

<sup>24</sup>Te dade' ni laa Demetrio runchee ni'ch pla't xten banäjb ni laa Diana, ni najc banäjb xten guejdxga.

Demetrio näjza guiraa replateer ni rujn ni'ch xten Diana runduxhrenei gaan meel ro'c. <sup>25</sup>Gurejdx Demetrio guiraa replateer ni rujn reni'chga, räjpni lojreni:

—Colcuadiajg, la'tu resa'ä: najntu rbäänu melro lo dzuun ni riennu.

<sup>26</sup>Abahuiitu niguiire ni laa Pabl.

Abiejnza diajgtu xtiidxni. Räjpni lo rebejn: “Xhet diosdi najc reni racchee con naa bejn.” Guedx Ēfeso näjza guideb nación Asia cagusiejchni lajz bejn, xhidalduxh bejn salilajz xtiidxni.

<sup>27</sup>Ni'c ries nitloj xtzunnu palga diru bejn sii ni'ch ni riencheenu. Luxh riesza diru bejn jiädgajñ Diana nen xquidoro Diana. Naj reben Asia, näjza guiraa reben guedxliuj randuxh Diana, banäjb ni sajcru, niluxh palga diru rebejn gan Diana, pet sinitlojni —räjpni.

<sup>28</sup>Che biejn diajg replateer xtiidxni, bidxe'chduxhrenei, guredxa'reni räjpreni:

—Sacduxh Diana xtios reben Ēfeso.

<sup>29</sup>Guideb guejdx guyu' bieje. Dxejcti ruxunreni bidxagsa'reni lo yuj cadro rajc rexjuntreni.

Gunaazreni Gayo näjza Aristarco, ben Macedonia ni rinajl Pabl.

<sup>30</sup>Rlajz Pabl niu'ni cadro bidxagsa' rebejn, niluxh di rexpejn Jesucrist nusaanni. <sup>31</sup>Gaii guxhtis ni rnibee Asia, sa'csi najcreni xamijgw Pabl, baxhal'reni diidx lo Pabl, räjpreni:

—Na'c chäalu cadro nadxagsa' rebejnğa —räjpreni.

<sup>32</sup>Lo rebejn ni re'ga, yu' reni rbedxa' tej diidx, sgaiireni rbedxa' garenca diidx. Te bieiduxh cayajc. Xhidalduxh rebejnğa nicla gan xhicuent bidxagsa'reni. <sup>33</sup>Dxejcti gulää rexpejn Israel te dade' ni laa Alejandro lo reben xhidaalga, te guiniini lo rebejn. Dxejcti basääbni naani lo rebejn te gac dxi rebejn. Rlajz Alejandro guiniini xcuent rexpejn Israel loj guiraa rebejn, te di guidxe'chrenei lo rexpejn Israel. <sup>34</sup>Niluxh che gucbee rebejn najc Alejandro ben Israel, tiop or guredxaduxhrenei, räjpreni:

—Sacduxh Diana xtios reben Ēfeso.

<sup>35</sup>Dxejcti biäd secretaar xten guejdxga lo rebejn, gunibeeni gac dxi rebejn, te räjpni lojreni:

—Colcuadiajg, la'tu ben Ēfeso, caguidxäjñ te ben guedxliuj ni di gacbee reben guedx Ēfeso rajnpac Diana, nani xhaguibaali bitejb lo guedxliuj. <sup>36</sup>Sa'csi rediidxre najc gulii, nungäjñ cuedxitu, na'c guntu recos gujdxre. <sup>37</sup>¿Xhicuent gunaaztu reniguii ni siädñatu ree? Direni gac gubaan ni rbajn recos guidoo, dizareni niniyaj xtiosnu.

<sup>38</sup>Naj palga rlajz Demetrio näjza rebejn ni najc plateer chale'c quej, naxhal jusgaad, suga' reguxhtis. Ro'c suchale'creni xquejreni.

<sup>39</sup>Niluxh palga yu' xhi stee, nanab gac te junt xte rebenguejdx si'c ni caj lo xleiiinu. <sup>40</sup>Ries jii xquejnu lo gubier, naareni bidojpnu te guidxagdilnu gubier. ¿Dxejca'? ¿Xhi jie'tznu xcuent ni bidxagsa'nu ree?

Dxejcti räjpni:

—Agojl, coljiunejz.

<sup>41</sup>Che gunii secretaar si'c, bire'ch rebejn, biunejzreni ro'c.

**Huihuisac Pabl rexpejn Jesucrist ni yu' Macedonia nájza Grecia**

**20** Che bire'ch rebejn, gurejdx Pabl rexpejn Jesucrist biääd lojni, te balijdxnireni. Badeedni xtixtios lojreni. Sä'tini nez reguedx Macedonia. <sup>2</sup>Guiraa reguejdxga cadre gudejdni, balijdxni rexpejn Jesucrist, basule'runi xtidx Dios lojreni. Dxejc sääni reguedx Grecia. <sup>3</sup>Che bidzujñni Grecia, bia'nni ro'c chon bäii. Dxejcti niu' Pabl nen barcw te nijni reguejdx Siria. Niluxh che biejn diajgni cabäz-xhiga'tz rexpejn Israelni te guiniaazrenini, gunaazni nezyuj, gubi'ni nez Macedonia. <sup>4</sup>Huinäni Sópater, xi'n Pirios, te ben guedx Berea; näj Aristarco nájza Secondo, ben guedx Tesalónica; näj Gayo, ben guedx Derbe; näj Timoteu; näj Tíquico nájza Trófimo, ben Asia. <sup>5</sup>Guiraa redee gunijd loonu, huiläjzreni nuure guedx Troas. <sup>6</sup>Guedx Filipos bidxaag Pabl narä, Lucas. Ro'c gudejdnu lanij xten rexpejn Israel che rajwreni yätxtiil ni di saguij. Biriitinu guejdxga, biu'nu nen barcw te sonnu nez guedx Troas. Gaii dxej gusaanu nen barcw, dxejc bidzunnu guedx Troas. Ro'c bia'nnu gajdz dxej.

**Baluu Pabl xhidalduxh xtidx Dios lo rexpejn Jesucrist guedx Troas**

<sup>7</sup>Che gojl dumingw, primer dxej xman, bidxagsa'nu te bidaunu yätxtiil si'c gudaunäj Jesucrist rexpejn pacni galoo che gajdni

guet. Abejn Pabl xhigab guira yääl guiriini guejdxga. Che biu' guxhijñ, gusloj cagusuleduxh Pabl xtidx Dios, huinuuni si'cti garolyäälli. <sup>8</sup>Yu' cadre bidxagsa'nu najc jiaa yejc stiop yu'. Xhidalduxh balgandeel cagusanij ro'c. <sup>9</sup>Sobga' te bi'n ni laa Eutico ro' te bentaan. Lañ ni cagusuleduxh Pabl xtidx Dios lo rebejn, gunaaz bacañ bi'nga, gudiejsni, bitejbni lo yuj desde yu' ni riojn pis. Che huiläsrenini, agujtni. <sup>10</sup>Dxejcti biäjt Pabl lo yuj cadre bitejb bi'nga. Bazuxhijb Pabl cadre naga' bi'nga, gudäáznini. Dxejcti räjp Pabl lojreni:

—Na'c chutu yärsia'. Agubansacni. Baspajn Diosni.

<sup>11</sup>Dxejcti huäpsac Pabl lo yujiaaga. Ro'c bidaunu yätxtiil si'c gudaunäj Jesucrist rexpejn pacni galoo che gajdni guet. Gunii Pabl lojreni xchejru, che bianijli lo guedxliuj. Dxejc biunejzni. <sup>12</sup>Xhetliidiru rajcni bi'nga nani gubansac, nani guläs Pabl. Bibalazduxhrenei, huisa'nrenini rolizjni.

**Biu'nu nen barcw, bionnu guedx Mileto**

<sup>13</sup>Gunijdnu lo Pabl. Biu'nu nen barcw, sonnu guedx Asón, te ro'c guidxaagnu Pabl, sa'csi abejn Pabl xhigab ni'ni jiini guejdxga, ro'cli jiu'ni nen barcw. <sup>14</sup>Che bidxaag Pabl nuunu guedx Asón, biu'ni nen barcw, sonnu lo nisdoo te bidzunnu guedx Mitilene. <sup>15</sup>Nen barcw biriinu ro'c. Che bara yääl, gudejdnu yuj ni re' lo nisdoo ni laa Quío. Che bara stee yääl, bidzunnu guedx Samos. Guedx Trogilio basilaaznu. Che bara stee yääl,

bidzunu guedx Mileto. <sup>16</sup>Di rlanj Pabl jiu'nu guedx Éfeso, diza rlanjni chunu Asía xchej, sa'csi riojb lajzni guidzunu guedx Jerusalén te ro'c tedni redxe lanij ni laa Pentecostés.

**Guedx Mileto guninäj Pabl  
reni rnibee xpejn Jesucrist  
ni yu' guedx Éfeso**

<sup>17</sup>Che guyu'nu guedx Mileto, baxhal Pabl diidx lo rexpejn Jesucrist ni yu' guedx Éfeso, gurejdxni reni rnibee. <sup>18</sup>Che bidzujnreni lo guejdxga, räjp Pabl lojreni:

—Lagajc la'tu najntu xho nabanä nez lojtu, dxejli ni bidzunä, nabannää Dios. <sup>19</sup>La'tu najntu xho runä xtzuun Jesucrist guixe-guixee, guideb xcälñadipä. Dina niliä'p ä xpala'nä. Najntu xho ronä che di bejn chalilajz xtidx Jesucrist. Che rlanj rexpejn Israel nugu't narä, gudedä trabajwduxh. <sup>20</sup>La'tu najntu xho baluiä lojtu guirali rextidx Dios ni najc huen par la'tu. Che nadxagsa'tu baluiä xtidx Dios lojtu, näjza rolijz cade tejtü huiluiä xtidx Dios lojtu. <sup>21</sup>Basule'ä xtidx Dios lo rexpejn Israel näjza lo rebenzijt ni di gac xpejn Israel. Röpä lojreni nanab gusiechlajzreni, gusa'nreni xtojlneni, nanab chalilajzreni xtidx Jesucrist te gudzucaj Dios xtojlneni. <sup>22</sup>Naj cadedä te laad guejdx xtentu, sia'ä guedx Jerusalén, sa'csi caguxhal Sprit Dxan xten Dios narä cha'ä guedx Jerusalén. Dina ganä xhi sacä ro'c. <sup>23</sup>Niluxh nanä cade tej reguejdx cadro rdedä rni Sprit Dxan xten Dios loä sidedä trabajwduxh, siäuä nen latzguiib guedx Jerusalén. <sup>24</sup>Niluxh dina

guidxebä, dizana chanälazduxhä xcälñabanätis, te guluxä dzuun nani baniidx Jesucrist gunä. Lo dzuun ni baniidx Jesucrist nanab chaye'tzä lo guiraa rebejn sibicaj xtojlneni palga chalilajzreni xtidx Dios xcuent Jesucrist —räjp Pabl.

<sup>25</sup>Räjpzani:

—Naj agucbeä dirutu fisac loä, la'tu nani basule'ä xcälñibee Dios lojtu. <sup>26</sup>Rniliäpac lojtu, xhet dojldi rapä palga yu' te bejn ni di chalilajz xtidx Dios, ni di Dios gudzucaj xtojlni. <sup>27</sup>Xhetliidi biäädxd di loj rextidx Dios ni basule'ä lojtu. Dina nucua'tzä nicla tej xtiidxni xcuent xho rlanj Dios guibanu. <sup>28</sup>Colga'p lagajc la'tu si'c ra'p baxhtoor xiil, si'c colga'p guiraa rebejn nani rililajz xtidx Dios sa'csi Sprit Dxan xten Dios abaniidx dzuunga guntu, ni'cni abixe' xtejn Jesucrist lo cruzj te gac gudzucaj Dios xtojlneni. <sup>29</sup>Anancheä che rutdiru narä, siääd bejn nani rlanj chalilajztu ste'ca diidx, na'c chalilajztu niclaza jiutu rebejnga. Ruscueetisreni la'tu. Sutie'chreni la'tu lo sa'tu si'c rutie'ch cuyo't rexiil. <sup>30</sup>Su'za lagajc sa'tu ni guinii didx-xhii lojtu te gunreni gusaan rexpejn Jesucrist xtidx Dios, te chanajlneni redee ni rusguee. <sup>31</sup>Colhuii te di guscueereni la'tu. Di jiäl-lajztu choñ ijz, dxej yääl basule'ä xtidx Dios, ronäli balidxätu, sa'csi sanälazätu.

<sup>32</sup>Räjpza Pabl:

—Asia'are, rusa'nätu ladznaa Dios, gacnäj Dios la'tu. Sutijp xtidx Dios lastootu, te xca'tu guiraa ni bia'n diidx guniidx Dios lojtu, näjza loj guiraa ni abejn Dios bensa'c, nani



najc xpejn̄ni. <sup>33</sup>Dina niniabā meel, niclaza xhabā che baluiā xtidx Jesucrist lojtu. <sup>34</sup>Anajntu lagajc narā benā dzuun con naā te bio' xhi gudaunāā rexamigwā. <sup>35</sup>Si'c benā te filojtu xho guntu dzuun te gacnājtu sa'tu ni xhet rajpdi, te guinaj lajztu xtidx Jesucrist che najni: “Huenru guideednu lo bejn̄ queela xcaxlia'nu xhi cos” —rāj̄pni. <sup>36</sup>Che gulujx gunii Pabl rediidxga, bazuxhibnāj̄ni rebejn̄ga, guredx-gunabni lo Dios. <sup>37</sup>Dxejcti ronduxh guiraareni gudāāzreni guejn̄ Pabl, bachagro'renini. <sup>38</sup>Guc-huinduxh lajzreni dxejc sa'csi rāj̄p Pabl dirureni fisac lojni. Dxejcti huisa'nrenini lo barcw.

### Huij Pabl guedx Jerusalén

**21** Che basa'ntinu rexpejn̄ Jesucrist ro'c, biu'nu neñ̄ barcw, sionnu te lii nejz lo yuj ni laa Cos, ni tre' lo nisdoo. Che bara yāäl, bidzunnu lo xyuj Rodas ni tre'za lo nisdoo. Ro'c biriinu sionnu neñ̄ barcw nez guedx Pátara. <sup>2</sup>Che bidzunnu ro'c guejdxga, bidxälnu te barcw ni sää nez reguedx Fenicia. Dxejc biu'nu neñ̄ barcwga te chonnu ro'c. <sup>3</sup>Bahuiinu lo yuj Chipre ni tre' lo nisdoo, xladbājcwnu tre' yujga, bideednu te laad. Siontinu nez Siria, ro'c bidzunnu guedx Tiro cadro gule'creni cargw ni nuu barcwga. <sup>4</sup>Ro'c bidxälnu rexpejn̄ Jesucrist. Biannānureni gajdz dxej. Baluii Sprit Dxañ xten Diosreni te guniireni lo Pabl, rāj̄preni: —Na'c chāäl̄u guedx Jerusalén. <sup>5</sup>Che baza' gajdz dxej, biunejznu guejdxga. Dxejc guzaj reniguii,

regunaa, nājza rexi'nreni biriinu guejdxga. Ro' nisdoo bazuxhibnu te guredx-gunabnu lo Dios.

<sup>6</sup>Che abazadiidxnu sa'nu, nuure biu'nu neñ̄ barcw, biädla laareni gubisacreni rolizreni.

<sup>7</sup>Biriitinu guedx Tiro. Che bidzunnu ro' guedx Tolemaida, gulujx xpiajnu biāj̄t̄nu neñ̄ barcw. Dxejc biohuiu rexpejn̄ Jesucrist ni yu' guejdxga, biannānureni tejtis yāäl. <sup>8</sup>Che bara yāäl, biriinu guejdxga, sonnu guedx Cesarea. Che bidzunnu guejdxga, bionnu roliz Felipe, te dade' ni rusule' xtidx Dios lo bejn̄. Felipe gujc tej lo gajdz niguii nani gudis xhi gudajw rexpejn̄ Jesucrist nani xhet rajpdi guedx Jerusalén. Rolizni huijia'n̄nu. <sup>9</sup>Yu' tajp xinxapxteb Felipe. Dios badeed diidx guiniireni lo bejn̄. <sup>10</sup>Xhidajl̄ dxej gulāj̄znu roliz Felipe. Lañ̄ ni dxunnu ro'c, bidzuj̄n̄ te niguii ni laa Agabo, biriini nez Judea. Ruzanij Dios xcāriejn̄ni te guiniini xtidx Dios. <sup>11</sup>Che bidzuj̄n̄ni loonu, cua' Agabo xsindoor Pabl, baliibni lagajc reni'ni nājza reñ̄aani, najni loonu: —Anaj Sprit Dxañ xten Dios: “Scree suliib rexpejn̄ Israel ni yu' guedx Jerusalén niguii ni najc xtenni sindoorre te gutedrenini ladz̄naa rebenz̄ij̄t̄.” <sup>12</sup>Che biejn̄ diaagnu rediidxga, nuure nājza reben̄ ro'c, gunabduxhnu lo Pabl na'c chāāni guedx Jerusalén. <sup>13</sup>Dxejc naj Pabl loonu: —¿Xhicuent roontu? ¿Xhicuent runhuiintu lazā? Xhet najcdi jiäūa neñ̄ latz̄guiib, xhet najcdi palga nungäl̄ä guetā guedx Jerusalén xcuent Jesucrist —rāj̄p Pabl.

<sup>14</sup>Che naaddi Pabl gusiechlajzni, xhetru guniidinu lojni. Räjptisnu lojni:

—Sugac nani rłajztis Dios.

<sup>15</sup>Che gudejd redxejga, bilucheenu rehxixtennu, biriinu guejdxga, sontinu guedx Jerusalén.

<sup>16</sup>Gaii rexpejn Jesucrist ni najc beñ Cesarea huisa'n nuure guedx Jerusalén. Ro'c huinäreni nuure roliz te dade' ni laa Mnasón, beñ Chipre, yuj ni tre' lo nisdoo. Laani galooli huililajzni xtidx Dios. Huijia'nnu rolizjni, ro'c gulääznu.

#### Huihui Pabl Jacob

<sup>17</sup>Che bidzunu guedx Jerusalén, bibalazduxh rexpejn Jesucrist sa'csi siopnu ro'c. <sup>18</sup>Che bara yääl huinänu Pabl lo Jacob näjza lo renani rnibee guidoo xten rexpejn Jesucrist. <sup>19</sup>Dxejc gudääz Pablreni, bijni diidx xcuent tebgaj redzuun nani badeed Dios bejnni che guyunäjni rebenzijt nani di gac xpejn Israel, te biejn diajgreni xtidx Dios. <sup>20</sup>Che biejn diajgreni xtidx Pabl, gulä'preni xpala'n Dios, räjzaren lo Pabl:

—Guejblu, sa'nu, anajnlu lacti xhidalduxh xpejn Israel yu' nani rililajz xtidx Jesucrist luxh rapdaduxhrenei leii xten toMoisés. <sup>21</sup>Abiejn diajg rebejnre xcuentlu. Abiejn diajgreni garenca ruluiilu guiraa rexpejn Israel nani rbäjz neñ reguejdx xten rebenzijt, rulijdxlureni na'c gusal'reni bee rexi'nreni, na'cza chazanäjrueni rexcostumbrnu. <sup>22</sup>¿Xhini'c jiennu? Siejn diajgreni abidzujnlu ree, dxejc suchagsa'reni te jiaädreni lojlu. <sup>23</sup>Naj gunlu nani guiniinu lojlu. Yu'

tajp resa'nu ree nani basa'nreni diidx lo Dios. <sup>24</sup>Huinäreni, näjza luj bejn si'ctis gunreni si'c ni caj lo leii xten toMoisés, te gaclu naya nez lo Dios. Luj quixlu guiraa ni banijtreni, te che abasa'tu guiraa ni nanab gac sajc guigaj yejctu si'c te seen te gacbee guiraa rebejn abasoobtu leii. Dxejcti gan guiraa rebejn didx-xhii najc rediidx ni biejn diajgreni xcuentlu. Te gacbeerenei laaca rusooblu xleii toMoisés. <sup>25</sup>Biädla rebenzijt nani huililajz xtidx Jesucrist, xhet najcde, sa'csi abacuaanu lojreni, rie'tznu lojreni: na'c gautu recos nani gule'c bejn si'c gojn loj banäjb, na'c gautu rejn, niclaza bääł nani gurerejn, na'c guesnäjtu nani di gac chäältu.

#### Gunaaz rexpejn Israel Pabl

<sup>26</sup>Che bara yääl, huinä Pabl guidap niguiiga, bejnreni si'c caj lo xleii toMoisés, biu'reni neñ xquidoo rexpejn Israel te huiye'tzreni lo bixhojz neñ guidoo xhi dxej jiaädnä tejpgareni te man te ju't rebixhojz remanga lo Dios.

<sup>27</sup>Si'c nanab gunreni gajdz dxej. Che ameer guiza' redxejga, bahuii rexpejn Israel ni siädä Asia lo Pabl neñ guidoroga. Gunaazreni Pabl, dxejcti gusloj cayujnreni bieje, <sup>28</sup>guredxa'reni räjpreni:

—iColtaa xpejn Israel! iColtaa te gacnäjtu nuure! iBahuilaa! Niguiire najc nani rniyaj rexpejn Israel cadrotis rijni. Rulijdxni bejn te di chazanäjrueni xleii toMoisés, riye'tzni lo bejn xhet sajcdi xquidoronure. Colhuilaa xho siädnäni ree beñ griegw, benzijt ni di gac xpejn Israel, te gundxuudxni xquidoronu —räjpreni.

<sup>29</sup>Si'c caniireni sa'csi te huält bahuiireni sanä Pabl Trófirmos lo nezyuj. Trófirmos najc te benzijit ni siääd guedx Éfeso. Naj cayujnreni xhigab laa niguiiga ni siädnä Pabl neñ xquidoro rexpejn Israel.

<sup>30</sup>Guideb guejdxga guyu' yärsia', bire' benguijhuj, bixa'treni yejc Pabl, gunaazrenini, gudobxhajxhrene Pabl, gulägajc renini neñ guidoroga. Biägajc repuertro xten guidoro.

<sup>31</sup>Laḷ ni cayujnreni xhigab ju'trenini, yu' chu huiye'tz lo nani rnibee resoldaad ni caya'p guejdxga, räjpreni:

—Cayajc te bieiduxh neñ guejdxre.

<sup>32</sup>Guredxgajc comandant resoldaad näjza gaii capitán, ruxunreni bidzujnreni cadre tre' rebejn. Che bahuii rebejn lo comandant näjza resoldaad, guläjz caguijnreni Pabl. <sup>33</sup>Dxejcti gubig comandant lo Pabl, gunibeeni baliib resoldaad naa Pabl con tiop cadenguiib. Dxejcti gunabdiidxn lo Pabl, räjpni:

—¿Chu luj? ¿Xhini'c bejnlu?

<sup>34</sup>Lo reben xhidaalga yu' rexpejn Israel ni guredxa' tej diidx, yu'za reni guredxa' ste'ca diidx. Di comandant niujn gan niacbeeni xhicuent cayajc biey sa'csi cabedxa' guiraa rebejn. Dxejc gunibeeni chanä resoldaad Pabl cadre rbäjzreni. <sup>35</sup>Che bidzunäj resoldaad Pabl ro' scaleer ni caj ro'c, biireni Pabl te bejnreni gan biunäjreni Pabl, sa'csi nialazduxh rebejn rlaizreni nugu'treni Pabl.

<sup>36</sup>Siädnajl guiraa rebejn Pabl, rbedxa'reni:

—Colgugu'tni.

<sup>37</sup>Che agojḷ jiu' Pabl neñ yuro xten resoldaad, räjpni lo comandant con diidx griegw:

—Rlazä guiniä tiop diidx lo guejblu.

Räjp comandant lo Pabl:

—iAn rniilu xtidxsä! <sup>38</sup>An dilu gac niguii ni siääd nación Egipto, nani gudilnä j gubier, nani huinä lo reyubijdz tajp mil niguii nani rugu't bejn.

<sup>39</sup>Dxejc räjp Pabl lojni:

—Narä nacä te ben Israel, te ben Tarso xten Cilicia. Sacduxh guejdxga lo reguedx Cilicia. Canabä gun guejblu te hueen, gusaan guejblu guiniä lo rebejnre.

<sup>40</sup>Dxejc cuäjb comandant guinii Pabl lo rebejn. Lal ni suga'ni lo scaleer basäab Pabl naani lo rebejn te gucdxireni. Che aguredxi rebejn, gusloj Pabl canii lojreni didxsa j hebreo, räjpni:

**22** —Guejbtu bengool, guejbtu resa'ä, näjza la'tu dade'. Gucua diajgtu rextidxä —räjpni.

<sup>2</sup>Che biejn diajgreni caniini didx hebreo, dxidujru guzuj rebejn. Räjp Pabl lojreni:

<sup>3</sup>—Narä nacä te xpejn Israel. Guedx Tarso xten Cilicia gojä. Reepac gulaä. Lo Gamaliel bisiedä guijtz. Baluisa'cni narä guiragajc relei xten retoxtadgoldoonu. Guideb xtipä basobä ni gunibee Dios. Gucä si'cpac ni najctu naj. <sup>4</sup>Dxejcti bidxechduxhä loj renani huililajz xtidx Jesucrist, bagu'täzaren. Balibä xhidajl bejn, niguii näjza gunaa, con cadenguiib. Basäuäreni neñ latzguiib. <sup>5</sup>Bixhojz ni sajcrü näjza guiraa rebengool ni

sajcru neṅ xquidootu, sajc guinii xhini'c benä. Laareni baniidxreni guijt̄z loä. Ni'c huinää lo rexp̄ejṅ Israel ni yu' gued̄x Damasco, cadro hua'a te niniazä rebejṅ nani huililaj̄z xtid̄x Jesucrist. Benä xhigab j̄iädñääreni gued̄x Jerusalén te j̄iäuren̄i neṅ latzguiib, te gusacs̄ireni rebejṅga.

**Gunii Pabl xho huililaj̄zni xtid̄x Jesucrist**

(Hch. 9:1-19; 26:12-18)

<sup>6</sup>Räjp̄zani:

—Dxejc hua'a gued̄x Damasco. Laid̄xejti ameer guid̄zunä guejdx̄ga, chela bazanij te balro guideb gabi narä. Xhaguibaali siääd bajlga. <sup>7</sup>Biabroä lo yuj, dxejc biejn diagä te se' ni canii loä, najni: “Saulo, Saulo, ¿xhicuent rusacs̄ilu narä näjza rexp̄enä?” najni. <sup>8</sup>Dxejcti räpä lojni: “¿Chuluj, Dad?” Najni loä: “Narä nacä Jesucrist ni siääd Nasare't, nani çagusacs̄id̄uxhlu.” <sup>9</sup>Rebejṅ ni sanää bahuiol̄ bajlga, bid̄xejbreni, niluxh di diajgreni niejn xse' nani gunii loä. <sup>10</sup>Räpä lojni: “Dad, ¿xhini'c gunä?” Dxejcti najni loä: “Huistie, huij gued̄x Damasco. Ro'c sinī te dade' lojlu guiraa ni guinibeä gunlu.” <sup>11</sup>Bastujxh bajlga loä, diru loä nien̄, ni'cni gunaaz resa'ä nää, sontinu gued̄x Damasco.

<sup>12</sup>Räjp̄ Pabl:

—Guejdx̄ga gulājz te niguii ni laa Ananías. Rusoobni guiraa releī xten toMoisés. Guiraa rexp̄ejṅ Israel rnīi nadalajz lo dade'ga. Biääd Ananías loä. <sup>13</sup>Cuä'ä guzujni najni loä: “iSaulo, betzä, bahuisac'” Lagajc dxejc biajc loä, bahuiä

lojni. <sup>14</sup>Naj Ananías loä: “Xtios retoxtadgoldoonu agulelu. Gule Dios luj te jiejn diajglu rediidx ni r̄lajzni gunlu, te filojlu Jesucrist, Xindxan Dios, te jiejnza diajglu rextiidxpac Jesucrist. <sup>15</sup>Loj guiraa bejṅ susule'lu guiraa ni bahuiilu näjza nani biejn diajglu. <sup>16</sup>¿Xhicuent sojbtislu ro'c? Basquejn, huistie te tiobnislu. Huililaj̄z xtid̄x Jesucrist, gurejdx lo Dios te gudzucajni rextoj̄llu.”

**Gunii Pabl xhicuent baluiini xtid̄x Dios lo rebenz̄ij̄t**

<sup>17</sup>Che gubi'ä gued̄x Jerusalén, biu'ä neṅ guidoro xten rexp̄ejṅ Israel te gured̄x-gunabä lo Dios. Laḷ ni cabed̄x-canabä lo Dios, astoo gunixcalä, <sup>18</sup>dxejc bahuiä lo Jesucrist. Najni loä: “Basquejn, birii gued̄x Jerusalén sa'csi di rebejṅ chalilaj̄z xtid̄xä ni gusule'lu lojreni.” <sup>19</sup>Narä räpäza lojni: “Dad, anajnreni xho biu'ä guiraa reguidoo, gunazä guiraa rebejṅ nani huililaj̄z xtiid̄xlu, gudind̄uxhäreni, basäuäreni neṅ latzguiib. <sup>20</sup>Che bacuaaren̄i guij yejc Esteban nani gunii xtiid̄xlu, ro'c guzuä, cuäbä bejnreni si'c. Go'pä xhajib xten renani bagu't Esteban laḷ ni bacuaaren̄i guij.” <sup>21</sup>Dxejcti naj Jesucrist loä: “Huij. Suxhalä luj zitduxh. Chäälu lo guiraa rebenz̄ij̄t ni di gac xpejṅ Israel.”

**Bia'n Pabl neṅ roliz̄ro xten resoldaad**

<sup>22</sup>Bacuadiajg guiraa rebejṅ laḷ ni gunii Pabl rediidx̄ga, dxejcti gured̄xa'reni, räjp̄reni: —Colgu't niguiiga. Di nunyäj̄l guibaj̄nr̄uni.

<sup>23</sup>Sanuutis cabedxa'reni.

Gulääreni xcamangwreni, cacuaazareni yuyol̄ jiaa. <sup>24</sup>Dxejcti gunibee comandant lo resoldaad, räjpni:

—Colchanä Pabl neḅ yuro xtenu. Ro'c colquiin Pabl te guiniini didxgulii, te gacbeenu xhicuent rbedxaduxh rebejn lojni.

<sup>25</sup>Sanätireni Pabl. Entis baliibreni ni', naa Pabl con duguijd te niguijnrenini che gunabdiidx Pabl lo capitán, räjpni:

—¿La rajc rguijntu te beḅ roman che gajdntu gacbee xhi dojl̄ bejn̄ni, ä? Et si'cti caj lo xleilu.

<sup>26</sup>Che biejn diajg capitán xtiidxni, bidxejbni, huijni lo comandant, räjpni lojni:

—Colnati xhi gunnäjlu dade're, sa'csi najcni beḅ roman.

<sup>27</sup>Biädguxun̄ comandant lo Pabl, räjpni:

—¿La gulii najclu beḅ roman, ä? Räjp Pabl lojni:

—Guliini.

<sup>28</sup>Dxejcti räjp comandant:

—Narä badedä xhiroob meel te nacä beḅ roman.

Dxejcti räjp Pabl lojni:

—Narä che goläli nacä beḅ roman.

<sup>29</sup>Che biejn diajg resoldaad nani niguijn Pabl si'c, baslagajcreni reduguijd ni naliib ni', naani. Che biejnza diajg comandant najc Pabl beḅ roman, bidxejbni sa'csi gunibeeni biliib Pabl.

**Basule' Pabl diidx xcuentni lo rebixhojz nani rnibee rexpejn̄ Israel**

<sup>30</sup>Che bara yääl, rlajz comandant gacbeeni xhicuent rlajz rexpejn̄ Israel ju't Pabl. Ni'c gunibeeni jiaäd

rebixhojz ni sajrcu näjza reguxhtis xten guidoro. Dxejcti biädñani Pabl, bazujnini nez loj guiraa rebejn̄ ni bire' ro'c.

**23** Rdxelodzu'tz Pabl lo rebejn̄ ni tre' ro'c laḅ ni räjpni lojreni:

—Narä gusule'ä tiop diidx lo guejbtu, beḅ Israel, sa'ä. Guideb ni nabanä ruzobä xtidx Dios. Di lastoä guidxejb nez lo Dios —räjp Pabl.

<sup>2</sup>Che biejn diajg Ananías, bixhojz ni sajrcu, xtidx Pabl, bidxechduxhni, gunibeeni lo renani suga' gajxh lo Pabl ca'preni ro' Pabl.

<sup>3</sup>Räjp Pabl lo Ananías:

—Sigajcza ca'p Dios ro'lu, benguijdx. Ro'c sobga'lu te gunlu yälguxhtis si'cni caj lo leii. ¿Xhicuent rujnlu nani rnii leiiga di nungäj̄l̄ gun bejn̄? ¿Xhicuent gunibeelu guda'preni ro'ä? —räjp Pabl.

<sup>4</sup>Reni suga' cuä' Pabl räjp lo Pabl:

—¿La dilu gacbee laa bixhojz ni sajrcu xten Dios? Na'c guiniyajluni.

<sup>5</sup>Dxejcti räjp Pabl lojreni:

—Rexamigwä, dina niacbeä caniä lo bixhojz ni sajrcu, sa'csi nanä agunii Dios: “Na'c guiniyajlu reni rnibee xpejn̄lu.” Si'c caj lo guijt̄z ni bacuaa reni gunii xtidx Dios.

<sup>6</sup>Gucbee Pabl tiop cuaa najc reni tre' ro'c. Yu' reni najc beḅ saducee, yu'za reni najc beḅ farisee. Dxejguredxa' Pabl räjpni lojreni:

—Sa'ä, narä nacä te beḅ farisee, xi'nza te beḅ farisee narä. Rililazä sibansac bejn̄ lo rebengut, ni'c cabe'creni xquejä ree.

<sup>7</sup>Entis guiniini si'c lojreni, chela gusloj caniireni lo sa'reni. Tiop cuaa gujcreni, gala' refarisee, sgala'

resaducee. <sup>8</sup>Di lajz resaducee chalii sibansac rebengut, dizareni chalilajz yu' rexangl Dios, dizareni chalilajz yu' aim xten bejn. Niluxh referisee rililajz guiraa rediidxga.

<sup>9</sup>Guyu' te bieiro. Dxejcti huisulii gaii farisee nani najn leii, gusloj caniduxhrenei, räjpreni:

—Di niguiire gac benguijdx. Palga gunii te angl xten Dios o te togool lojni, alga Dios tiñäjnu, dxejc sidxechnäj Diosnu.

<sup>10</sup>Che gusloj cabedxaduxhrenei lo sa'reni, bidxejb comandant, andi ju'treni Pabl, caxha'treni yejcni. Dxejcti gunibeeni biäj't resoldaad cadre suga' Pabl. Guideb xtijpreni gulääreni Pabl galäii rebejnğa huinäsaerenini neñ yuro xtenreni.

<sup>11</sup>Che biu' guxhijn, baluiloj Jesucrist lo Pabl, guzujni cuä'ni, räjpni lojni:

—Batijp lajzlu, na'c guidxejblu, Pabl. Si'cni basule'lu xtidxä guedx Jerusalén, sigajcza nanab gusule'lu xtidxä guedx Roma.

### **Rexpejn Israel bejn xhigab nugu'treni Pabl**

<sup>12</sup>Che bara yääl, bachagsa' gaii xpejn Israel, bejnreni xhigab nugu'treni Pabl. Räjpreni lo sa'reni:

—Na'c guidaunu, na'cza guidunnu nis che guigu'tlinu Pabl —räjpreni.

<sup>13</sup>Si'cti tiuu niguii bia'n diidxga.

<sup>14</sup>Bidzujñreni lo rebixhojz näjza rebengool, räjpreni lojreni:

—Abia'nnu diidx, xhet guidaudinu, xhetza guidundinu palga dinu guigutxгаа Pabl —räjpreni—. <sup>15</sup>Naj la'tu näjza guiraa rebengool ni rnibee rexpejn Israel, colguxhal diidx lo comandant te guixee

jiädnäni Pabl lojtu. Colyejn si'c ni rlanjtu jiejnru diajgtu diidx xcuent Pabl. Che jiädnä comandant Pabl ree, nuure sugu'tnuni lo nezyuj che gajdni guidzujñ ree —räjp reniguiiga.

<sup>16</sup>Niluxh biejn diajg xi'n bisiajn Pabl cabäzxhiga'tz reniguiiga te ju'treni Pabl, huijni royuro xten resoldaad. Che bidzujñni, biu'ni räjpni lo Pabl rediidx ni biejn diajgni. <sup>17</sup>Dxejcti gurejdx Pabl te capitán, räjpni lojni:

—Huinälää bi'nre lo comandant te gäbni te diidx lojni.

<sup>18</sup>Huinäti capitán bi'nga lo comandant, räjpni lo comandant: —Pabl, nani niäu neñ yuro xten resoldaad, gunab loä jiädnälää bi'nre lo guejblu te guiniini te diidx lo guejblu —räjpni.

<sup>19</sup>Dxejc gunaaz comandant naa bi'nre, huinäni te laad cadre rut jiejni diajgni xtiidxreni, dxejc räjpni lojni:

—¿Xhini'c rlanjtu guiniilu loä?

<sup>20</sup>Dxejc bazejcn diidx, räjpni loj comandant:

—Abia'n te cuaa xpejn Israel diidx siniabreni lo guejblu jiädnä guejblu Pabl ro jusgaad guixee. Sujnsireni si'c ni rlanj jiejnru diajgreni diidx xcuent Pabl. <sup>21</sup>Na'c chalilajz guejblu xtiidxreni. Tiu niguii sibäzxhiga'tz cuä' nezyuj te ju'treni Pabl. Abia'nreni diidx direni gau, dizareni yä palga direni jutxгаа Pabl. Naj cabäjtisreni guxhal guejblu diidx sinä guejblu Pabl ro jusgaad.

<sup>22</sup>Che biejn diajg comandant diidxga, basaanni sii bi'nga rolizni, räpğaani lojni:

—Rut lojdi pac gäblu guniilu diidre loä.

### Huij Pabl lo Pels ni najc gubernadoor

<sup>23</sup>Dxejcti gurejdx comandant tiop capitán, räjpni lojreni:

—Colgutoj<sub>p</sub> tiop gayuu soldaad, chää guedx Cesarea näjza gayonbitzuu soldaad ni bijb cabaii, näjza tiop gayuu soldaad ni ca' spaad. Rcagaa guxhij<sub>n</sub> guiriireni ree. <sup>24</sup>Colquiil tiop cabaii cuib Pabl te xhet gacdi Pabl cheni chanätuni lo gubernador Pels —räjpni.

<sup>25</sup>Dxejcti bejn comandant te guijt<sub>p</sub> chanäreni lo gubernadoor.

<sup>26</sup>Loj guijt<sub>p</sub> rni scree:

“Gubernador Pels, nani sacduxh.

Narä, Claudio Lisias, ruxhalä xtixtios lo guejblu. <sup>27</sup>Rediidre rucuaä lo guejblu. Gunaaz rexpej<sub>n</sub> Israel niguiire, luxh paru dina nidzunga'cä con resoladaad, nugu'trenini. Che gucebeä najcni be<sub>n</sub> roman, guläänuni ro'c. <sup>28</sup>Rlazä niacbeä xhi quej rbe'creni, ni'c huanääni lo junt xten rexpej<sub>n</sub> Israel ni rnibee guidoro. <sup>29</sup>Dxejc gucebeä requej ni rbe'creni najc ganax xcuent leii xtenreni, niluxh xhet bejndini te nungäjl<sub>p</sub> guetni, niclazä nanab jiäuni ne<sub>n</sub> latzguuib. <sup>30</sup>Che baxhal<sub>p</sub>reni diidx loä cabäzxhiga'tz rexpej<sub>n</sub> Israelni te ju'treni dade're, baxhalga'cäni lo guejblu. Agunibeäza jiädle'c rexpej<sub>n</sub> Israelre xquejreni lo guejblu. Ni'ctis rniä lo guejblu”, si'c caj lo guijt<sub>p</sub> ni bejn comandant.

<sup>31</sup>Che biu' guxhij<sub>n</sub>, huixii resoladaad Pabl sanärenini guedx Antípatris si'cni gunibee comandant gunreni. <sup>32</sup>Che bara

yääl, gubi' resoladaad nani guzaj ni'reni. Resoladaad ni bijb cabaii guzanäj Pabl guedx Cesarea.

<sup>33</sup>Che bidzuj<sub>n</sub> redee Cesarea, badeedreni xquijt<sub>p</sub> comandant lo gubernadoor, huinäzarenini Pabl lojni te biemeenini. <sup>34</sup>Che gulujx bi<sub>n</sub>i guijt<sub>p</sub>ga, gunabdiidxni lo Pabl:

—¿Caro siäädlu?

Che gucebeeni siääd Pabl Cilicia, <sup>35</sup>räjpni lo Pabl:

—Guidzuj<sub>n</sub>si rexpej<sub>n</sub> Israel ni cadxehnäj luj, sucuadiaggacä xtiidxlu —räjp gubernadoor.

Gunibeeni ga'p resoladaadni ne<sub>n</sub> yuro xten Herodes.

### Gunii Pabl xtiidxni lo Pels

**24** Gudejdti gaii dxej, dxejc bidzuj<sub>n</sub> Ananías, bixhojz ni sajcrü, näjza gaii rebengool xten guidoro, näjza te dade' ni laa Tértulo ni gunii xcuentreni. Gusloj cabe'cni xquej Pabl lo gubernadoor. <sup>2</sup>Che biädnäreni Pabl, gusloj Tértulo cabe'c xquej Pabl lo gubernadoor. Räjpni lo gubernadoor:

—Xquixtioste guejblu dxiduxh naba<sub>n</sub>nu. Cayacnäduxh guejblu laadxnu con redzunsacduxh ni cayuj<sub>n</sub> guejblu. <sup>3</sup>Xquixtiosduxh guejblu, gubernadoor Pels, xcuent guiraa redzunsac'c ni ruj<sub>n</sub> guejblu guira nejz. <sup>4</sup>Luxh na'cru gusieednu guejblu, gucuadiaglaa guejblu tiop diidx. <sup>5</sup>Agucebeenu xho najc niguiire. Benguidxduxhni. Cadrotis ri<sub>n</sub>i ruj<sub>n</sub>ni biey lo rexpej<sub>n</sub> Israel. Laani rnibee te cuaa ni laa nasare<sub>n</sub>, nalajznu rebej<sub>n</sub> nani rililajz xtidx Jesucrist ni biäd guedx Nasare't. <sup>6</sup>Rlajzlini nuxhi<sub>n</sub>i xquidoronu,



ni'c gunaaznuni. Niennu te junt te lagajc nuure niennu yälguxhtisni si'cni caj lo xquijtznu. <sup>7</sup>Niluxh bidzujñ comandant Lisias näjza resoldaad. Diptis badzucajreni niguiiga ladzñaanu. <sup>8</sup>Laani gunibeeni lo guejblu jiääd reni rbe'c xquejni. Naj lagajc guejblu sajc guiniabdiidx lojni te gacbee guejblu guliü guiraa requej nani rbe'cnu xcuentni —räjp Tértulo.

<sup>9</sup>Dxejcti guiraa rexpejn Israel ni suga' ro'c räjp guliica xtidx Tértulo. <sup>10</sup>Dxejcti bejn gubernadoor seen lo Pabl te guiniini. Baze'c Pabl diidx, räjpni lojni:

—Rbaaliza lazä guze'cä diidx lo guejblu, sa'csi anana agujc xchero lacti huen rujn guejblu yälguxhtis nacióñ Israelre —räjp Pabl—. <sup>11</sup>Gutzbitio'p dxejtis bidzunä guedx Jerusalén te saganä Dios. Najn rebejn xhi dxej biu'ä Jerusalén, guyasi guniidxreni diidx. <sup>12</sup>Nicla tej dina nichagdilä bejn nen reguidobäz, nicla ro nezyuj. <sup>13</sup>Agule'creni quej xtenä lo guejblu, niluxh nicla tej redzuunga dina niunä. Di gacdi guluipacreni lo guejblu guliü najc xtiidxreni. <sup>14</sup>Rniliäpac lo guejblu: Rañä Xtios retoxtadgoldoonu. Jesucrist baluii xho gansa'cnu Dios. Rililazä rextiidxni. Xhidalduxh rexpejn Israel rniyaj xho basule' Jesucrist gan bejn Dios. Ruzobä guiraali releii xten toMoisés. Rililazä guiraa rextidx Dios ni bacuaa reni gunii xtidx Dios. <sup>15</sup>Rililazä xtidx Dios si'c rililazza rebejnre xtidx Dios. Si'c ni najnreni, si'cza nanä sidzujñ te dxej che guibansac rebengut,

rebenguijdx sigajc rebensa'c.

<sup>16</sup>Ni'cni racbeä laaca nabanä guiraa dxej, di lastoä guidxeyb, nicla nez loj bejn niclaza nez loj Dios, sa'csi rut rajcdi guiliäs dixhii xcuentä.

<sup>17</sup>Räjp Pabl:

—Agujc xchej yu'ä zijt, lajdx garenca bejn, naj gubinää meel ni baxhal reben nejzga te gudedäni lo rebejn ni xhet rajpdi. Biädnääza gojn xtenä gudedäni lo Dios.

<sup>18</sup>Ni'c sanaä guidoro. Ro'c bidxäjñ rexpejn Israel ni siääd Asia narä. Agucnayaä si'c ni rnibee xleiinu. Xhet benxhidajldi suganää, xhetza bieydi cayunä. <sup>19</sup>¿Con rebejn ga naj? Te cue'creni quej lo guejblu palga yu' xhini'c rdxechnäjreni narä. <sup>20</sup>O guiniiza redee palga yu' xhini'c et laadi benä che suga'ä nez loj junt xten guiraa rebixhojz ni rnibee näjza rebengool lo guedx Jerusalén —räjp Pabl—. <sup>21</sup>Tejtis diidx guniä che suga'ä galäiireni, guredxa'a räpä lojreni: sa'csi rililazä sibansac guiraa rebejn lo rebengut, ni'c biädnätu narä lo rebejnre —si'c guniä lojreni.

<sup>22</sup>Che bejn diajg Pels xtidx Pabl näjza sa'csi najne'ni xcuent diidx nani baluii Jesucrist, basoobni stee dxej guidxagsac sa'reni räjpni lojreni:

—Che jiädli comandant Lisias dxejc gunä yälguxhtis —räjp Pels.

<sup>23</sup>Dxejcti gule Pels te capitán ni rnibee te gayuu resoldaad ga'p Pabl. Niluxh räjpni lojni gusaanni gun Pabl nani rlanjtsisni gunni. Na'cza gudxojnñi jiääd reexamigwni te fiireni lojni.

<sup>24</sup>Che gudejd balti dxej, gubi' Pels, biädnäni chäälni Drusila.

Drusila najc beṇ Israel. Dxejc gurejdx Pels Pabl te gusule'ru Pabl xtidx Jesucrist. <sup>25</sup>Gunii Pabl xho nanab guibaṇsa'c beṇ nez loj Dios si'c ni gunibee Dios guibajṇ beṇ. Nanabza gacbee beṇ na'c gun beṇ cos guijdx, sa'csi sidzujṇ dxej gac Dios juejz loj guiraa rebejṇ te fiini xhi bejnreni. Racsesli Pels tant bidxejbni biejn diajgni diidxga. Rājṇni lo Pabl:

—Huij naj. Sibedxsacālu che latā stee —rājṇ Pels.

<sup>26</sup>Naa Pels sudeed Pabl meel lojṇi te guslaanini, ni'c masru guet-guejṇ gurejdxnini te guninājṇni. <sup>27</sup>Si'c gudejd tiop ijz. Dxejc birii Pels gubernadoor. Dxejcti biu' Porcio Festo, gujṇni gubernadorcoob. Niluxh Pels rļajz chanālajz rexpejṇ Israelni, ni'c basa'nni niāusijc Pabl.

### Gunii Pabl xtiidxni lo Festo

**25** Che biu' Festo gujṇni gubernadorcoob xten reguejdxga, bia'nni guedx Cesarea choṇ dxej. Dxejc biriini ro'c sääni guedx Jerusalén. <sup>2</sup>Che bidzujṇni guejdxga, rebixhojz nani rnibee nājza reniguii ni sajcru lo rexpejṇ Israel biāād lo Festo. Gusloj cabe'creni xquej Pabl lojṇi. Gunabduxhrene lo Festo <sup>3</sup>sa'csi rļajzreni gunni te huen laareni, guinibeeni jīādnāreni Pabl guedx Jerusalén. Si'c gunabreni, sa'csi abenxgaareni xhigab cuāzxhiga'tzreni te ju'treni Pabl lo nezyuj.

<sup>4</sup>Dxejcti rājṇ Festo lojṇeni:  
—Suniaū Pabl guedx Cesarea.  
Di gaclaa guibi'ā guedx Cesarea.  
<sup>5</sup>Suchāā reniguii ni sajcru lo sa'tu

guedx Cesarea, te ro'c cue'creni xquej Pabl loā, don la yu' xhi dzunguijdx bejṇni —rājṇni.

<sup>6</sup>Che gudejd si'cti tzuu dxej, gubi' Festo guedx Cesarea. Che bara yāāl, gurejṇi lo yagxhil xten gubernadoor, gunibeeni biāād Pabl lojṇi. <sup>7</sup>Che bidzujṇ Pabl lojṇi, biāād rexpejṇ Israel nani biāād guedx Jerusalén ro'c. Guzujreni guideb gabi Pabl. Gule'creni xhidalduxh xquej Pabl, luxh di niajcdi nuluiireni guliipac xtiidxreni.

<sup>8</sup>Dxejcti rājṇ Pabl lojṇeni:  
—Nicla tej latsiaj dina niunā, dina niunā latsiaj loj leii xtennu, dizana niunā latsiaj lo guidoro ni sojb guedx Jerusalén, dizana niunā latsiaj loj xgubier César.

<sup>9</sup>Dxejcti Festo, sa'csi rļajzni guiliāsni xpala'nni loj rexpejṇ Israel, rājṇni lo Pabl:

—¿La sisiajlu guedx Jerusalén te cue'c rexpejṇ Israel xquejlu ro'c nezloā, ä?

<sup>10</sup>Dxejcti rājṇ Pabl lojṇi:  
—Naj suga'a loj guejblu, ni gule reii César. Guejblu rnibee guiraa reguejdxre. Ree nungājṇ cue'creni xquejā lo guejblu, xhet guedx Jerusaléndi. Ananchee guejblu xhet latsiajdi benā lo rexpejṇ Israel. <sup>11</sup>Palga nacā te benguijdx, o palga yu' xhi latsiaj benā te nungājṇ guetā, xho dina xcābā guetā. Palga xhet latsiajdi benā nani canii rexpejṇ Israel benā, dxejc rutliidi sajz guteed narā ladznaareni. Suchale'creni xquejā lo César nani najc reii xten reben roman —rājṇ Pabl.

<sup>12</sup>Che gunināj Festo reguxhtis xten xquidoro rexpejṇ Israel, rājṇni lo Pabl:

—Luj gunablu chäälu loj reii César. Mbaj. Sijlu lo reii César —räjp Festo.

**Huixiireni Pabl huinärenini  
lo reii Agripa**

<sup>13</sup>Che gudejd balti dxej, bidzujñ reii Agripa näjza chäälni Berenice guedx Cesarea. Biädhuiireni gubernadoor Festo. <sup>14</sup>Che guyu'reni ro'c xchej, bij Festo diidx lo Agripa xcuent Pabl. Räjñ Festo lojni:

—Ree niäusijc te niguii ni laa Pabl ni basa'n Pels. <sup>15</sup>Che guyu'ä guedx Jerusalén, rebixhojz ni rnibee näjza rebengool xten rexpejñ Israel gule'c xquejni loä. Rlajzreni guinibeä guetni. <sup>16</sup>Räpä lojreni: “Di leii xten naciön roman gusaan guet te bejñ palga di bejñ jiädxgaa te guiniireni nez lojpacni xhi bejñ niguiiga, te guzejcza niguiiga diidx xcuent requej, te guiniini la guliireni.”

<sup>17</sup>Ni'cni che biääd rexpejñ Israelga lo guejdxre, che bara yääl guregacä lo yagxhil xten gubernadoor. Dxejc gunibeä huixiireni Pabl guzuj nez loä. <sup>18</sup>Benä xhigab pet yu' xhi cosro bejnñi. Luxh che gusloj cabe'creni xquejni, gucbegacä xhet latsiarodi bejñ Pabl. <sup>19</sup>Alga cadiñjärenini xcuent xleiireni, xcostumbreni. Guniizareni xcuent te niguii ni laa Jesucrist. Agujtni, niluxh canii Pabl gubansacni lo rebengut. <sup>20</sup>Guxii nanä xcuent sa' diidxre, ni'cni gunabdidxä lo Pabl top sicäjbnì chanääni guedx Jerusalén te ro'c cue'c rexpejñ Israel xquejni. <sup>21</sup>Dxejc che gunii Pabl lojpac reii César chale'c rexpejñ Israel xquejni, ni'c gunibeä jiäusijcni lañ ni gac guxhaläni lo César —räjp Festo.

<sup>22</sup>Dxejcti räjñ Agripa lo Festo:

—Narä rlazäza jiejn diagä xtidx niguiiga —räjp Agripa.

Dxejcti räjñ Festo lojni:

—Guixee gucuadiaglu xtiidxni —räjpnì.

<sup>23</sup>Che bara yääl, biääd Agripa näjza Berenice, luxh sucheduxhreni. Näjza recapitán ni sajrcu näjza rebejñ ni sajrcu lo guejdxga biu'reni nen yuro xten Festo. Dxejc gunibee Festo biääd Pabl. <sup>24</sup>Dxejcti räjñ Festo lo guiraa reni re' nen yuro: —Reii Agripa näjza guiraa rebejñ ni tre' ree, colcuadiag. Colhuii lo niguiire. Reni rnibee xpejñ Israel guedx Jerusalén näjza guejdxre agule'c xquejni loä, canabduxhreni guetni. <sup>25</sup>Niluxh narä rchaloä xhet bejndini te nungäjñ guinibeä guetni. Luxh lagajc laani gunabni chääni te gac César juejz lojni, ni'c runä xhigab guxhaläni lojni. <sup>26</sup>Naj dina ganä xhini'c gucuaä lo guijtz te guxhaläni lo César ni rnibee narä. Ni'c biädñää niguiire nez lo guiraatu, ganid nez loj guejblu, reii Agripa, filaa guejblu te gaxäjsi che aguiniini xtiidxni lo guiraanu, sidxälä xhi diidx gucuaä lo guijtz ni chää lo César. <sup>27</sup>Narä runä xhigab di nungäjñ guxhalä niguiire ni niäu latzgüiib lo César palga di gacdi gusule'ä xhi quej xcuentni cabe'c rexpejñ Israel loä.

**Gunii Pabl rextiidxni lo reii Agripa**

**26** Dxejcti räjñ Agripa lo Pabl: —Gunilaa xtiidxlu loonu.

Dxejcti guläs Pabl naani, gusloj cagusule'ni diidx lojreni. Räjpnì:

<sup>2</sup>—Reii Agripa, rbalazduxhä sa'csi sajc gusule'ä diidx lo guejblu, sa'csi naj suze'cä diidx xcuent guiraa

requej ni gule'c rexpejn Israel.  
<sup>3</sup>Sa'csi guejblu nanduxh xcuent guiraa releii xten rexpejn Israel. Najnza guejblu xhicuent rdxagdił sa'reni. Ni'c rniabduxhá na'c jieed guejblu gucuadiaglaa guejblu guiraa rextidxá.

<sup>4</sup>Räjpza Pabl:

—Guiraa rexpejn Israel nanchee xho nacá che gucáli biuux guedx Jerusalén. Galooli najc guedx Jerusalén ladxá.  
<sup>5</sup>Galooliza numbeereni nará, malaii guicäjpreni gucá te farisee nani bazobduxhru xleiinu si'cni rililajznu. <sup>6</sup>Naj suga'a ree, rlajzreni jiaüá sa'csi rililazá diidx nani bia'n Dios con retoxtagdooloonu.  
<sup>7</sup>Guitzubitop cuaa rexpejn Israel huililajz siliás Dios guiraa rebengut te guibansacreni. Ni'cni bazuxhijbreni lo Dios dxej-yáäl. Naj rniliá lo guejblu reii Agripa, sa'csi rililazá siliás Dios guiraa rebengut te guibansacreni, ni'cni rlajzreni gusäureni nará. <sup>8</sup>Palga abejn Dios xhigab guiliásni guiraa rebengut te guibansacreni, ÷hicuent di lajztu chalii xtidx Dios?

<sup>9</sup>Räjpza Pabl:

—Nará benáza xhigab galoo nanabpac guidxe'chá loj rexpejn Jesucrist ni siáäd Nazare't, ni'c batedäreni trabajwduxh basäuäreni nen latzguiib. <sup>10</sup>Guiraa recosre benáza guedx Jerusalén. Baniidx rebixhojz ni rnibee guijtız loá te basäuá rexpejn Jesucrist nen latzguiib. Che biäurenı nen latzguiib, nará gule'cá xquejreni te gujtreni. <sup>11</sup>Balti huält basacsiduxhäreni lagajc nen guidobáz te niniyajreni Jesucrist.

Luxh basacsiduxhäreni, hua'a guideb nez reguedxzijz te ro'c huisacsíá rexpejn Jesucrist.

(Hch. 9:1-19; 22:6-16)

<sup>12</sup>Räjpza Pabl:

—Ni'c sa'a nez guedx Damasco, ca'a guijtız ni baniidx rebixhojz ni rnibee. <sup>13</sup>Rniliá lo guejblu, reii, si'cti läidxej, bahuiá te bajl ni siáäd xhaguibaali. Rsanijruni loj gubijdx. Basanijni guideb gabi cadro suga'a näjza reni sanáá. <sup>14</sup>Che biabrloonu lo yuj, biejn diagá xse' te ni canii loá con didx hebreo: “Saulo, Saulo, ÷hicuent rusacsílu nará näjza rexpená? Che rusacsílu nará, lagajc luj rdejdlu trabajw, si'c te gon ni rucuanı' yejc garu'ch.” <sup>15</sup>Dxejcti räpä lojni: “¿Chu luj Dad?” Dxejc najni loá: “Nará nacá Jesucrist nani cagusacsíduxhlu. <sup>16</sup>Huistie, gusulii. Nará baluiloá lojlu sa'csi rlazá gaclu te xpená. Aguleálu te gusule'lu lo rebejn guiraa ni bahuiilu nadxej, näjza guiraa recos ni churu guluiá lojlu. <sup>17</sup>Naj suxhalálu loj rexpejn Israel näjza lo rebenzıjz nani di gac xpejn Israel. Che gusacsı rexpejn Israel näjza rebenzıjz luj, sacnäduxhälu, te di ju'treni luj. <sup>18</sup>Gacnäá lastooreni te che jiejn diajgreni xtidxá, chalilajzrenini, diru xcäriejnreni gac nayáäl, sianij xcäriejnreni. Dxejc dirurenı gusoob xtidx Bendxab ni rnibee rebendxab, sa'csi susoobreni xtidx Dios. Che chalilajzreni rextidxá, sudzucaj Dios xtojłreni. Dxejcti suchaag Diosreni loj renani anajc benmaya sa'csi basoobreni xtidx Dios, huililajzreni xtidxá.”

<sup>19</sup>Räjpza Pabl:

—Ni'cni rniliä lo guejblu, reii Agripa, cayunä si'cni naj Jesucrist loä gunä che baluilojni loä. <sup>20</sup>Gunixgaä xtiidxni lo reben̄ Damasco. Röpä lojreni: “Colgusiechlajz, colgusoob xtidx Dios. Colyujn dzunsa'c te gacbee rebejn̄ abasiechlajztu, arusoobtu xtidx Dios.” Si'cza guniä lo reben̄ Jerusalén, näjza lo rebejn̄ ni yu' reguedx Judea, näjza lo reben̄zijt ni di gac xpejn̄ Israel. <sup>21</sup>Sa'csi benä si'c, gunaaz rexpejn̄ Israel narä nen̄ guidoro, rlanjreni nugu'treni narä. <sup>22</sup>Naj racnäj Dios narä, naj sanuutis cagusule'ä rediidxga lo guiraatis bejn̄. Loj rebejn̄ ni xhet rajpdi sigajc loj rebejn̄ ni rapduxh. Rusule'ätis nani caj lo guijtz nani bacuaa toMoisés näjza guiraa reniguii nani gunii xtidx Dios. Laareni galooli guniireni xcuent xhini'c gac naj. <sup>23</sup>Najreni sidejd Crist trabajwduxh, sugu'trenini. Niluxh sa'csi ganiddoo laani guibañsacni lo rebengut, ganiddooza laani suluiini loj rexpejn̄ Israel näjza loj guiraa rebenzijt guliipac xtidx Dios, sibañsac bejn̄ lo rebengut, si'c ni guniini galooli.

**Di Agripa nililajz xtidx Jesucrist**

<sup>24</sup>Laḷ ni canii Pabl rediidxga lojreni, dip gunii Festo, räjpni lo Pabl:

—Pabl, yejclu cayajc. Pet sa'csi nanduxhlu guijtz ni'c cayajc yejclu.

<sup>25</sup>Dxejcti räjp Agripa lojni:

—Rniliä lo guejblu dad gubernador Festo, xhet rajcdi yecä. Ganax didxlii caniä. <sup>26</sup>Ree suga' reii Agripa. Laani nancheeni

guiraa rediidxre, ni'c guyasi caniä rediidxre lojni, dizana guidxebä sa'csi anajnni gulli guiraa ni gujc, sa'csi xhet xhiga'tzdi gujcreni.

<sup>27</sup>Guejblu reii Agripa, čla rililajz guejblu xtidx reniguii nani bacuaa xtidx Dios, ä? Nancheä rililajz guejblu diidxga —räjp Pabl.

<sup>28</sup>Dxejcti räjp Agripa lo Pabl:

—Tuche'nsi riäädx gunlu gan chalilazä xtidx Jesucrist te gacä xpen̄ Dios.

<sup>29</sup>Räjp Pabl lojni:

—Xhet najcdi palga guxii o xhidajl cayäädx, narä canabä guniidx Dios chalilajz guejblu xtiidxni si'c rililazä xtiidxni, nägajcza guiraa reni cacuadiajg xtidxä te gactu si'c nacä, niluxh xhet näjdi resa' cadenre —räjp Pabl.

<sup>30</sup>Dxejcti huisu Agripa, Festo, Berenice, näjza rebejn̄ ni sobganäjreni. <sup>31</sup>Che gubigreni stelaad, räjpreni lo sa'reni:

—Niguiire xhet bejndini te guetni, xhetza bejndini te jiauni.

<sup>32</sup>Dxejcti räjp Agripa lo Festo:

—Paru dini niniab chääni lo César, sajc nuslaanuni.

**Birii Pabl sää nez guedx Roma**

**27** Basoobtireni dxej ni niu'nu nen̄ barcw te chonnu Italia. Dxejc bateedreni Pabl näjza sgaii bejn̄ nani niäuzä lo capitán ni laa Julio. Rnibee Julio te gayuu soldaad, najcreni te cuaa ni laa Augusto. <sup>2</sup>Näjza te dade' ni laa Aristarco guzaj, siäädni guedx Tesalónica xten Macedonia. Biu'nu nen̄ barcw ro' guedx Cesarea. Barcwga siääd guedx Adramitio. Biriitinu, najc xhigab teednu nez

reguejdx nani yu' ro' nisdoo lo reyuj xten Asia. <sup>3</sup>Che bara yääl guläjz barcw ro' guedx Sidón. Huenduxh gujc Julio con Pabl, basaanni bihuii Pabl reexamigwni ni yu' guejdxga te bahuiireni Pabl, badeedreni xhi rquiinni. <sup>4</sup>Che säasac barcw lo nisdoo, bideednu stelaad Chipre, yuj ni tre' lo nisdoo, sa'csi säáb te beduxh, ni'c naga' Chipre xladbäjgwnu, te guxiiru rda' bej loonu. <sup>5</sup>Che sonnu neñ barcw, bideednu xnisdoo reguedx Cilicia näjza xnisdoo reguedx Panfilia, te bidzunu ro' guedx Mira xten Licia. <sup>6</sup>Ro'c bidxäjł capitán xten resoldaad stee barcw ni siääd guedx Alejandría. Agojl chää barcwga Italia. Bateedtini guiraanu lo barcwga. <sup>7</sup>Balti dxej chäigaj sonnu lo nisdoo. Trabajwduxh bidzunu lo nisdoo ro' guedx Gnido, sa'csi entis cabi' beduxh nez cadro sonnu. Ni'c trabajwduxh bideednu xladbäjgw yuj Creta ni tre' lo nisdoo xladbeenu. Gudejdnú guedx Salmón. <sup>8</sup>Dxejcti chäiduxh sonnu neñ barcw lo nisdoo nez cuä' yu Creta; si'ctis gujc bidzunu te lajt ro' nisdoo ni laa Buenos Puertos cadro guxii säáb bej. Gajxh ro'c tre' guedx Lasea. <sup>9</sup>Agujc balti dxej cayaclaanu, luxh agudejdza dxej ni rucua'n rexpejn Israel, guxii riäädx chaa ijz. Rebäire di bejn chää neñ barcw sa'csi yuduxh riesgw lo nisdoo, ni'c balijdx Pabl rebejn, <sup>10</sup>räjpni lojreni: —Rexamigwä, runxgää bis guejbtu, palga chonnu neñ barcw chanuunu xnejznu, sajc te liädxduxh. Sinitloj cargw, sibijxh barcw, luxh silo' xhidajł bejn, —räjpni.

<sup>11</sup>Niluxh di capitán xten resoldaad niu xtidx Pabl. Biuruni xtidx nani rusaj barcw näjza xtidx baxhuaan xten barcw. <sup>12</sup>Luxh sa'csi lajtga dini gajc huen tedreni rebäii nalduxh, bejnreni xhigab hueenru guiriinu ro'c te chonnu guedx Fenice ni tre'za lo yu Creta, sa'csi di bej guibiduxh ro'c. Hueenru ro'c guilääznu ted rebäinajł, räjpreni. <sup>13</sup>Ni'c che gusloj cabi' te bebäz nez lad sur, naareni pet xhet najcdi guiriinu lo nisdoo con barcw. Dxejc baslaareni barcw, sontinu ro' nisdoo gajxh cuä' Creta. <sup>14</sup>Niluxh di niacłaa gusloj te nisguipeduxh birii nez redajn xten Creta. <sup>15</sup>Gunaaz bejga barcw, diru gacdi gusajrenini. Basa'ntireni sanä bejga barcw cadrotis rłajzni. <sup>16</sup>Siädgobiuj barcw te canuu. Che bidzunu stelaad te yuje' ni tre' lo nisdoo ni laa Clauda, guxiiru cabi' beduxhga. Dxejcli bejnreni gaan guläsreni canuu neñ barcw. <sup>17</sup>Che basälnu canuu neñ barcw, cua'reni gaii duro te baliibreni barcwro, bateedreni gaii duu xque' barcw te na'c guibilni. Cadxejbreni te di chachu' barcw lo yujxh ni laa Sirte ni yu' neñ nisdoo. Ni'c guläjtreni ladro ni rniaaz bej te rusajni barcw, gudixhreni lajdga neñ barcw. Sanäti beduxhga barcw cadrotis rłajzni. <sup>18</sup>Che bara yääl caguscuä' beduxh barcw lo nisdoo. Sas basälreni che'n cargw lo nisdoo te bicharu barcw. <sup>19</sup>Ni riojn dxej, lagajc laareni basälreni lo nisdoo guiraa xtrast barcw. <sup>20</sup>Che agujc balti dxej niäu lo gubijdx, diza rebale' nien xhaguibaa sa'csi laltis cayajb nisguipeduxhga, biennu xhigab guiraanu sejtnu. <sup>21</sup>Xchero



rut rlanjdi gau. Dxejc gusuj Pabl galäii rebejn räjpni lojreni:

—Rexamigwä, paru nucuadiajg guejbtu xtidxä, na'c niriitu xyuj Creta, di liäädxre niajc, dizanu nidejd trabajwduxhre. <sup>22</sup>Niluxh colcuedxdi lastootu. Niclatej bejn ni siääd lo barcw di guet. Barcwrtis sinitloj. <sup>23</sup>Nacä te xpejn Dios, runä xhitis ni rnibeeni gunä. Nayääl biädsuj te xangl Dios cuä'ä, <sup>24</sup>najni loä: “Na'c guidxiejblu Pabl. Nanabpac chäälü lo reii César. iBahuilaa! Abasalajz Dioslu reni siädnälu; nicla tej reni yu' nen barcwre di guet”, najni loä. <sup>25</sup>Ni'cni caniä lo guejbtu, na'c guidxiejbtu. Narä rililazä xtidx Dios. Rililazä sisiojb xtidx Dios si'c ni naj xangl Dios loä. <sup>26</sup>Niluxh yu' cadro chalaj barcw lo yujxh nen nisdoo gajxh lo te yuje' ni tre' nen nisdoo —räjp Pabl.

<sup>27</sup>Si'cti tiop xman balanaa beduxhga barcw nezre, nezrec lo nisdoo ni laa Adria. Pet garol yääl ni bejn reniguii ni ruzaj barcw xhigab abidzujn barcw gajxh lo yuj, <sup>28</sup>ni'c bastejbreni te guuib lo duu xhajn nisdoo, te barexhreni ro'c, dxejc gucbeereni najc nisdoo jäät si'cti galbitzubixho'p metr. Che guzaj barcw stelabäze', bastesacreni guuib con duu xajn nisdoo, dxejc gucbeereni ro'c najc nisdoo jäät si'cti galbigajdz metr. <sup>29</sup>Dxejc bidxiejbreni te di chalaj barcw yejc reguij. Bacuaatireni tajp guibro si'c guench ni naliib te caden te ru'reni nen yujxh te ruscuääzreni barcw, te jia'nni tejsi lajt. Dxejc rlanjzreni malai jianijga lo guedxliuj. <sup>30</sup>Dxejcti gulät remos

canuu lo nisdoo cayujnsireni si'cni chastejbreni stee guench guuib lo nisdoo, niluxh rlanjzreni guxunreni guidon la sajc guidzujnreni ro' nisdoo. <sup>31</sup>Dxejcti räjp Pabl lo capitán näjza lo resoldaad:

—Palga di redee jia'n nen barcw, di gacdi guslaatu xcäl nabajntu —räjpni.

<sup>32</sup>Dxejcti batiugya' resoldaad duu ni naaz canuu te bitejbni lo nisdoo, sanäti nisdoo canuuga. <sup>33</sup>Che gusloj cayanij, gunibee Pabl, räjpni lojreni: —Nadxej rajc tiop xman gajdtu gues, gajdzatu gau. <sup>34</sup>Naj coltajw te gac guixobtu lo nisdoo. Na'c guntu xhigab guettu, nicla tej xquidxejcti di nitloj.

<sup>35</sup>Che gulujx gunii Pabl si'c, cua'ni yätxtiil, badeedni xquixtios lo Dios nez loj guiraareni. Dxejc gula'nini, gusloj cayajwnini. <sup>36</sup>Dxejc bibaa-lajzreni, näjza laareni gusloj cayajwreni. <sup>37</sup>Nuunu najcnu tiop gayuu gayonbitzubixho'p bejn ni yu' nen barcwga. <sup>38</sup>Che agujc gudajwreni, basälreni triuu lo nisdoo te bicharu barcw.

<sup>39</sup>Che bianisac, direni niembee yujga, niluxh bahuiireni cadro rdzujn te gueubäz ro' nisdoo cadro yu' xhiroob yujxh ro' nisdoo. Rlanjzreni nusiureni barcw ro'c. <sup>40</sup>Dxejcti baslaareni guidap guench guuib ni naaz barcw, bia'nreni guideb caden nen nisdoo, baxheczareni yajg ni ruzaj barcw, guläszareni ladro nez delant barcw te balanaa bej barcw. Badzuréreni barcw sääreni nez ro' nisdoo. <sup>41</sup>Sas biu'reni te lajt cadro rdxagsa' tiop cuua nis. Ro'c huilaj yejc barcw nen yujxh nen nisdoo, digacdiru guiniibni. Dxejcti gusloj cabijl dejt barcw sa'csi sanuutis caguijn nisdoo



detz barcw. <sup>42</sup>Dxejcti rlaiz resoldaad nugu't repres te di guixoobreni lo nis guxunreni. <sup>43</sup>Niluxh di rlaiz capitán xten resoldaad guet Pabl, ni'c dini nusaan nugu't resoldaad repres. Gunibee capitán ganiddoo renani rajc rxoob lo nis guitiäjs lo nisdoo te guidzujñreni lo yujxh. <sup>44</sup>Dxejcti birinajl rebejn ni digacdi guixoob lo nis, naazreni barajd o te la' yajg ni gula' detz barcw. Si'c gujc bidzujñ guiragajc rebejn lo yujxh ro' nisdoo. Nadaanreni bidzujñreni lo yujxhga.

**Bidzujñ Pabl lo yuj ni laa  
Malta ni re' lo nisdoo**

**28** Che bidzujñnu lo yuj ni tre' lo nisdoo, biembeenu yujga najc ni laa Malta. <sup>2</sup>Gucnäy rebejn ro'c nuure, gule'creni guiboo bahuiireni nuure sa'csi cayacnalduxh, cayajbza nisguij. <sup>3</sup>Ca' Pabl te däöz yajg, sale'cnini lo guiboo, chela biriyäl te bäl nialajz nen yajgga. Saa gudauya'ni naa Pabl. <sup>4</sup>Che bahuii reben Malta li najl bäl nialajzga cayauya' naa Pabl, gusloj cayäjbreni lo sa'reni:

—Pet rugu'tni bejn ni'c mase bejnni gaan lo nisdoo siguijxni xtojlni, sejtni naj.

<sup>5</sup>Gubijb Pabl naani dxejcti bitejb bälga lo guiboo. Xhet gujcdi naa Pabl. <sup>6</sup>Dxejc reben ro'c cabäjz fiireni la sisiäguij naa Pabl o laa sejtni. Xchero bidxelojreni. Che bahuiireni xhet gujcdini, gusloj bejnreni ste'ca xhigab, räjpreni lo sa'reni:

—Pet dios najcni.

<sup>7</sup>Gajxh ro'c naga' xyuj te dade' ni laa Publio ni najc xcubernadoor Malta. Biojia'nnu rolijzni chon dxej. Huenduxh gujc dade'ga, baniidxni guiraa ni biquiinnu.

<sup>8</sup>Naga' xtad Publio cayacxhuuni, yu'ni xliaa, cayajczani yobrejn. Huihui Pabl ni. Guredx-gunab Pabl lo Dios, dxejc batzuub Pabl naani yejcn i, basiacgajcnini. <sup>9</sup>Che gucbee rebenguejdxga abasiajcn i ben racxhuuga, bidzunñajreni ben racxhuu lo Pabl, basiajc Pabl guiraa reni. <sup>10</sup>Ni'c banidx-xliaa reni xhidalduxh xhicos, luxh che biriinu ro'c, baniidxreni guiralii recos ni biquiinnu nen barcw.

**Bidzujñ Pabl guedx Roma**

<sup>11</sup>Agujc chon bäii yu'nu ro'c che biu'nu nen te barcw ni siäd Alejandría. Lagajc ro'c bateed barcwga rebäinajl che rsiäb beduxh. Yejc barcwga caj tiop figuur xten tiop biuux ni laa Cástor näjza Pólux, rexingancua'ch dios ni laa Zeus. <sup>12</sup>Biriinu Malta sonnu nen barcw nez guedx Siracusa. Ro'c bia'nnu chon dxej. <sup>13</sup>Dxejcti biusacnu nen barcw, sonnu lo nisdoo cheni bidzunlinu guejdx ni laa Regio. Che bara yääl, gubi' te bej birii lad sur. Biusacnu nen barcw. Bara yääl bidzunnu guedx Puteoli. <sup>14</sup>Ro'c bidxaagnu gaii xpejn Jesucrist. Najreni loonu:

—Coljiannäj nuunu —najreni.

Bia'nnu ro'c gajdz dxej. Dxejc biriinu guejdxga, ni'nu sonnu nez guedx Roma. <sup>15</sup>Che gucbee rexpejn Jesucrist ni yu' guedx Roma siopsaanu nez Roma, biädreni guedx Foro de Apio näjza stee guejdx ni laa Tres Tabernas, ro'c bidxaagreni nuure. Che bahuii Pabl lojreni, guzutijp lastooni, badeedni xquixtios lo Dios. <sup>16</sup>Che biu'nu guedx Roma, bateed capitán repres ladznaa comandant, niluxh basaanni cualaa Pabl te yu' cadro cuääzni. Tejtis soldaad biannäj Pabl.

**Baluii Pabl xtidx Dios lo reben Roma**

<sup>17</sup>Che gudejd choñ dxej, gurejdx Pabl reni rnibee lo rexepejn Israel. Che bidxaag sa'reni cadre yu' Pabl, räjpni lojreni:

—Guejbtu reexamigwä, resa'ä, xhetliidi nani xhet laadi benä lo rexepejn Israel, dizana nibälazä xleii toMoisés. Niluxh basäureni narä neñ latzguuib guedx Jerusalén, dxejcti bateedreni narä ladznaa reroman. <sup>18</sup>Che biejn diajgrenti xtidxä, rrajz reguxhtis roman nuslaa narä sa'csi xhet benädi te nugu'treni narä. <sup>19</sup>Niluxh naaddi rexepejn Israel guslaareni narä, gunabätis lojpac reii César jiädle'creni quej ni cabe'creni xcuentä. Niluxh narä xhet xquejdi rexepejn Israel cue'cä. <sup>20</sup>Ni'cni guredxä la'tu te fiä lojtu, te guininää la'tu, sa'csi rililazä lagajc si'c rililajz xpejn Israel sibansac rebengut, ni'c nalibä cadenre.

<sup>21</sup>Dxejcti räjpreni lojni:

—Nicla tej guijtz gajd reguxhtis xten reguedx Judea guxhal loonu xcuentlu, gajdza rexepejnnu ni bidzujñ ree jiädsan diidx xhet laadi bejnlu. <sup>22</sup>Rrajznu jiejn diajgnu xtiidxlu, don xhi naalu, sa'csi racbeenu xhidajl lajt rniyajreni redidxcoob xten Jesucrist —räjpreni.

<sup>23</sup>Guletireni te dxej guidxagsa'reni. Che bidzujñ dxejga, bidxagsa' xhidalduxh bejn neñ yu' cadre rbäjz Pabl. Guideb dxej basule' Pabl xtidx Dios lojreni. Basule'ni xho rnibee Dios lojreni. Con rediidx ni caj lo xleii toMoisés näjza diidx ni bacuaa reniguii

nani gunii xtidx Dios basule'ni Jesús najc Crist nani galooli cabäjz reben Israel jiääd. <sup>24</sup>Yu' reni huililajz xtidx Pabl, yu'za reni di nililajz xtiidxni. <sup>25</sup>Sa'csi di nijcedi niujnreni tejsi xhigab gusloj siireni. Ganiddoo räjp Pabl lojreni:

—Guliica naj toIsaías che badeed Sprit Dxaan xten Dios rediidxre guniini, räjpni lo rextadgoldoonu:

<sup>26</sup>Huij, gunii lo rebejnre, scree gojz lojreni:

Siejn diajgtu xtidxä, niluxh ditu gacbeeni.

Suhuiitu nani runä luxh ditu gumbee xhini'c ruhuiitu.

<sup>27</sup>Agucnajd lastoo rebejnre sa'csi di rrajzreni chalilajzreni xtidxä.

Direni cuadiajg xtidxä sa'csi di rrajzreni jiejn diajgrenti diidx ni guliipac.

Rusäuzareni balojreni te di fiireni, te di lajzreni chalii.

Ni'cni direni gusiechlajzreni te gusaan gunreni dojl te gudzucaj Dios xtojlni.

<sup>28</sup>Räjp Pabl lojreni:

—Colgacbee. Najli sisiule' xtidx Dios lo rebenzijt ni di gac xpejn Israel te gusiejch lajzreni, te gudzucaj Dios xtojlni. Rniliápac lojtu, sililajzreni rextidx Dios.

<sup>29</sup>Che gulujx gunii Pabl rediidxga lojreni, ensilaareni gusloj cadxagdijl sa'reni lañ ni sääreni.

<sup>30</sup>Tiop ijz guläjz Pabl guejdxga neñ yu' ni cualaani. Biuni guiralii rebejn ni biääd rolijzni. <sup>31</sup>Lo guiraa rebejnnga basule'ni xho rnibee Dios lojreni. Bijzani diidx xcuent redzuun nani bejn Jesucrist. Di lastooni nidxejb, rutza badxojndi guniini.